

Summaria christlicher Leer

Dieterich, Veit

Vorwort

2022 – ich fange jetzt (im September 2021) schon an, die Bücher für das nächste Jahr zu überarbeiten. Das bedeutet, dass neue Bücher hinzukommen und bestehende Bücher überarbeitet werden. Und da mittlerweile in der Lesekammer mehr als 1.000 Bücher zum Download stehen, ist das eine Menge Arbeit. Deshalb fange ich so früh wie möglich damit an.

An den Büchern, die es schon gibt, ändert sich das Vorwort. Zusätzlich möchte ich Bilder der jeweiligen Autoren hinzufügen, so weit mir diese vorliegen. Und ein neuer Spendenaufruf steht auf der letzten Seite – es geht um die Kirche Jung St. Peter in Straßburg. Wer mich kennt, der weiß, dass ich für die Kirche der Reformationszeit in Straßburg eine ganz besondere Vorliebe habe – daher der Spendenaufruf für die Kirche, in der Capito und Fagio wirkten..

Euch allen wünsche ich Gottes reichen Segen und dass Ihr für Euch interessante Texte hier findet. Für Anregungen bin ich immer dankbar.

Gruß & Segen,

Andreas



Veit Dietrich.

Nach dem Gemälde von L. Cranach in Paris. (Photographie von Braun in Dornach.)

Dieterich, Veit - Summaria Christlicher lehr für das junge volck/ Was auß eim yeden Sontags Euangelio zu mercken sey/ Sampt angehenckten Gebeten.

durch Vitum Dietrich.

M.D.XLVIII.

Gedruckt zu Nürnberg/ durch Johann vom Berg/ vnd Vlrich Newber.

Psalm. LXXXIX.

Wol dem Volck das jauchtzen kan.

Vorrede

Dem Ersamen/ vnd namhafften Johann Newdörffer/ deutscher Schulmeyster in Nürnberg/ Meinem sonder lieben freunde.

Der heylige Simeon/ da er zu Jerusalem im Tempel/ das kindlin Jesus in seinen armen hat/ weyssagt er/ Es werde nicht yederman diß kindlin annemen/ noch für seinen heyland haben/ sonder der meyste theyl/ werde jm widersprechen/ Vnd sein lere/ so die eynige rechte seligkeyt ist/ lestern/ vnnd alß Ketzerey verdammen/ Ob nun solches den Christen sehr werde wehe thun/ soll es doch dazu dienen/ das viler hertzen gedancken offenbar werden/ vnnd wir die leut recht erkennen lernen/ vnd durch falschen scheyn/ nicht betrogen werden.

Solche weyssagung gehet für vnnd für vnter den Christen/ Bald/ das liebe Euangelion sich lest hören/ ist es allenhalb vol zungen/ die ihm widersprechen/ vnd alß Ketzerey vnd verfürische lehr es verdammen/ Ja es ist an dem widersprechen nit gnug/ man nimbt auch das schwert in die faust/ vnd wil es mit gewalt dempffen. Werden derhalb die armen Christen mit zweyen schwerten geschlagen/ Das eine durchdringet jnen jr hertz/ Denn es ye einen grewlichen schmerzen geben muß/ das die welt so blind ist/ den gnedigen Gott im himel so lestert/ dem Teuffel so willig dienet/ dem wort/ da doch all jr seligkeyt anligt/ so bitter feynd/ vnnd der lügen/ dem ergsten seelengiff/ so vber alle massen zugethon vnnd hold ist/ Das ander schwert/ Nemlich/ die verfolgung/ mattet/ verwundet/ vnd würet den leyb/ Solches soll mit disem kind/ mit seim wort/ dem heyligen Euangelio/ vnd darnach mit allen Christen/ für vnd für practiciert vnd geübt werden. Was aber für ein ergetzlichkeit in yenem leben werde folgen/ wissen wir auß Gottes wort lautter vnd gewiß/ denn es wirt ein vberauß herrlich/ frölich/ vnd wonreychs

wort sein/ wenn der Son Gottes sagen wirt: Kombt her jr gesegneten meines Vatters/ ererbet das Reych/ das euch bereydet ist/ von anbegin der welt. Die hunde aber/ vnnd die Zauberer (wie inn der Offenbarung am 22. stehet) Vnd die Hurer/ vnd die Todschleger/ vnd die Abgöttischen/ vnd alle die lieb haben vnd thun die lügen/ werden hinunder müssen inn das hellische ffeuer/ vnnd ewige flammen/ Da wirt sich alß denn der rechte wechssel finden. Hie aber auff erden/ sagt Simeon/ sollen die Feynde des worts offenbar werden/ Das alle Christen ihnen in das hertz hinein sehen/ vnd gründlich sie vrtheylen können/ wer sie sind/ wie sie leben vnd sterben/ vnd was für ein vrtheyl sie für Gott in ewigkeyt tragen müssen/ Solchs ist nicht ein geringest/ damit die Christen inn der verfolgung sich mögen trösten. Wir haben in deutschen land nun ein lange zeyt das widersprechen/ starck hören vnd dulden müssen/ Yetzundt kombt das schwert mit gewalt dazu/ das der Antichrist zu Rom/ mit seim Anhang vnser kirchen gar will tilgen/ vnd verwüsten/ vnd durch sein Antichristisch Conciliabel zu Trient/ alle abgötterey vnd lügen wider anrichten. Solches fürnemen/ schmucken sie zierlich vnnd fein/ vnd ist gewiß/ wer ihren worten will glauben, der ist schon betrogen. Denn anderst hörest nicht von jnen/ denn das sie die strittigen Religion/ vergleychen/ eynigkeyt anrichten/ vnd die Scheflein in den rechten stalt bringen wollen. Vnd kan wol sein/ das ir vil/ so zu solchem blutdürstigen fürnemen helffen/ ires wandels vnd lebens halb fromm sind/ Aber was saget Simeon/ bald du das widersprechen hörest/ das sie des Herrn Christi wort nicht wollen leyden/ noch war lassen sein/ so frag nicht weyter/ ir hertz stehet dir so glatt vnd gar offen/ alß hettest du es in deiner hand/ Kanst derhalb vrtheylen/ das es eytel Heucheley mit inen ist/ das der Teuffel ihnen im hertzen sitzt/ sie treybet vnd füret/ Vnd in summa/ das sie gar des Teuffels sind/ wie sie stehen vnd gehen/ vnangesehen ires ampts/ stands/ wandels/ zucht/ vnd was sonst mehr für tugend an inen mögen gerhümet werden. Denn das Euangelion verfolgen, den Son Gottes nicht allein für vnsern erlöser halten/ Andere mittel der seligkeyt den leuten fürhalten/ vnd suchen/ Abgötterey verteydigen rc. solches ist ein sünde, die nicht allein hie auff erden mit allerley plagen/ sonder in yener welt/ mit dem hellischen ewigen ffeuer/ muß gestraffet werden. Da sehen wir/ die wir sonst des Creutzes/ vnd der verfolgung halben/ kleinmütig vnnd verzagt sind/ was für einen grossen treffenlichen vortheyhl/ wir für der welt haben/ ob gleich die selb mit gewalt/ ehren/ gut/ vnd anders vns vberlegen ist. Sollen derhalb dem genedigen Gott im Hymel/ nicht vndanckbar für solche gnade sein/ vnd sonderlich weyl die welt/ mit

dem widersprechen nicht will ablassen/ sonder noch das schwert dazu in die faust nimbt/ sollen wir beden/ dem Teuffel vnnd der welt zu trotz/ Vnnd darnach dem Son Gottes zu ehren/ vnnd vnseren nachkommen zu nutz/ mit dem bekentniß in alle weg/ so vns müglich/ getrewlich und fleyssig anhalten/ vnd vnserere rechte Christenliche lehr/ auff alle weyse zu pflantzen/ vnd erweytern versuchen. Sonderlich aber sollen wir auff das junge volck sehen/ das es inn zeyt zu Gottes wort gehalten/ vnnd trewlich damit vnterrichtet werde. Solche vrsach hat mich bewegt/ dise kurtze Euangelien Summaria/ so ich für meine kindlein zuschreyben newlich angefangen/ yetzt diser zeyt/ da ich schwachheytt halb/ mein ampt in der Kirch/ nicht hab selb verwalten können/ gar zuuerfertigen/ vnnd der jugend zu gut inn druck zu geben/ auff das/ wer lust dazu hat/ meiner arbeyt möchte geniessen/ ob ich gleych stetter kranckheytt halb/ das predigampt hab müssen anstehen lassen. Ich hab aber günstiger vnnd lieber Newdörffer/ euch vnd ewer schule/ damit verehren wöllen/ weyl ir/ alß ein Christlicher trewer Schulmeyster/ ewr gesindlin sonderlich fleyssig zu Gottes wort haltet/ das ich nicht allein zu solchem gutem werck euch hülffe/ sonder durch ewr Exempel/ auch andere deutsche vnnd lateynische Schulmeyster/ reytzete/ ewrem Exempel nach/ hie vnd an andern orten/ die jugend fleyssig zu Gottes wort zu halten. Denn da müssen wir anheben/ so wir anders Christliche lehr erhalten/ vnnd Gottes namen heyiligen/ Ja auch fromme/ gefölgige/ züchtige/ vnd glückselige Kinder haben wöllen. Bey den Papisten soll diß klein Büchlein/ so vnansehnlich es ist/ sein frucht auch reychlich mit bringen/ das es zum ewigen zeuckniß/ sampt andern der vnsern schrifftten offentlich da stehen sol/ das sie vnd yederman sehen/ was doch mangels an vnser lehr sey/ die sie bißher mit lesern so hart angefochten/ vnd yetzundt mit dem schwert gar zu tilgen sich vnterfangen haben. Aber sie sollens nicht enden/ Dise lehr/ soll vnd muß bleyben/ Sie aber/ wenn sie es nit wöllen leyden/ müssen drüber zu grund gehen/ vnd soll sie kein macht noch herrligkeytt helffen. Der Allmechtige/ wölle euch/ vnd alle fromme Christen/ sonderlich zu diser kömmerlichen zeyt/ gnedig erhalten vnd behüten/ Amen.

Geschriben den andern September/ in meiner studier vnd siech stube.

Anno 1546

E. W.

Vitus Dietrich

Am ersten Sonntag des Aduents/ wie Christus zu Jerusalem auff ein Esel einreytet/ Euang. Matth. 21.

Auß dem Propheten Zacharia, 9.

DU tochter Zion/ frewe dich sehr/ Vnd du tochter Jerusalem jauchtze. Sihe dein König kombt zu dir/ ein gerechter vnd ein helffer/ Arm/ vnd reytet auff einem Esel/ vnd auff ein Füllen der Eselin.

Diser spruch lehret/ was wir von dem herren Christo sollen glauben/ vnnd wie wir sein sollen geniessen/ EWr ist ein König/ das ist/ er will ein volck vnnd Regiment haben auff erden. Aber nicht wie andere welt König/ die herrlich prangen/ vnd mechtig sind/ Denn diser König Christus/ ist für der welt arm/ wie man auch an dem mercket/ das er nur auff einem entlehneten Esel einreytet/ da er zu Jerusalem/ alß ein König sich will sehen lassen/ Das aber ist sein herrligkeyt/ das er gerecht ist/ vnd von sünden allen den wil helffen/ so jn für einen König annemen/ vnd an in glauben/ Vnd das er ein helffer ist/ der von dem ewigen todt erlösen will/ Wie er denn solch vrsach halb/ das vns von sünd/ vnd todt geholffen würde/ am Creutz sich auffgeopfferet hat/ vnd gestorben ist/ Solches Königes sollen wir vns frewen/ vnd jn mit hertzen annemen/ vber jm jauchtzen/ vnd guter ding sein/ vnnd Gott für solche gnad dancken/ wie der Prophet saget.

Gebet

HErr Gott himlischer Vatter/ wir dancken dir ye billich/ vnd loben/ vnd preysen dich inn ewigkeyt/ das du vns armen menschen/ so wir der sünden halb/ vnter des todtes vnnd Sathans Tyranny haben müssen sein/ deinen Son zu einem König gesetzet hast/ der ein gerechter König vnd Heyland sein/ das ist/ vns von vnsern sünden/ durch seinen todt ledig machen/ vnnd wider den todt retten vnd helffen soll/ Wir bitten dich auch/ du wöllest durch deinen heyligen Geyste vns erleuchten, regieren vnnd füren/ das wir an disen gerechten König vnd Heyland vns alleine halten/ vnd an seiner armen gestalt vnd verachtetem wort vns nit/ wie die welt/ ergern/ vnd also durch ein festes vertrauen auff jn/ ewig selig werden/ AMEN.

Am andern Sonntag des Aduents/ was für zeychen vor dem Jüngsten tag kommen/ vnd wie die Chris-

ten dazu sich schicken sollen/ Luce am 22.

HUtet euch/ das ewre hertzen nit beschweret werden/ mit fressen vnd mit sauffen/ vnd sorgen für die Narung/ vnnd komme diser tag schnell vber euch. Denn wie ein fallstrick wirdt er kommen/ vber alle die auff erden wohnen/ So seydt nun wacker alle zeyt/ vnnd bettet/ das jr wirdig werden möget/ zu empfliehen disem allem/ vnnd zu stehen für des menschen Son.

VNser HERr Christus/ weissaget erstlich/ wie ein jüngster tag komen/himel vnd erden zergehen/ vnd was für zeychen vor her gehen werden/ Vnd tröstet darnach seine Christen/ sie sollen vor solchem tag nit erschrecken/ Denn alß denn sollen sie erlöset werden/ von der sünde/ der welt/ vnd des leydigen Teuffels anfechtung vnd allem vbel/ vnd soll ewige seligkeyt folgen. Item er warnet/ wie wir auff solchen tag vns sollen schicken. Nemlich das wir nicht sicher sein/ vns mit fressen vnd sauffen nicht beladen/ sonder wacker/ munder vnd nüchtern sollen sein/ vnd ymmerdar inn Gottes forcht leben/ vnnd für sünden vns hütten/ vnnd alß denn mit dem Gebet auch anhalten/ das Gott durch seinen heyligen Geyst vns regieren/ vnd für sünden vnd aller anfechtung bewaren wölle/ Wer solches thut/ den soll diser tag nicht vbereylen/ es soll jm ein tag der erlösung sein/ vnnd ein anfang des ewigen lebens.

Gebet

HERR Gott hymlicher Vatter/ der du duch deinen Son vnns hast offenbaret/ wie Hymel vnd erden zergehn/ vnser leybe wider aufferstehen/ vnd wir alle für Gericht sollen gestellet werden/ Wir bitten dich/ du wöllest durch deinen heiligen geyst vns in deinem wort/ vnd rechtem glauben erhalten/ für sünden genedig behüten/ vnd in aller anfechtung erhalten/ das wir vnser hertzen mit fressen vnd sauffen/ vnd sorgen der Narung nicht beschweren/ sonder allzeyt wacker sein/ vnd beten/ vnd in gewiser zuuersicht deiner gnad/ der zukunfft deines Sons mit frewden erwarten/ vnd durch jn ewig selig werden/ Amen.

Am dritten Sonntag des Aduents/ Wie Johannes seine Jüngern zu Christo schicket/ MATth. 11.

CHRistus sprach zu Johannis jüngern/ Die Blinden sehen,/ die Lahmen gehen/ die Außsetzigen werden reyn/ vnd die Tauben hören/ vnd die todten

stehen auff/ vnnd den armen wirdt das Euangelion gepredigt/ Vnd selig ist der sich an mir nit ergert.

DIB ist auch ein lehr/ vom Ampt vnsern lieben Herren Christi/ das wir lernen sollen/ wozu wir sein bedürffen/ vnd wie wir sein geniessen sollen./ Nemlich/ das er darumb auff erden kombe/ das er vns menschen helffen will/ wider den Sathan/ vnd alles vnglück wenden/ so durch die sünde auff vns kommen ist/ Derhalben sollen wir inn allem vnglück bey dem Herrn Christo hilffe suchen/ vnd hoffen/ Vnd sonderlich sein wort/ das heylig Euangelion mit hertzen annemen vnd glauben/ Denn durch das selbe/ werden wir von sünden ledig/ vnd kommen zum ewigen leben. Darumb ist solches die höchste vnd gröste wolthat/ vnnd das herrlichste wunderwerck/ das er den armen das Euangelion prediget/ das ist/ die jre sünde sehen vnd fülen/ vnd lassen ins hertzlich leyd sein/ Dise tröstet Christus/ sie sollen zu friden sein/ er wölle für die sünde bezalen/ vnnd sie dauon ledig machen. Solche zusagung nimme mit glauben an/ vnd ergere dich an Christo nicht/ das ist/ zweyffele an solcher zusagung nicht/ so bist du selig. Wer aber zweifflet/ vnd sich an Christo ergert/ der wirdt nicht selig.

Gebet

HErr Got hymlicher Vatter/ der du deinen Son vnsern Herrn JESum Christum mensch werden/ vnd darumb inn dise welt hast kommen lassen/ das er des Teuffels Tyranny wehren/ vns armen menschen wider sünd vnd tod helffen/ vnd ewig soll selig machen/ Wir bitten dich/ du wöllest mit deinem heiligen Geist/ vnser hertzen also füren vnd leyten/ das wir auff anders nichts/ denn auff sein wort sehen/ vnd also allem ergernuß/ da vnser vernunft vnns auffweyset/ empfliehen/ vnnd vnter dem heufflein mögen gefunden werden/ welcher sich an deinem Son Christo Jesu nicht ergert/ sonder durch in selig wirdt/ Amen.

Am vierdten Sontag des Aduents/ wie die Juden von Jerusalem zu Johanne schicken/ vnd ihm das tauffen verbieten wöllen/ Johannis am 1.

JOhannes sprach: Ich tauffe mit wasser/ Aber er (Christus) ist mitten vnter euch getreten/ den jr nicht kennet/ Der ists/ der nach mir kommen wirdt/ welcher vor mir gewesen ist/ des ich nicht werd bin/ das ich seine schuchryemen auflöse.

Dise Predig Johannis des Tauffers/ lehret/ wie wir den Herren Christum seines amts vnd person halben/ sollen vnterscheiden/ von allen andern menschen/ Johannes der tauffer/ die Aposteln/ vnd alle Kirchendiener/ tauffen nur mit wasser/ Das ist/ ob wol der heylig Geyst/ durch solches wassertauffen den leuten geben wirt/ so geben doch sie nit mehr denn das wasser/ den Geyst können sie nit geben/ Aber vnser lieber Herr Christus/ der verdienet vns durch den gehorsam/ welchen er seinem Vatter leystet/ den heyligen Geyst/ vnnnd ist der Herr vber solche gaben/ das er sie außtheylet nach seinem willen/ allen die sich in seinem todt lassen tauffen/ vnd sein wort mit glauben annemen. Darumb so lerne es bedes/ Wir menschen können den heyligen Geyst niemandts geben/ Christus allein kan in geben/ Er will jn aber durch der menschen ampt geben/ Wenn menschen das Euangelion predigen/ wenn sie tauffen/ wenn sie das Nachtmal außspenden/ durch solche menschen werck/ will Christus den heyligen Geyst geben/ Derhalb soll yederman die predigt des Euangelii/ die heylige Tauff/ das gnadenreyche Abendmal des Herrn suchen vnd brauchen/ Vnnnd alß denn durch Christum/ die gabe des heyligen Geystes hoffen/ vnd jn auch darumb bitten.

Gebet.

HErr Gott himlischer Vatter/ wir dancken dir ye billich/ das du die selige gnadenreyche Tauf/ durch den heyligen Tauffer Johannem hast erstlich angerichtet/ vnnnd vns auch dazu lassen kommen/ In welcher du vns vmb deines Suns Christi Jesu willen zusagest vergebung der sünden/ den heyligen Geyst/ vnd das ewige leben/ Wir bitten dich/ erhalte vns inn solchem vertrauen auff dein gnad vnd barmhertzigkeit/ das wir an solcher zusagung nimmer mehr zweyffelen/ sonder der selben inn allerley anfechtung vns trösten/ Vnd gib durch deinen heyligen Geyst/ das wir für sünden vns hüten/ vnnnd in solcher vnschuld/ dazu wir durch die Tauffe kommen sind/ bleyben mögen/ Oder ja wo wir fallen/ vnnnd menschlicher schwachheytt halb nicht können bestehen/ das wir inn sünden nicht ligen bleyben/ sonder durch rechtschaffene Buß vns bekeren/ vnnnd deiner gnad vnnnd zusagung/ vns wider trösten/ vnd also durch dein genad ewig selig werden/ AMEN.

Am heyligen Christage/ von der geburt Christi/ Luce am 2.

DER Engel sprach zu dem hirten/ Fürchtet euch nit/ Sihe/ ich verkündige euch ein grosse freude/ die allem volck widerfaren wirdt. Denn euch ist

heut geborn der Heyland/ welcher ist Christus der Herr/ in der stadt Daud.

Dise Engelpredigt lehret vns/ wie wir von der geburt/ vnsers lieben Herrn Christi halten/ vnd vns dagegen stellen sollen. Er heist die Hirten frölich sein/ vnnd sich gar nichts fürchten/ vnd sagt des vrsach/ Darumb das der heyland geborn sey/ der helffen vnnd retten soll/ nicht wie weltliche König/ wider zeytliches vnglück/ sonder wider die sünde/ den tod vnd alles vnglück/ so auß der sünden herfleust. Denn solches zeuget das wörtlein Christus/ das dises kind der gesalbte Gottes sey/ dauon Gott im Paradiß verheysen hat/ Er soll der Schlangen den kopff zertretten/ vnd dem Sathan alle seine macht vnd gewalt nemen. Darumb sollen wir dises kindlins vns auch von hertzen frewen/ vnnd mit den Engeln singen: Ehr sey Gott in der höhe/ vnnd fride auff erden/ Vnnd/ den menschen ein hertzliche freud vnd wolgefallen. Denn wir sollen Gott von hertzen darumb loben vnnd dancken/ der durch dises kind aff erden frid gemacht/ vns mit Gott versünet/ Vnnd des Sathans Tyranny gewehret hat/ Sollen derhalb frölich sein vnd guter ding/ vnd an disen trost in allem vnglück vns halten.

Gebet.

HErr Gott himlischer Vatter/ wir dancken dir deiner grossen gnad vnd barmhertzigkeit/ das du deinen eingebornen Sun inn vnser fleisch kommen/ vnd durch jn/ vns von sünden vnd dem ewigen tod/ genediglich hast helffen lassen/ Vnd bitten dich/ erleuchte vnser hertzen/ durch deinen heyligen Geyst/ das wir für solche deine genad dir danckbar sind/ vnnd der selben vns in allerley not vnnd anfechtung trösten/ vnd also durch deinen Sun/ vnseren Herren Jhesum Christum/ ewig selig werden/ AMEN.

An Sanct Steffans tag/ in den geschichten/ wie er vmb des Herrn Christi willen/ von Juden ist gesteyniget worden/ Acto. 7.

Die Juden steynigeten Steffanum/ Er aber betet vnd sprach: Herr Jesu/ nimm meinen Geyst auff/ er knyet aber nider/ vnnd schrey laut/ Herr behalt jn dise sünde nicht/ vnd alß er das gesagt/ entschieff er.

WIR haben inn ettlichen Predigten nacheinander gehört/ vom ampt vnsers Herren Christi, vnnd wie wir sein sollen geniessen/ NEmlich/ das wir durch jn vergebung der sünden/ den heyligen Geyst/ vnd ewiges leben sollen haben. In diser Histori aber/ vom heyligen Steffano/ sehen wir ein Exempel/

wie es vns inn der welt gehen soll/ wenn wir an Christum recht glauben vnd jn bekennen/ NEmlich/ das wir vns leyden/ vnnd allerley vnglück gewarten müssen/ Denn die welt/ vnd ir Herr der Teuffel/ kan solchen glauben an Christum nicht leyden/ setzt derhalb den Christen zu/ biß er sie gar vmbbringet/ Da sollen wir vns des heyligen Steffans Exempel trösten/ vnnd dran lernen/ das wir/ wo es vns der gleychen begegnet/ alles gern leyden/ vnd yederman von hertzen vergeben sollen/ Denn das ein Christ stirbet ist nichts böses/ weyl vnsers Herren Christi wort da stehet/ vnd spricht: Wer an mich glaubet/ wirdt den todt nicht sehen ewiglich/ Vnd ob er schon stirbet/ wirdt er doch wider leben. Derhalb ist Steffanus seiner person halb wol zu friden/ er befilhet seinen Geyst dem Herren Christo/ vnd weyß das er in ewigkeyt bewaret ist/ Allein ist es ihm zuthun/ vmb die blinden verfolger/ die wolt er auch gern from vnd selig sehen/ Solchs sollen wir lernen/ vnnd in der anfechtung auch so fein gedultig sein/ glauben vnd lieben.

Gebet

HErr Gott himlischer Vatter/ der du den heiligen Steffanum seins glaubens halb leyden vnd steynigen hast lassen/ vns damit anzuzeigen das dein reich nit von diser welt sey/ sonder in ein anders leben gehöre/ Wir biten dich/ wo wir vmb deines worts vnd namens willen auch müssen leiden/ sterck vnser hertzen durch deinen heiligen geist/ das wir fest bestehn/ vnd vns mit deiner gnad/ vnd den ewigen gütern/ an stat der zeitlichen trösten mögen/ Amen.

Am Sonntag nach Weyhenachten/ wie Simeon im Tempel Marien vnnd das Kindlin Jesus segnet/ vnd von Christo weyßsaget/ Luce am 2.

Simeon sprach zu Maria der Mutter Jesu: Sihe/ diser wirt gesetzt zu eim fall/ vnd aufferstehung viler in Israel/ vnd zu eim zeychen dem widersprochen wirt/ Vnd es wirdt ein schwert durch sein Seele dringen/ auff das viler hertzen gedancken offenbaret werden.

Diß ist ein weyssagung/ wie es vnserm Herrn Christo/ vnd hernach dem heyligen Euangelio/ vnd allen Christen in der welt ergehn sol. Nemlich/ das nit alle Christum annemen/ noch durch jn selig werden/ sonder an jm sich ergern vnd fallen werden/ vnnd das/ was inn der Welt/ herrlich/ mechtig/ vnnd groß ist/ jm widersprechen/ das Euangelion für Ketzerey halten/ es lestern vnnd schenden werde. Solches thut den Christen hertzlich wehe/ vnd

ist gleich wie ein Schwert/ welches das hertz durchschneytet. Aber es dienet dennoch zu etwas/ Nemlich/ das die hertzen dadurch offenbaret werden. Denn da sonst die leut sich schmucken/ vnnnd für die besten/ frümbsten Christen köndten verkauffen/ geben sie sich durch verfolgung des worts an tag/ das yederman sehen vnnnd bekennen muß/ der Teuffel so ein Mörder ist/ sitze jnen im hertzen drinn/ vnd das es nur eytel heucheley mit jnen sey/ sintemal sie das Euangelion/ nicht dulden noch leyden mögen.

Gebet

HErr Gott himlischer Vatter/ der du durch den heyligen Simeon hast weyß-gesaget/ wie Christus dein Sun zum fall vnnnd aufferstehung viler in Israel gesetzt sey/ wir bitten dich/ erleuchte vnsere hertzen/ durch deinen heyligen Geist/ das wir deinen Sun Christum Jhesum recht erkennen/ vnnnd vns in allerley not vnnnd fahr/ an jn halten/ vnd an jm auffstehen/ vnd nicht mit der sichern blinden welt vns an jn stossen/ auch in allerley leyden vnnnd anfechtung/ so deines worts vnnnd bekentnuß halb vns begegnet/ getröst vnnnd mü-tig sein/ sintemal gewiß ist/ das die/ so dein wort verfolgen/ zu deinem Reych nicht gehören/ Die aber dran glauben vnd dabey bleyben/ ewig selig werden/ AMEN.

Am newen Jarstag/ wie das Kindlin beschnitten/ vnd Jesus ist genennet worden/ Luc. 2.

``Da acht tage vmb waren/ das das Kind beschnitten wurde/ da ward sein Nam genennet Jesus/ welcher genennet war/ ehe denn er in Mutter leyb empfangen war.``

WAs des Herren Christi ampt sey/ vnnnd warumb er mensch worden/ vnnnd auff erden kommen sey/ haben wir gehöret/ Im heutigen Euangelio aber stehet von seinem namen/ das/ ehe er in Mutter leyb ist empfangen worden/ der Engel auß Gottes befehls jm den namen geben hat/ er soll Jesus heysen. Solchen namen legt der Engel selb auß/ Matth 1. Vnd sagt: Er soll Jesus heissen/ Denn er wirt sein ovlck selig machen von jren sünden/ Hilfft er aber von sünden/ so hilfft er auch vom tod/ vnd gibt das ewige leben/ Denn wo keine sünde ist/ da kan auch kein todt sein. So lerne nun dises Kindlins recht brauchen/ vnd dich sein trösten. Engsten dich dein sünde/ Fürchtest du dich fur dem todt/ wo wilt du anders wohin/ denn zu disem Jesu/ der darumb den namen hat/ das er von sünden/ seinem volck/ das ist/ allen so jn für jren Herrn annemen vnnnd bekennen/ helffen will? Wie er auch im werck

heut beweyset/ das er sich lest beschneyden/ so er doch ein Herr vber das Gesetz war/ Aber er gibt sich darumb mit der beschneydung vnter das Gesetz/ das er vns vom fluch des Gesetzes will ledig/ vnd also von sünden frey machen. Des sollen wir dem gnedigen Gott von hertzen dancken/ vnnd widerumb seines willens vns fleissen/ vnnd für sünden vnd vngehorsam hüten.

Gebet

HErr Gott himlischer Vatter/ wir dancken dir für dein Väterliche gnad/ das du der armen sünder dich angenommen/ vnd deinen Sun/ vns zu gut/ vnter das gesetz hast gethan/ auff das er durch seinen vollkommen gehorsam/ deinen zorn stillete/ vnnd vnsern vngehorsam heylete/ Wir bitten dich/ du wöllest durch deinen heyligen Geyst/ vnser hertzen also erleuchten/ das wir solches gehorsams vns wider vnser sünde vnnd böses gewissen trösten/ vnd durch hilff deines heyligen Geystes/ auch anfahen gehorsame kinder zu sein/ vnd endlich durch Christum selig werden. Amen.

Am Sonntag zwischen dem Newen jar vnd Obers- ten/ wie Christus am Jordan von Johannes ist ge- tauffet worden/ Matth. 3.

DA JEsus getauffet war/ steyg er bald herauff auß dem wasser/ Vnd sihe/ da thet sich der Himel auff vber jm/ vnd Johannes sahe den Geyst Gottes/ gleych als ein Taube herab faren/ vnd vber jhn kommen/ Vnd sihe ein stimm vom Himel herab sprach: Das ist mein lieber Sun/ an dem ich wolgefallen hab.

DAS vnser lieber Herr Christus/ selb sich von Johanne im Jordan lest tauffen/ solches geschicht erstlich/ das (wie er sagt) er alle gerechtigkeit erfülle/ das ist/ das er nichts dahinden lasse/ das da gehört zu vnser gerechtigkeit/ Denn weyl Gott durch Johannem die tauff geordnet hette/ für die armen sünder/ sie damit zu trösten/ Gott wölte ihnen gnedig sein/ kombt vnser lieber Herr Christus als ein armer sünder/ denn er war Gottes Lamb/ das der gantzen welt sünde auff sich trüge/ vnnd begerte der heyligen Tauff auch/ vnd Johannes tauffet jn auch/ vnd geschicht/ das der heylig Geyst auff den Herren Christum sitzet/ in gestalt einer Tauben/ vnnd Gott von himel herunder lest sich hören/ vnnd spricht: Das ist mein lieber Sun/ da ich hertzliche freud an hab/ Solches ist nun vnser sonderlicher trost/ weil Christus vnser sünde tregt das wir sehen/ das Gott vnser sünden halb jm nit vngnedig

ist/ sonder vns durch jn zu genaden annimbt/ wenn anders wir vns in seim namen tauffen lassen/ vnd seiner zusagung glauben. Zum andern/ sollen wir lernen die Tauff hoch halten/ sintemal sie der Sun Gottes selb mit seim leyb geheyligt/ vnnd die gantze Gottheit sich da sichtigklich offenbaret hat/ als bey eim solchem werck/ da Gott nicht anders denn gnedig bey könne sein.

Gebet.

HErr Gott himlischer Vatter/ der du dich mit dein heyligen Geyst/ inn allen genaden bey der Tauffe deines lieben Suns/ der vnser aller sünde auff sich geladen/ hast offenbaret/ vnnd vns mit deiner stimm zu jm gewisen/ das wir durch ihn vergebung der sünde/ vnd alle gnad haben sollen/ Wir bitten dich/ erhalt vns in solcher zuuersicht/ vnd weil wir nach dem befelh vnd Exempel deines Suns auch getauffet sind/ Stercke vnsern glauben durch deinen heiligen Geist/ vnd hilff vns zum ewigen leben. AMEN.

Am Oberstag/ Wie die weisen auß dem morgenland gehn Hierusalem kommen/ vnnd nach dem newgebornen kindlin fragen/ Luc. 2.

Die weisen kamen von dem morgenland geen Hierusalem vnnd sprachen/ wo ist der Newgeborn könig/ der Juden/ wir haben seinen stern gesehen im Morgenland/ vnnd sind kommen jn anzubeten.

GLEich wie der heylig Simeon im Euangelio des negst vergangnen Sontagß von dem kindlin weissaget/ wie es dazu gesetzt sey/ dz ettliche an jm auffstehen/ ettliche fallen sollen. Also sehen wir im heutigen Euangelio solcher weissagung zwey exempel/ die seer wunderberlich vnd schier dar vnglaublich sind/ Denn da sind erstlich die Juden/ welche die verheissung von Christo haben/ das er ir heiland/ jr könig/ vnnd Hertzog sein sol/ die wissen nicht allein/ wo Christus sol geborn werden/ Sonder leren es auch dise Helden/ Sey er geborn/ so werden sie ihn zu Bethlehem finden/ da sollen sie hin ziehen. Aber eben solches/ das sie wissen/ vnd andere lehren/ glauben sie selb nit/ das es war sey/ sonst solten ye der könig Herodes/ die hohen Priester/ vnd schriftgelerten/ entweder selb mit den weysen gehn Bethlehem gezogen sein/ oder zum wenigsten ettliche diener mitgeschickt haben/ die sachen zu erkunden. Aber sie thun es nicht/ halten es fur ein fabel/ gedennen so es war were/ sie solten es auch wissen/ als die so im weltlichen vnnd geistlichen ambt die höchsten waren/ es müsse jnen ein ewige schand

sein/ das sie es nicht solten wissen/ vnnnd die Heiden solten es wissen. Dise/
wie du sihest/ heben an zufallen/ durch hoffart vnd vn glauben/ das sie das
wort haben/ wöllten aber jm nicht folgen noch glauben.

Dagegen aber sind dise weysen noch Heiden/ vnnnd predigt inen nicht/ wie
den hirten auff dem felde ein engel/ Es predigt inen nicht Simeon noch An-
na/ fromme/ alte/ warhaffte leutlin. Ein summer stern leß sich am himel se-
hen/ auß dem selben lernen sie/ auß eingebung des heiligen Geistes/ wie der
Juden könig geborn sey/ auff dises blosses gesicht machen sie sich auff/ vnd
ziehen disem könig nach/ einen so weiten weg/ auß Persia biß mitten in Ju-
deam/ mit so grosser gefahr. Dise nu stehn an dem Herrn Christo auff/ vnd
glauben der göttlichen offenbarung. Da ist ferner wol zu mercken/ wie der
vn glaub/ so zum fall sich angehoben/ gestigen vnd ye lenger ye grösser
worden/ widerumb der glaub in den frommen Heiden auch gewachsen sey.

Denn da dise Heyden die offenbarung durch den stern annemen/ vnnnd dem
kindlin Jesu nach zihen/ ob sie es gleich zu Hierusalem nicht finden/ so fin-
den sie doch das zeugniß des Propheten Miche/ vnd lernen drauß/ das die
Juden von disem könig ein gewisse verheissung haben/ das er sol zu Bethle-
hem geborn werden. Darumb faren sie flugs fort auff Bethlehem zu, vnd
wie sie nahe hinbey kommen/ leßt der stern sich wider sehen/ da wurden sie
sehr fro/ vnnnd erkennen aller erst das sie nicht jrren/ noch vergebens vmb-
ziehen/ darnach da sie zu Bethlehem komen/ leßt der stern sich so gewaltig
herunder/ das er inen auch die thür vnd das hause weyset/ da Christus innen
ware. Sihe also wo man anhebt recht zu glauben/ wird der glaube immer ye
lenger ye gewisser/ Vnd folget/ das sie disen könig finden vnd sehen/ vnd
betten jn an/ nicht als ein weltkönig/ denn sie sehen wol/ das kein welt
pracht da war/ vnd westen auß Daniele/ der in jrem land sein weissagung/
geschriben hette/ Er wurde ein solcher könig sein/ der sünde vergeben/ vnd
ewige gerechtigkeit damit wurde bringen/ das er sich selv wurde in den tod
zum opffer geben. Nach solchem anbetten/ thun sie auch ire schetz auff/
vnnnd schencken jm gold/ weyrauch/ vnd myrrhen/ Vnd ziehen als denn wi-
der heim. Also sind nu dise Heyden am Herrn Christo aufferstandent/ haben
sich an jm nicht geergert/ sind derhalb durch jn selig worden.

Aber Herodes vnd die Juden/ bald sie anfangen Gottes wort zu verachten/
bleibt es nicht dabey/ Herodes vnd das gantze Hierusalem mit im/ spricht
Mattheus 1. erschrecken/ Warumb doch? ist doch das ir könig/ der in verge-
bung der sünde vnd ewige seligkeit sol bringen? Wie denn/ das sie sich sein

nicht frewen? Es ist den armen leuten darumb zu thun/ das jn ein zeitlicher fride lieber ist/ denn das ewige. Denn sie gedencken es werde nu an ein rauffen gehn/ der new könig werde das sein wöllen haben/ so werde es Herodes nicht gestatten/ da müsse es zum vnfrid geratten. Auff dise sünd/ die da sehr schwer ist/ folget ein andere/ die ist noch grösser/ dz sie gedencken diß kind vmbzubringen/ weil es noch klein vnd vnuermöglich sey/ Vnd sonderlich Herodes decket diß sein furnemen/ sagt die weysen sollen das kindlein suchen/ so wölle er auch komen vnnd es anbetten. Aber er redet mit einer wolffstimm/ vnd nicht mit einer menschen stimm/ denn anbetten heißt er mörden vnd würgen. Darumb feret er endtlich zu/ da er sihet/ das die weysen sein wolffssprach verstanden haben/ vnd würgen alle kindlin in/ vnd vmb Bethlehem/ die zwey ierig vnd drunder sind/ vnd helffen jm die hohen priester dazu. Also sind sie fur vnd fur ye lenger ye tieffer in den fall geraten/ vnd entlich in das ewige verdamniß kommen.

Solches sollen wir lernen vnd vns fur dem fall hüten/ vnd mit den fromen Heyden an Christo auffstehen. Denn vns ist auß Gottes gnaden⁷ der selige stern der auff Christum weyset/ vnd zu jm füret/ das heilige Euangelion/ zu diser zeit auch erschinen/ Den sollen wir nicht verachten/ wie die vnglaubigen Juden/ sonder im nachgehn/ vnd kein fahr fliehen noch mühe vnnd vnkost sparen/ so werden wir das kindlin Jesus sehen vnd finden/ vnd es anbetten/ das ist/ vnser hoffnung vnnd trost auff in setzen/ er werde vns selig/ vnd von sünden ledig machen.

Darnach weyl diß kindlin klein vnd arm ist/ sollen wir vnser schetze auch auff thun/ das ist/ wir sollen mit vnserm zeitlichen seggen da zu helffen/ das das kindlin möge erzogen werden vnd nicht allein arme leut vnser geniesen/ sonder wir vnser gut gern dahin geben/ das fleissige/ gelerte Kirchendiener/ erzogen vnd erhalten werden.

Ob es aber gleich nicht wird felen/ wir werden mit disen Heyden auch etwas des worts halben müssen leiden/ so will doch Gott bey vns sein/ vnd fur dem Herode warnen/ das wir im nicht in die hende kommen. Solche lehr vnnd trost sollen wir auß dem heutigen Euangelio mercken/ vnd an dem Herrn Christo mit den weysen aufferstehen zum ewigen leben/ Amen.

Gebet.

HErr Gott himlischer vatter/ der du dein liebes wort den rechten Stern/ der das kindlin Jesus zeyget/ vns hast lassen leuchten/ wir bitten dich/ gib dei-

nen heiligen Geist in vnser hertzen/ das wir ja solches liecht annemen/ vnd seligklich brauchen/ das wir/ wie die Weysen/ solchem Stern nach ziehen/ kein mühe noch fahr vns lassen schrecken/ sonder mit gantzem hertzen vns an deinen Sun Christum Jesum/ als den eynigen Heyland halten/ vnd vnser zeitliches auch dazu wenden/ das dein arme Christenheyt dadurch gebesert/ vnd deinen Sun Christo Jesu gedienet werde/Amen.

Am ersten Sonntag/ nach Obersten/ wie das Kindlin Jhesus zu Jerusalem bleybt/ vnd Maria jn im Tempel findet/ Luc. 2

Vnd es begab sich nach dreyen tagen/ funden Maria vnd Joseph das Kindlin Jesus im Tempel sitzen/ mitten vnter den Lehrern/ ds er jnen zuhörete/ vnd fragete.

DAs ist ein sehr feines Exempel/ welches junge leut mercken/ vnd im fleysig in ihr jugend/ vnd durch ir gantzes leben sollen folgen/ Das sie/ wie dz kindlin Jesus/ da es zwölff Jar alt war/ gern in der Kirche sein/ Gottes wort hören/ vnnd lernen sollen. Denn Gottes wort ist der eynige rechte Same/ da Gottes forcht vnnd allerley tugend herwachssen/ Vnd folget ferner/ das Gott solchen Kindlin glück vnd segen geben/ für kranckheyt vnnd allerley vnfall behütten/ vnnd erhalten will/ wie vom kindlin Jesu hie stehet: Er nam zu/ an Weyßheyt/ Alter/ vnd gnad bey Gott vnd den menschen. Da dagegen die kinder/ so der kirchen vnd Gottes wort nicht achten/ rochloß vnnd frech werden/ Menschen vnd Got wirt jnen feind/ Vnd ist weder glück noch heyl bey inen/ wie die Exempel vor augen sind/ Darumb lerne yderman sich fleysig zu Gottes wort/ vnd der kirche halten.

Gebet.

HERR Got himlischer Vater/ Ich dancke dir für deine gnad/ das du zur seligen Tauff vnd zum erkenntnuß deines göttlichen worts vnd willens mich hast lassen kommen/ Ich bitte dich/ gib deinen heyligen geyst in mein hertz/ das ich mich deines worts fleysige/ es nicht versaume noch verachte/ sonder wol mercke/ vnnd es in mir die rechte frucht schaffe/ das ich in deinem willen lebe/ im glauben vnd der forcht Gottes zuneme vnd wachse/ vnd endlich seligklich in deinem wort sterbe/ vnnd selig werde/ AMEN.

Am andern Sontag/ wie vnser Herr Jesus mit seiner Muter/ vnd seinen Jüngern auff einer Hochzeit/ zu Cana in Galilea gewesen ist

vnd da es an weyn gebrach/ liesse wasser auß dem brunnen schöpfen/ vnnd einschencken/ da war es der beste weyn/ Johannis am 2. Das ist das erste zeychen/ das Jesus thet/ vnd offenbaret seine Herrligkeyt/ vnd seine Jünger glaubten an in.

DAs vnser lieber Herr Christus auß wasser weyn machet/ solches wunderwerck ist ein starcke beweynung/ das er ein Herr vber die Creatur/ vnd ewiger Gott sey/ Denn etwas besser vnnd anders machen/ denn es von Gott erschaffen ist/ solches kan niemand denn Gott. Wir sollen aber solches wunderwercks vns trösten/ auff das/ wenn wir mangel an der narung/ am gesind/ oder anderm befinden/ wir derhalb nit verzagen/ sonder vns zum Herren Christo finden/ mit der hoffnung/ wie er hie auff der Hochzeit den mangel gewendet/ vnd auß wasser weyn gemacht hat/ das er der gleichen mit vns auch thun könne vnnd wölle/ sonderlich/ wenn wir jn drumb bitten. Denn es kostet jn schlecht ein wort oder einen gedanken/ so muß wasser wein werden/ kranckheytt muß zur gesundheyt werden/ Tod muß zum leben werden. In sonderheit aber/ sollen die Eheleut den trost haben/ wenn sie Gottselig vnd fromm sind/ vnd den Herren Christum/ zu sich auff die Hochzeit bitten/ er werde gnedig allen mangel/ vnd felh durch seinen seggen wenden.

[Gebet Für die/ so im Ehestand sind.](#)

HErr Gott himlischer Vatter/ ich dancke dir/ das du mir dein gnad geben/ vnd mich in den heyligen Ehestand kommen lassen/ vnd dadurch für sünden behütet hast/ Vnd bitte dich/ gib deinen heyligen Geyst/ der mich also drinn leyte vnd füre/ das ich mit meinem Ehegemahel eynig sein/ kein vrsach zu widerwillen vnnd zorn geben/ sonder ein freundliches/ Gottseliges leben führen möge/ Auff das ob gleich anfechtung nicht aussen wirt bleyben/ wir dennoch jmmerdar dein gnedige hilff vnd seggen spüren/ vnserer kindlein nach deinem willen erziehen/ vnd in aller Gottseligkeyt vnter einander leben/ vnd endlich durch deinen Sun Christum Jhesum ewig selig werden/ Amen.

Das junge gesind/ so im Ehestand noch nicht ist/ soll sein Gebet dahin richten/ das Gott/ wenn sie zu iaren kommen/ glück vnd segen zu diesem stand geben/ vnd in des für vnzucht gnedig behüten wölle.

Am dritten Sontag/ wie Christus einen aussetzigen reyn/ Vnd zu Capernaum des Hauptmans Knecht gesundt machet/ Matthei am 8.

DER Aussetzige sprach: Herr so du wilt/ kanst du mich wol reynigen/ Vnd Jesus strecket seine hand auß/ vnd rüret jn an/ vnd sprach: Ich wils thun/ sey gereyniget/ Vnd alß bald war er von seinem Aussatz reyn.

Dise zwey wunderzeychen/ lehren erstlich das vnser lieber Herr Christus geren helffen will/ vnd wol helffen kan/ wider allerley leibliche not/ sonderlich aber wider die sünde/ auß welcher aller jammer herfleust. Doch so fern/ das wir erstlich in vmb hilff bitten/ vnd zum andern/ das wir an solcher hilff nicht zweyfflen/ sonder im glauben fest vnd gewiß sind. Wie wir aber/ wenn es zeytliche not belanget/ betten sollen/ lernen wir fein am Aussetzigen/ der spricht: Herr so du wilt/ kanst du mich wol reynigen/ Denn ob wir wol keins weges sollen zweyffeln/ es drucke vns für not was da wolle/ Gott werde helffen/ so sollen doch wir vnsern willen/ in Gottes willen setzen/ Vnd so es Gott so haben wolt/ das Creutz gedultig leyden/ Solchen gehorsam sind wir Gott schuldig/ vnd Gott lest jm den selben sonderlich gefallen/ Wir müssen aber auch mit dem Hauptman alle hoffnung/ allein auff das wort vnser Herr Christi setzen/ alß das allmechtig ist/ vnd auß nichte alles gemacht hat.

Gebet.

HERR Gott himlischer Vater/ der du auß sonderlicher lieb vnd barmhertzigkeyt vns deinen Sun geben/ vnd für vns mensch werden/ vnd am Creutz hast sterben lassen/ Gib deinen heyligen Geyst in vnser hertzen/ das wir all vnser Vertrawen auff jn setzen/ vnd durch jn vergebung vnser sünde/ vnd ewiges leben ja so fest glauben alß der Hauptman hie glaubt/ er werde sein krancken Knecht mit eim wort helffen. Wir haben ye sein wort/ Wer an mich glaubt soll den todt nit sehen ewiglich/ Gibe nur/ lieber Vatter im himel/ das wirs mit vnzweyffelnichem hertzen glauben/ vnd an vnserm letzten ende fest dabey bleyben. Amen.

Am vierden Sontag/ wie der Herr Christus seine Jünger errettet/ in ein grossen vngewitter auff dem Meer/ Matth. 8.

ES erhüb sich ein groß vngestümb auff dem Meer/ Also das das schifflein mit wellen bedeket war/ Jesus aber schlieff/ vnd die jünger tratten zu jm/ wecketen jn auff/ vnnnd sprachen: Herr hilff vns/ wir verderben/ Er aber sagt zu jhn: Ir kleinglaubigen warumb seydt jhr so forchtsam/ Vnd er stund auff/ vnnnd bedrowete den wind/ vnd das meer/ da war es gantz still.

DIB ist ein tröstliche Histori/ da wir erstlich lernen/ wer mit Christo ins Schif will/ das ist/ wer Christum kennen/ vnd in seim Reych begert zu bleyben/ der muß sich einer vngestümme/ oder eines vngewitters erwegen/ Wie Paulus sagt: Wer inn Christo will Gottselig leben/ der muß verfolgung leyden. Da findets sich aber allweg/ das Christus schlefft/ das ist/ er stellet sich, alß wisse er nicht wie es vns gehe/ vnnnd gedencke nicht an vns/ Aber wir sollen/ wie die Jüngern hie/ zu Christo tretten/ vnd mit ernstem gebet jn auffwecken/ so will er mit seim allmechtigen wort Meer vnd wind stillen/ Das sollen wir gantzlich glauben/ Vnd derhalb/ ob die hilff sich ein zeytlang verzüge/ mit dem Gebet nicht ablassen/ Denn es heyst/ wer verharret biß ans ende/ der wirt selig.

Gebet

HErr Gott himlischer Vatter/ der du auß vätterlichem vnnnd gutem rath/ vns deine Kinder hie auff erden/ vnter das Creutz stellest/ vnnnd allerley vngewitter lest vber vns kommen/ der sünde damit zu wehren/ vnnnd vns im glauben/ hoffnung vnd gebet zu üben/ Wir bitten dich/ du wöllest dich vnser erbarmen/ vnser gebet in aller anfechtung vnnnd not hören/ vnd gnedige hilff schaffen/ auff das wir dein gnad vnd vätterlichen beystand erkennen/ vnd dich mit all deinen heyligen in ewigkeyt loben vnnnd preysen/ der du mit deinem Sun vnnnd heyligen Geyst/ allein der ewige almechtig Got bist/ AMEN.

Am fünften Sontag/ vom Feynd/ der vnkraut in den guten acker seet/ weyl die leut schlieffen/ Matthei am 13.

Das Himelreych ist gleych einem menschen/ der guten samen auff seinen acker seet/ Da aber die leute schlieffen/ kam sein feynd/ vnd seete vnkraut zwischen den Weytzen/ vnd gieng dauon.

DIß Euangelion ist ein nötige lehr wider das gemeyne ergernuß/ das auch vnter dem heufflein/ welchs Christen heyst/ so vil ergernuß vnnnd böser buben sind. Denn die welt/ wenn sie es sihet/ kan sie anders nicht vrtheylen/ denn solcher vnrat komme auß der lehr her/ Sie gedenckt/ wenn die lehr reyn vnnnd gut were/ so solten die leut wol frömmer sein/ Aber vnser lieber Herre Christus straffet solches vrtheyl/ vnnnd sagt: Das wort Gottes vnnnd Christliche lehr/ sey ein recht guter Same/ da anders nichts denn alles gutes könne außwachsen. Das aber in dem acker/ da diser gute same geseet ist/ vnkraut wechst/ vnnnd vnter dem heufflin/ so Gottes wort reyn vnnnd lautter hat/ vil böser buben sind/ solches spricht er/ ist des feyndes/ des Sathans schuld/ der lauret/ wie ein böser Bawer/ vnd wenn die leut schlaffen/ seet er vnkraut in den guten acker. Darumb soll yedermann wacker vnd mundter sein/ vnd fleyssig auff Gottes wort achtung haben/ vnnnd für dem feind sich hütten. Die aber schlaffen/ vnd sich in ergernuß lassen füren/ ob wol die selben hie auff erden der straff entlauffen/ müssen sie doch am Jüngsten tag her halten/ vnnnd ewiges vrtheyl darumb tragen.

Gebet.

HErr Gott himlischer Vatter/ wir dancken dir/ das du den guten Samen dein heyliges wort inn vnser hertzen hast außgeseet/ vnd bitten dich/ du wöllest durch dein heyligen Geyst/ solchen samen in vns lassen lebendig werden/ vnd frucht bringen/ vnd für dem bösen feind vns behüten/ das der nicht vnkraut mit einsee/ Behüt für sicherhey/ vnd erhalt in deiner forcht/ vnd hilf in aller anfechtung/ biß wir ewig selig werden/ AMEN.

**Das Gleychnuß von den arbeytern im Weinberg/
die vngleich arbeyten/ vnnnd doch gleichen lohn
empfangen/ Matth. 20.**

ALso werden die letzten die ersten/ vnnnd die ersten die letzten. Denn vil sindt beruffen/ aber wenig außerwelet.

Vnser lieber Herr Christus vergleichet das himelreich oder die Christliche Kirch einem Weyngarten/ da etliche vil/ etliche wenig stunde jnne arbeyten/ vnd doch gleychen lohn bekommen/ Denn ob wol alle Christen/ im Wein-

berg/ ein yeder seinem beruff nach/ arbeyten sollen/ vnd keins wegs müssig gehen/ so wil doch Got mit vns nicht nach vnserm verdienst noch arbeyt/ sonder nach seiner gnaden handeln. Aber da finden sich die Juden/ welche das Gesetz/ vnnd einen geordneten Gottesdienst hetten/ die wöllen einen vorteyl vor den Heyden haben/ vnd derdreust sie/ das Gott gnedig ist/ vnd die Heyden halten will wie sie/ Geschicht derhalb/ da sie hetten sonst können die ersten sein/ wo sie trewlich gearbeytet/ vnd an Gottes gnad sich gehalten hetten/ das sie die letzten werden/ vnnd in Gottes tieffe vngnad fallen. Denn Gott will nach gnaden mit vns menschen handeln/ vnnd nicht nach verdienst/ Solches sollen wir zu höchstem danck annemen/ vnd dennoch darumb nicht müssig gehen/ sonder vns in Gottes gehorsam/ vnnd willen nach bestem vermögen vben/ vnd doch allein auff sein genad sehen/ vnd der selben vns trösten.

Gebet.

HErr Got himlischer Vatter/ der du durch dein liebes wort/ vns in dein weingarten beruffen hast/ Wir bitten dich/ gib deinen heyligen Geist in vnser hertz/ das wir in solchem weingarten trewlich arbeyten/ für sunden vnd allem ergernuß vns hüten/ vnd deines worts vnd willens vns fleysigen/ vnnd alle hoffnung allein auff dein gnad/ so du vns durch deinen Son Christum Jesum reychlich erzeyget hast/ setzen/ vnd also ewig selig werden. AMEN.

Am Sonntag Sexagesima/ vom Samen der eins theyls an weg/ ein theyls auff das felsicht/ vnd ein teyls vnter die dorn fellet/ Luce am 8.

DER Same auff dem guten lande/ sind die das wort hören/ vnd behalten inn einem feinen gutten hertzen/ vnnd bringen frucht inn gedult.

MIt disem gleichnuß/ vom Same zeigt der Herr an/ was die vrsach sey/ dz Gottes wort nicht allenthalb frucht bringt/ Nemlich/ dz der mangel nit am wort/ sonder an dem hertzen/ vnd darnach am Sathan sey/ Etliche haben leichtfertige vnachsamen hertzen gegen das wort/ den mag der Teuffel leicht etwas in weg werffen/ so ist der predigt gar vergessen/ Etliche sind blöd vnd zart/ wöllen nichts vmb des worts willen leyden/ noch wagen/ Etliche lassen inen gelt vnd gut so sehr lieben/ das sie des worts nit warten mögen/ darumb bleibt die frucht bey solchen hertzen aussen. Aber wo die hertzen fein achtsam sind/ vnnd Gottes wort fleissig hören/ vnd gewenen sich zur

gedult/ das sie etwas leyden/ vnd lassen die weltsorg sich nit vberwachsen/
noch das hertz inen gar einnemen/ da wirt die rechte frucht/ Nemlich/ glaub
vnd lieb/ vnd darnach das ewige leben folgen. Darumb lerne ein yeder
Christ sich also gegen das wort schicken.

Gebet.

HErr Gott himlischer Vatter/ wir dancken dir/ das du dein liebes wort/ durch
deinen Son Christum Jesum vnter vns hast außgeseet/ Vnnd bitten dich/ du
wöllest durch dein heyiligen Geyst vnser hertzen dermassen zubereyten/
das wir solches wort mit fleyß hören/ vnd in eim feinen guten hertzen be-
halten/ vnd in gedult frucht bringen/ das wir der sünde nit nachhengen/ sie
durch dein hilff dempffen/ vnnd inn allerley verfolgung deiner gnad/ vnd
ewigen hilffe/ vns gewiß trösten vnd hoffen/ AMEN.

Am Fasznacht Sonntag/ wie Christus von seim ley- den weyssaget/ vnd einen Blinden sehen macht/ Luce am 18.

**VNser Herr Christus sprach: Des menschen Son wirdt vberantwortet
werden den Heyden/ Vnd er wirdt verspottet/ vnnd geschmehet/ vnd
verspeyet werden/ vnd sie werden jhn geysel vnd tödten/ vnd am drit-
ten tag/ wirdt er wider aufferstehen/ Aber seine Jünger vernamen der
keines.**

WARumb vnser lieber Herr Christus solches hab müssen leyden/ wissen wir/
Denn er hat darumb sich angenommen/ vnd ist darumb mensch worden/ das
er für aller welt sünde hat bezalen wollen. Darumb sollen wir erstlich vns
hie erinnern/ wie ein grewliche last es vmb die sünde sey/ vnd die selben
mit höchstem fleiß meyden/ sintemal niemand denn der Son Gottes/ durch
so ein hefftige marter/ vnd hefftigen todt dafür hat bezahlen können. Zum
andern/ sollen wir dises leydens vnd sterbens/ vns auch wider die sünde
trösten/ vnd nit zweyfflen/ obgleych wir den ewigen todt/ durch die sünde
verwircket haben/ das doch Gott vmb seines Sons willen gnedig sein/ vnd
die schuld an vns ferner nicht wölle fordern/ so durch Christum bezalet ist.
Zum dritten/ sollen wir vns auch drein ergeben/ vnnd nicht dran ergern/ ob
wir auch müssen mit leyden vnd mit sterben/ Denn der Jünger ist nit vber
seinen Meyster/ noch der Knecht vber seinen Herrn. Solches wusten die
Jüngern dazumal nit/ aber hernach lerneten sie es.

Das Christus den blinden sehend machet/ merck das wort: Dein glaub hat dir geholffen/ Denn wer vmb hilf den Herrn Christum anschreyet/ vnd glaubt/ dem soll hilff widerfahren.

Gebet.

HErr Got hilischer Vatter/ der du dem Blinden menschen/ durch deinen Son Christum Jesum gnediglich die augen geöffnet/ vnd das liecht hast sehen lassen/ Wir armen sünder bitten dich/ du völlest durch dein liebes wort vnser blinde hertzen erleuchten/ das wir dich durch Christum deinen Son/ der für vnns am Creutz gestorben/ vnd für vnser sünde bezalet hat/ recht lernen erkennen/ vnd in allen nöten vnd anfechtungen allein auff dein gnedige hilff vnd barmhertzigkeyt sehen/ die selbe durch ein glaubiges gebetsuchen/ vnd also trost vnd rettung wider Teuffel/ sünd/ vnd todt finden/ Amen.

Am ersten Sonntag in der Fasten/ wie Christus in der Wüsten vom Teuffel versucht wirt. Mat. 4.

DER versucher trat zum Herren Jesu/ vnd sprach: Bist du Gottes Son/ so sprich/ das dise stein brod werden. Aber er antwortet/ vnd sprach: Es stehet geschriben/ der mensche lebt nicht allein vom brod/ sonder von eim jeklichen wort/ das durch den Mund Gottes gehet.

Dise Histori/ wie Christus vom Teuffel versucht sey/ ist darumb geschriben/ das erstlich wir gewarnet würden/ vnd für sicherheyt vns hüteten/ Denn so der Sathan an dem Son Gottes selb sich hat dürffen versuchen/ wirdt er vnser nicht schonen/ das ist gewiß. Zum andern/ das wir auch lerneten/ wie allein durch Gottes wort/ wir vns wider den Sathan weren vnd auffhalten können. Nun sinds aber dise anfechtung/ damit der Sathan die Christen gemeiniglich plaget. Die erst/ wenn es jnen vbel geht/ treybt er dahin man soll verzweyffeln/ Gott hab vnser vergessen. Aber Christus lehret/ wir sollen Gottes genad nicht nach dem vrtheylen/ wie es vns hie auff erden gehet/ sonder nach seim wort/ vnnd wie er vnns zusaget durch Christum/ Denn allein im wort Gottes stehet das rechte leben/ vnnd sonst in nichte/ es heisse brod/ gelt/ gut/ ehr rc. Die ander anfechtung ist/ wenn der Sathan mit verzwyfflung den glauben nicht kan dempffen/ versucht ers/ ob er vns vermessen könn machen/ das wir mer glauben vnd wagen denn Gott befolhen hat/ Solchs saget der Herr hie/ heysse Gott versuchen/ vnd sey vnrecht. Die dritte/ das er durch gelt/ gut/ ehr/ vnd anders die hertzen vom wort auff Abgöt-

terey abfüret. Aber da sollen wir wissen/ das wir nit dem gelt/ noch der welt/ sonder allein Gott dienen/ vnd ihn allein anbeten sollen. Wer also mit dem wort wider des Sathans anfechtung sich wehret/ der siget/ vnd muß der Sathan ablassen. Ja die lieben Engel werden kommen/ retten/ trösten/ vnd dienen wo nit leyblich/ wie zu Christo/ doch geystlich vnd durchs wort.

Gebet.

HERR Gott himlischer Vater/ wir bitten dich/ weil der arge feind/ für vnd für vns nachschleichet/ vnnd wie ein brüllender Löwe vmbher gehet/ vnd suchet/ ob er vns köndte fressen/ Du wöllest vmb deines Sones Christi Jesu willen/ mit dem heyligen Geyst zu vns setzen/ vnnd durch dein wort vnser hertzen stercken/ auff das der feinde vns nicht obsiege/ vnnd wir in deiner gnade für vnnd für bleyben/ vnd endlich selig werden/ Amen.

Am anderen Sonntag inn der Fasten/ vom dem Heydnischen Frewlin/ des Tochter besessen war/ Matthei am 15.

VNser Herr JEsus sprach zu dem Heydnischen Freulin/ O Weyb dein glaub ist groß/ dir geschehe wie du wilt/ vnd jr Tochter war gesund zur selbigen stund.

DAs ist ein sehr fein Exempel/ wie wir im Gebet anhalten/ vnnd ymmer auff dem gedancken fest bleyben sollen/ Gott sey gnedig/ er werde alß ein Vatter sich vber vns/ seine kindlein erbarmen/ vnnd in allen nöthen helffen. Denn wie wir hie am Herren Christo sehen/ das er sich lang lest bitten/ vnd stellet sich alß wölle er nicht helffen/ Also widerferets vns auch/ das vns gedunckt/ es sey vmb sonst/ Gott wölle nicht hören/ vnd hindern vns sonderlich vnser sünd/ vnd das wir wissen/ wir haben es vmb Got nit verdient. Aber da können wir mehr nicht/ sollen auch mehr nicht thun/ denn das wir vns mit disem Heydnischen Freulin von hertzen bemütigen/ vnd sprechen: Es ist doch ye war/ das ich ein sündler/ vnd nicht werdt byn/ das Gott das oder yenes mir gebe/ Vnd dennoch weyl Gott gnedig vnd barmhertzig ist/ soll ich an seiner genad vnd güte nicht zweyfflen. Das es also beydes bey-samm stehe/ das wir vnser sünd halb für Gott vnns demütigen/ vnd vmb seiner barmhertzigkeyt willen/ die er in Christo Jesu vns bewisen hat/ glauben/ er werde vns nit verlassen. Diser glaub erlanget alles/ wie wir hie sehen/ da Christus spricht: Dein glaub ist groß/ dir geschehe wie du wilt.

Gebet.

HErr Got himlischer Vatter/ wir biten dich/ du wöllest durch deinen heyli-
gen Geyst/ den glauben vnnnd hoffnung auff dein gnad vnnnd barmhertzig-
keyt in vnserm hertzen fest vnd gewiß machen/ auff das/ ob wir gleich vn-
sers gewissens/ sünde/ vnd vnwürdigkeyt halb vrsach haben vnns zu förch-
ten/ wir dennoch an deiner genade/ wie das Cananeisch Weyblin/ fest han-
gen bleyben/ vnd durch Christum hilff vnnnd rettung in allerley anfechtung
vnd nöten bey dir finden/ Amen.

Am dritten Sonntag/ wie JESUS einen Teuffel auß- treibet/ der stumm war. Luce am 11.

**Vnser Herr Jesus sprach zu den vngläubigen Juden: So ich durch Got-
tes finger die Teuffel außtreibe/ so kombt ye das Reych Gottes zu euch.**

Mit disen worten lehret vnser lieber Herr Christus/ wie wir dises wun-
derwercks vns trösten/ vnd was wir drauß lernen sollen/ das er dem armen
stummen menschen hilfft/ vnd jn vom Teuffel ledig macht/ Nemlich/ dz wir
sollen wissen/ wie der gnedige Vater im Himel sich vnser not angenommen/
vnd hilff wider den Sathan vnd sein Tyranny/ vns durch seinen Sun gene-
diglich verschaffet hab/ auff dz/ wer disem Jesum Christum mit glauben
annimbt/ der soll für an in Gottes Reych sein/ vnnnd der Sathan soll jn nicht
mehr/ wie zuuor/ treyben vnd zwingen. Denn durch Christum empfangen
wir den heyiligen Geyst/ der hilfft vns wider den bösen feind streyten vnnnd
siegen/ welchen vnser lieber Herr Christus/ alß der stercker/ allgereyt vber-
wunden/ jm seinen harnisch außgezogen/ vnd seinen Christen den raub auß-
getheylet hat/ das sie solcher vberwindung auch geniessen sollen. Aber
gleych wie Christus vber solchem gnedigen werck sich muß lassen vrteylen
vnd lestern: Also geht es sein wort noch heutigs tages in der welt/ das manß
ein Teuffels lehr schillt vnd verdammet als ketzerey.

Gebet.

HErr Gott himlischer Vatter/ der du deinen Sun vnsern Herren Christum Je-
sum darumb hast lassen mensch werden/ das er des Teuffels Tyranny weh-
ren/ vnd vns menschen wider den argen feind/ schützen soll/ wir dancken
dir erstlich fürsolche gnedige hilff/ vnd bitten darnach du wöllest in allen
anfechtungen genedig zu vns setzen/ für sicherheynt vns behütten/ vnd in
deim wort vnd deiner forcht/ durch deinen heyiligen Geyst genedig erhalten/

auff das wir biß ans ende für dem bösen feinde befridet bleyben/ vnd durch deinen Sun ewig selig werden/ AMEN.

Am Sonntag zu Mitfasten wie der Herr Christus fünfftausent Man/...

... weyb vnd kind nicht mit gerechnet/ mit fünff brodten vnd zwen fischen speyset/ vnd zwölff körb vberblieben/ Johan. 6.

VNser Herr Jesus nam die brodt vnd dancket/ vnd gab sie den Jüngern. Die Jüngern aber/ denen die sich gelägert hetten/ Desselben gleichen auch von den Fischen/ wie vil er wolt.

DIß ist ein schöne tröstliche Histori/ das wir vns keinen mangel sollen anfechten lassen/ sonder nur allein dahin sehen/ das wir bey dem Herren Christo vnd seim wort bleiben/ Denn so wir das thun/ ob gleich mangel fürfelt/ so wissen wir/ das vnser Herr Christus die macht hat/ es sey so wenig für der hand alß immer wöll/ so gibt er doch dauon alß vil er will/ vnd muß durch seinen segen alles jm vnser den henden wachsen vnd zunemen. Wo nun er seinen segen also gibt/ da soll ferner folgen/ das man jn schon auffheben/ vnd nicht vnnützlich vmbbringen soll/ wie er hie befilht/ das man die vbrigen brfocken soll auffheben. Darumb lerne yedermann diser Histori sich trösten/ vnd für dem geytz hüten/ Der selbe sihet nur nach dem grossen hauffen/ Ein Christ aber soll nach Gottes wort vnd dem Herren Christo sehen/ vnd alß denn hoffen er habe einen reychen Gott im himel/ der werde jn nicht lassen not leyden.

Gebet.

HErr Gott himlischer Vatter/ der du durch deinen Sun in der wüsten fünfftausent Mann/ weyb vnd kindd nit mitgerechnet/ nur mit fünff brodt vnd zwen fischen/ reychlich/ gespeyset hast/ wir bitten dich/ sey mit deinem segen auch gnedig bey vns/ behüte für dem geytz vnd sorgen der narung/ das wir dein Reych vnd dein gerechtigkeit am ersten suchen/ vnd deine milte Väterliche güte in allem/ was wir zu leyb vnd seel bedürffen/ gnediglich spüren durch Jesum Christum vnsern Herren/ AMEN.

Am Sonntag nach Mitfasten/ Johannis am 8.

Vnser Herr Jesus sprach: Warlich warlich ich sage euch/ so yemand mein wort wirdt halten/ der wirdt den todt nicht sehen ewiglich.

DAs ist ein treffenliche/ nütze/ vnnd nötige/ aber doch bey den Juden/ vnd der welt sehr ergerliche ler/ das kein ander werg zum ewigen leben sey/ denn das wort vnsers Herren Christi halten. Denn vernunfft helts dafür/ man werde selig/ wenn man gute werck thue/ vnnd dem gesetz Gottes folge/ Aber hie hörest nicht ein wort/ das Christus vom Gesetz oder guten werken sagte/ Wer den todt nicht will sehen/ das ist/ wer da will das ewige leben haben/ der wirts mit dem nicht erlangen/ das er Mosen helt/ diß oder yenes thut/ Mein wort muß er halten. Was ist denn des Herren Christi wort? oder/ was predigt er/ das Moses nicht predigt? Dises/ das er Gottes Sun sey/ das er für vnsere sünde am Creutz sich opffere vnd bezale/ vnd Gott vmb seinet willen vns gnedig sein/ vnd zu kindern vns wölle annemen/ Wer das wort helt/ das ist/ mit vnzweyffenlichem glauben annimbt/ der soll den tod nicht sehen ewigklich. Denn ob wol der leyb muß sterben/ so soll doch der Geyst lebendig bleyben in Gott/ vnd der leyb durch Christum am Jüngsten tag auch zu eim newen vnd ewigen leben aufferwecket werden. Da hilfft vns des Herren Christi wort zu/ Moses wort hilfft vns nicht dazu.

Gebet.

HErr Got himlischer Vatter/ dein lieber Sun vnnd vnser erlöser Christus Jesus sagt: Wer mein wort helt/ wirdt den todt nicht sehen ewigklich/ Wir bitten dich gibe deinen heyligen Geyst in vnsere hertzen/ weyl du zu deines Suns wort vns kommen/ vnnd das selb hast hören lassen/ das wirs auch halten/ von gantzem hertzen vns drauff verlassen/ vnd mitten im tod desselben vns trösten/ vnnd den todt in ewigkeyt nicht sehen/ vmb deines lieben Suns/ vnnd vnsers erlösers Christi Jhesu willen/ AMEN.

Am Palm Sontag/ vom leyden vnsers Herren Christi/ Esa. 53.

FVRwar er trug vnser kranckheyt/ vnnd lud auff sich vnsere schmerzen/ wir aber hielten jhn für den/ der von Got geplagt vnd geschwechet wwer/ Aber er ist vmb vnser missethat willen verwundet/ vnd vmb vnser sünde willen zuschlagen/ Die straff ligt auff jm/ auff das wir fridhetten/ vnd durch seine wunden sind wir geheylet/ Wir giengen irre/ wie die schaffe/ ein yegklicher sahe auff seinen weg/ Aber der Herr warff all vnser sünde auff jn.

Das leyden vnsers lieben Herren Christi sollen wir dazu brauchen/ das wir drauß lernen Gott fürchten/ Gott trawen/ vnd Gottes willen gedultig tragen/ Denn weyl die Sünd durch kein Creatur hat können versönet werden/ der Sun Gottes selb/ hat dafür leyden vnd bezalen müssen/ solchs soll vns dahin treyben/ das wir Gott fürchten/ vnd vns für der sünde alß für dem vntreglichstem last/ vnd schedlichstem vnnd ewigem gifft/ mit höchstem fleyß hüten/ Aber die welt/ wil leyder solches nicht glauben/ sie achtet die sünd für gering/ vnd hat noch lust dazu/ das ist ein anzeygung/ das sie vnsers Herren Christi leyden nie recht bedacht hat.

Zum andern/ sollen wir auch lernen Gott trawen/ vnd vns aller genad zu im versehen/ sintemal sein eyniger Sun/ vnser Gott/ für vnser sünd mit seinem eygnen leyb vnd blut bezalet/ vnd durch solches opffer Gottes zorn gestillet/ vnd vns mit seinem Vatter versönet hat/ Darumb/ wen seine sünde engsten/ der sehe den Sun Gottes am Creutz an/ vnnd bedencke warumb er doch da also ellendigklich hange/ so wirt er finden/ wie der Prophet sagt/ das es vmb vnser willen geschehen sey/ das vns dadurch würde geholffen/ wie er spricht: Durch seine wunden sind wir heyl worden.

Zum dritten/ sollen wir auch lernen gedultig sein/ vnd Gottes willen tragen/ Denn so der Sun Gottes selb/ vmb vnser willen das Creutz auff sich genommen hat/ der doch keiner sünde schuldig war/ wie können wir vns des Creutzes beschweren/ die wir durch eygne sünd für vnnd für dazu vrsachgeben/ vnd der sünden halb/ der ruten oder straff sehr wol bedürffen? Wir sollen aber auch im leyden dise hoffnung fest halten/ gleich wie Christus auß dem leyden zu seiner herrligkeyt ist gangen/ also soll vnser leyden auch zur freude werden/ wenn wir nur gedultig sind/ vnnd in festem glauben vmb hilff bitten.

Gebet.

HErr Gott himlischer Vatter/ der du auß väterlicher gnade/ deines eingebornen Sunes nit verschonet/ sonder in den todt vnd an das Creutz hinan geben hast/ Wir bitten dich/ gib deinen heyligen Geyst in vnser Herten/ das wir solcher gnad vns hertzlich trösten/ für sünden ferner vns hüten/ vnnd was du vns zu leyden zuschickest/ gedultig tragen mögen/ auff das wir durch jhn/ mit dir ewigklich leben/ Amen.

Von dem Abendmal des Herren 1. Cor. 11.

Ich habe es von dem Herren empfangen/ das ich euch gegeben hab. Denn der Herr JEsus inn der nacht da er verrathen war/ nam er das brod/ dancket vnd brachs/ vnd sprach: Nemet hin vnnd esset/ das ist mein Leyb/ der für euch gebrochen wirdt/ Solches thut zu meinem gedechtnuß. Desselben gleychen auch den Kelch nach dem Abendmal/ vnd sprach: Diser Kelch ist das newe Testament inn meinem blut (Das für euch vnd für vil vergossen wirdt/ zu vergebung der sünden) Solches thut so oft jhrs drincket/ zu meinem gedechtnuß.

VOn des Herrn Abendmal/ soll ein yeder Christ dise stück wissen/ Erstlich das es der Herr Christus befolhen/ Vnd zum Testament seiner kirchen vermeinet hat/ das mans brauchen soll/ Derhalb sind dise nicht Christen/ so es können haben/ aber doch nicht wöllen brauchen.

Zum andern/ hat der Herr diß Abendmal also geordnet/ das man das brod vnd den Kelch den Christen soll reychen. Vnd dise klare wort mit angehengt/ wer diß brod esse/ der esse seinen Leyb/ vnnd wer disen Kelch trincke/ der trincke sein blut. Solche wort müssen wir nicht in den wind schlagen/ alß weren es allein wort. Wie der Herr Christus redet/ also ist es in der warheyt/ vnd ist ein grewliche sünde/ von disem Sacrament halten wie Zwingel/ vnd die Sacramentsschwärmer/ das es nur brod vnd weyn sey.

Zum dritten/ hat Christus solches abendmal geordnet/ das man sein dabey soll gedencken/ das ist/ wir sollen vns seines leydens trösten/ vnnd wie die wort klar mit bringen/ nit zweyflen/ sein leyb sey für vns geben/ vnnd sein blut für vnsere sündt vergossen. Denn auff das solcher glaub fest vnd gewiß wer/ ordnets Christus/ das wir nicht allein solches im wort sollen hören/ sein leyb sey für vns geben/ vnd sein blut für vnsere sünde vergossen/ sonder der leyb vnd das blut christi/ wirt vns in vnsern mund gelegt/ vnd zu essen vnd drincken geben/ das wir ja nicht zweyfflen/ vnsere sünde sind bezahlet/ vnnd sollen ferner vns nicht zugerechnet werden. Zum vierdten/ wer nun diß Abendmal will brauchen/ soll zuuor sich prüffen/ das ist/ sein hertz erforschen/ ob er sich für einen sündler erkenne/ vnd dauon beger ledig zu werden. Wo solches ein rechter ernst ist/ vnd du dich des leydens vnser Herr Christi tröstest/ so bist du zu disem Abendmal recht vnd wol geschickt/ Es soll aber ferner folgen/ weil du darumb zu disem Abendmal kombst/ das du von sünden begerest ledig zu werden/ das du für an für sünden dich hüttest/ vnd in allerley guten wercken übest/ vnd sonderlich deines beruffs fleyssig wartest/ Da gehöret aber auch stettiges gebet zu/ das wir

Got vmb seinen heiligen Geyst bitten/ das er vns regiere/ vnd für sünden beware.

Gebet.

HErr Got himlischer Vatter/ wir dancken dir für dein grosse gnade/ das du durch deinen Son diß Abendmal hast verordnet/ da wir sein Leyb essen/ vnnd sein Blut trincken/ Wir bitten dich/ gib durch deinen heiligen Geyst/ das wir solche gabe nicht vnwürdig brauchen/ sonder vnser sünde erkennen/ vnd dauon ablassen/ vnd durch Christum vergebung der selben hoffen vnd glauben/ vnd also im glauben vnd liebe von tag zu tag zunemen/ biß wir ewig selig werden/ Durch Christum Jesum deinen Son vnnd vnseren Herren/ AMEN.

Am Ostertag Rom. iiij.

CHRISTus ist vmb vnser sünde willen hingeben/ vnnd vmb vnser gerechtigkeit willen aufferwecket.

DAs ist/ durch das leyden vnd sterben/ vnser lieben Herren Christi/ sind wir von all vnsern sünden ledig vnd loß worden/ Seiner aufferstehung aber geniessen wir dazu/ das wir gerecht werden/ das ist/ das wir inn solcher genad bleyben/ vnd die sünde fort an nicht mehr vber vns herrschen noch vns schaden möge. Denn Christus ist vom todt erstanden/ vnnd sitzt zur gerechten hand Gottes/ das er vns vertrete/ vnnd mit seinem heyligen Geyst/ nit allein den glauben in vns anzünde vnd erhalte/ sonder auch der sünde in vns wehre/ Vnnd vns leyte im willen Gottes vnnd heyligen gehorsam/ biß wir von disem argem/ mühseligem leben abscheyden/ vnnd durch Christum zum ewigen leben aufferwecket/ vnd ewig selig werden/ wie er ist. Solches alles fasset die fröliche aufferstehung vnser lieben Herren Christi in sich/ vnd wir sollens mit rechtem glauben annemen/ vnd solcher gaben vnd gnaden aller gewiß warten/ Gott dafür teglich dancken/ vnd für sünden vns hüten/ das wir solche genad vnd hoffnung/ nit wider verlieren/ sonder mit Christo der welt absterben/ vnd in Gott vnnd nach seim wort leben.

Gebet.

HERR Gott himelischer Vater/ der du deinen Son vmb vnser sünde willen hingeben/ vnnd vmb vnser gerechtigkeit willen auferwecket hast/ Wir bitten dich/ du wöllest deinen heiligen Geyst vns schencken/ durch jn/ vns regiern vnd fürhin in waren glauben erhalten/ vnd für allen sünden in eim newen

reynen leben behüten/ vnnnd durch deinen Son Christum JESum/ vns nach diesem leben aufferwecken zum ewigen leben/ Amen.

Am andern Ostertag/Luce am 24.

VNser Herr Jhesus/ sprach zu den zweyen Jüngeren: O ihr thoren vnd treges hertzen zu glauben alle dem das die Propheten gered haben/ Muste nicht Christus solches leiden/ vnd zu seiner herrligkeyt eingehn.

ES ergerten sich nit allein die vnglaubigen Juden/ sonder auch des Herren Christi Jüngern selb an seinem schmehlichen end/ vnd war jnen vnmüglich zu glauben/ das der gestorbne Christus widerumb solte lebendig werden/ Denn sie sahen auff ander leut Exempel/ der war nie keiner erwidert kommen/ ausserhalb etliche die Christus hette von todten aufferwecket/ Aber der selben war diser zeyt auch vergessen/ wie anderer herrlichen wunderwerck mehr. Solches war nicht allein ein grosser vnglaub/ sonder wie es der Herr hie nennet/ ein grosse thorheyt vnd sündhaffter vnuerstand. Denn so sie gewist hetten/ was des Herrn Christi vnd verheyßnen Messie eygnes ampt wer gewest/ würden sie ob solchem todt sich nit geergert haben. Denn die Propheten sagen klar/ der Messias soll der gantzen welt sünde tragen/ wie Esai. 53. stehet/ Nun gehört aber auff die sünde der todt. Folget deshalb/ weil Christus aller welt sünde auff sich genommen/ vnd dafür bezalet hat/ Das er auch hat müssen schmehlich sterben/ Aber weil er nicht allein ein mensch/ sonder auch ewiger Gottes Sun war/ hat der todt jn nit können halten/ er hat selb sich am dritten tag auß dem tod erwecket. Hie sollen wir erstlich lernen/ weyl der Herr mit den vnglaubigen Jüngeren so vätterliche gedult tregt/ er werde mit vns auch so thun. Darnach sollen wir an seim todt vns nit ergern/ sonder Got für solch gnedige erlösung dancken/ vnd wissen/ dz wir solchem exempel auch folgen/ vnd mit dem Herren Christo leyden müssen/ ehe wir mit jm herrlich werden/ wie Paulus sagt 2. Cor. 1. das gleych/ wie wir des leydens theylhafftig werden/ also sollen wir auch des trostes theylhafftig sein.

Gebet.

HErr Got himlischer Vatter/ der du deinen Son Christum JESum den zweyen jüngern zu Emaus hast offenbaret/ Wir bitten dich/ du wöllest durch dein wort vnd heiligen Geist vnsere hertzen auch erleuchten/ das wir jm glauben starck vnd fest werden/ An deim wort trewlich halten/ dauon gern reden/ vnnnd fleysig mit vmbgehen/ Auff das/ ob wir gleych dem Exempel Christi

nach/ allerley hie auff erden müssen leyden/ dennoch durch dein wort den rechten trost haben/ vnd behalten/ biß wir durch deynen Son nach disem leben zum ewigen leben aufferwecket werden/ AMEN.

Am ersten Sonntag nach Ostern/ wie Christus seinen Jüngern nach seiner aufferstehung/ das predigamt befilhet/ Johan. 20.

GLEICH wie mich mein Vatter gesendet hat/ so sende ich euch. Nemet hin den heiligen Geyst/ welchen jr die sünde erlasset/ den sind sie erlassen/ vnd welchen jr sie behaltet/ den sind sie behalten.

DAs ist ein kurtze ler/ aber da trefflich vil an gelegen ist/ NEmlich/ das wir zur vergebung der sünden/ durch vnsere werck/ vnd verdienst nit können kommen. Allein im wort Gottes finden wirs/ Das selb wirt vns nit allein in der predigt/ sonder auch in der heiligen Tauf/ vnd dem abendmal verkündet/ vnd fehlet ferner nichts/ denn das du solchem wort/ vnd zusagung Gotes glaubest. In der tauff sagt man dir/ wer glaubt vnd getaufft wirt/ der wirt selig werden/ Im Abendmal sagt man dir/ der leyb Christi sey für dich geben/ vnd sein lbut zu vergebung deiner sünden vergossen/ So sagt das Euangelion allenthalb/ Durch Christum sollen vns vnser sünd vergeben werden. Wer nun solcher zusagung glaubt/ der hat vergebung all seiner sünde/ Wer aber nit glaubt/ dem sol weder tauf noch Sacrament/ noch wort helffen/ seine sünde sind jm in ewigkeyt behalten/ vnd muß verdampt werden/ er fange an/ vnd thu sonst was er wölle/ Also lösen vnd binden die schlüssel/ das ist/ das heilig Euangelion vnd predigamt/ welches alß denn anfangen vnd in schwang hat gehn sollen/ da Christus von todten aufferstand/ für die sünde mit seim tod bezalet/ vnd den Satan vberwunden hat. Für solche frucht der aufferstehung Christi/ das vergebung der sünde in seinem namen gepredigt wirdt/ sollen wir Got teglich dancken.

Gebet.

HErr Got himlischer Vatter/ wir dancken dir für deine grosse vnaußsprechliche gnad/ das du durch deinen Son vnsern lieben Herrn Christum/ das heylige Euangelion/ vnd die heyligen Sacrament verordnet hast/ vns zum trost das wir vergebung der sünden da sollen finden/ Wir bitten dich/ gib deinen heyligen Geyst in vnsere hertzen/ auff das wir deinem wort von hertzen glauben/ vnd durch die heyligen Sacrament von tag zu tag den glauben stercken/

biß wir endtlich selig werden/ Durch JEsum Christum deinen Son/ vnd vnsern Herren/ Amen.

Am andern Sonntag nach Ostern/ wie vnser Herr Christus tröstet/ er wölle vnser rechter Hirt sein/ vnd vns wider den Sathan vnd todt retten/ Johannis 10.

Ich bin ein guter hirt/ ein guter hirt lest sein leben für seine schaff. Ich erkenne die meinen/ vnd bin bekandt den meinen/ Wie mich mein Vatter kennet/ vnd ich den Vatter kenne. Vnd ich laß mein leben für die Schaff.

Wir menschen alle sind wie ein armes Schefflein/ gegen eim Wolff/ Denn wir können vnns wider den Teuffel nicht schützen/ Aber vnser lieber Herr Christus sagt vnns zu/ er wölle vnser Hirt sein/ vnd sein leben für vns lassen/ das ist/ er wölle sich lassen würgen vnd fressen/ wie am Creutz geschehen/ vnd also vns vom todt vnd des Teuffels Reych ledig machen/ das wir durch jn sollen kinder sein des ewigen lebens/ Denn er kennet vns/ vnd nimbt sich vnser an/ wie jn sein Vatter kennet/ das ist/ ob er vns hie gleich lest leyden/ so will er doch vns endlich selig machen. Darumb sollen wir solchen trewen Hyrten auch erkennen/ allß vnsern erlöser/ vnd seim wort gern folgen/ Denn wer disen Hyrten nicht hören/ vnd vergebens woll ruffen lassen/ der gibt sich selb willig in fahr/ vnd ist jm ferner nicht zu helfen. Wer aber bey disem Hirten bleybt/ ob gleych der Sathan mit anfechtung vnd allerley vnglück immerdar anhelt/ der soll ewigen schutz vnd rettung haben/ wider sünd/ todt/ vnd Teuffel.

Gebet.

HERR Gott himlischer Vatter/ der du vnser menschen Vätterlich bedacht/ vnd deinen Son zum Hirten vber vns gesetzt hast/ das er nit allein mit seinem woort vns weiden/ sonder auch durch seinen schutz/ wider sünd/ todt/ vnd Teuffel/ vns retten vnd erhalten soll/ Wir bitten dich/ gib durch deinen heyligen Geyst/ das/ gleich wie diser hirt vns kennet/ vnd vnser not sich animbt/ wir widerumb in allerley anligen jn auch erkennen/ vns an jn halten/ hilff vnd trost bey jm suchen vnd gewarten/ vnd seiner stimmen mit hertzen folgen/ vnd also durch jn ewig selig werden/ Amen.

Am dritten Sonntag nach Ostern/ wie Christus warnet vnnnd tröstet/ der künfftigen verfolgung halb/ Johannis am 16.

WARlich warlich/ ich sage euch: Ir werdet weynen vnnnd heulen/ Aber die welt wirdt sich frewen/ Ir aber werdet traurig sein/ doch ewer trawrigkeyt soll zur frewde werden.

VNser lieber Herr Christus warnet erstlich alle seyne Christen/ weil sie in der welt sind/ das sie allerley widerwertigkeyt vnnnd vnglück müssen gewarten vnnnd leyden/ Vnd trösten darnach solches leyden soll ein kelnes sein/ Sintemal es Gott durch sein hilff bald wenden/ vnd in yenem leben mit ewiger frewde will bezalen. An solchen trost sollen wir gedencken/ wenn es vns vbel gehet/ vnnnd der besserung vnd der gnedigen hilffe gewärten/ vnd ja nicht verzweyflen/ ob gleich vns vnmüglich dunckt/ das wirs erdulden/ oder zur hilffe mögen kommen. Denn gleich wie ein schwangeres Weyb/ nichts denn angst vnnnd not fälet/ vnnnd dennoch Gott in eim ajugenblick rath vnd hilff schaffet/ Also soll es mit den Christen auch gehen/ sonderlich wenn sie mit dem gebet vnd glauben fest anhalten/ Es muß rettung vnd hilff folgen/ wo nicht zeytlich/ doch ewig/ das ist gewiß. Denn die verheyssung hie leugt vns nicht/ Ewer trawrigkeyt soll zur frewde werden. Gleich aber wie es vns in der anfechtung vnmüglich ist/ das wir solten glauben/ es würde nur vmb ein kleinse zu thun sein. Also wenn die anfechtung hinüber ist/ findets sich selb/ das wir müssen bekennen/ es sey ein kleines gewest/ sonderlich wenn wirs gegen der verheyssung des ewigen lebens halten.

Gebet.

HErr Got himlischer Vatter/ der du auß väterlichem wolmeinen/ vns deine kinder hie auff erden vnter der ruthen wilt halten/ auff das wir deinen eingebornen Son bedes im leyden/ vnd hernach in der herrligkeyt sollen gleich sein/ Wir bitten dich/ tröste vns in der anfechtung vnd creutz/ mit dem heiligen Geyst/ das wir nicht verzagen/ sonder nach der zusagung deines Sons fest an disem trost halten/ es soll das leyden nur ein kelienes sein/ vnd darnach die ewigen freude folgen/ auff das wir also durch dise hoffnung alles vnglücks in gedult vberwinden/ vnd durch Christum selig werden Amen/ AMEN.

Am vierdten Sontag/ wie Christus den heiligen geyst verheist/ vnd lehret was er in der welt soll außrichten/ Johan. 16.

CHristus spricht: Wenn ich hingehe/ will ich den tröster zu euch senden/ der wirdt die welt straffen vmb die sünde/ vnd vmb die gerechtigkeit/ vnnd vmb das gerichte/

Das ist.

DER heylige Geyst lehret vnns im Euangelio drey ding/ Das erste/ das alle/ so an Christum nicht glauben/ sündler sind/ vnd jnen selb nicht können helfen/ sie müssen in sünden vnd dem tode bleyben.

Das ander/ das wir allein dadurch gerecht/ vnd von sünden ledig werden/ das Christus zum Vatter gehet/ das ist/ das er am Creutze/ für vns bezalet mit seinem todt/ vnd wir jn nit sehen/ das ist/ wir glauben seinem wort vnd zusagung/ vnd trösten vns sein/ das er vnser erlöser sey/ vnd sitze zur rechten Gottes/ vnd vertrette vns.

Zum dritten/ das wir für dem Sathan vnd seiner gewalt/ vns nit sollen fürchten/ sonder wissen/ das er gerichtet/ vnd von dem Herrn Christo vberwunden sey. Derhalb kan er denen nit schaden/ so an Christum glauben. Das ist nu der schatz/ den wir Christen durch den heyligen geyst haben/ das erstlich wir vnser sünde erkennen/ vnnd für Got vns demütigen/ vnd darnach vns des verdiensts Christi trösten/ vnd wider den Satzan vnd die welt einen mut fassen/ alß die vns in ewigkeit nit schaden können/ sie seyen so böß/ mechtig/ vnd witzig sie wöllen/ Christus hat sie schon gerichtet. Weil aber solch lehr vnd trost der wenigst teil mit glauben annimbt/ die andern verachten oder verfolgen es/ Straffet der heilig geyst solchen vnd glauben durch das predigampt/ vnd lest die verächter vnd verfolger in sünden/ vnd vnter des Teuffels tyranney stecken vnd verderben/ denn sie wöllen jnen nit lassen raten noch helffen.

Gebet.

HErr Got himlischer Vatter/ der du durch deynen Son vns den heiligen geist verheissen hast/ das er die welt vmb die sünde/ gerechtigkeit/ vnd das gericht straffen soll/ Wir bitten dich/ erleuchte vnser hertzen/ das wir vnser sünde erkennen/ vnnd durch den glauben an Christum zur ewigen gerecht-

tigkeyt kummen/ vnd in allerley vnser not vnd anfechtung disen rechten trost fassen/ das Christus ein Herr vber Teuffel/ todt/ vnd alles sey/ vnnd vns mit genaden von allem vnglück helffen/ vnd ewig wölle selig machen/ Amen.

Am fünfften Sonntag nach Ostern/ verheyssung vnd vermanung zum gebet/ Johan. 16.

WARlich warlich/ ich sage euch: so jhr den Vatter etwas bitten werdet inn meinem namen/ so wirdt ers euch geben. Bittet/ so werdet jr nemen/ das ewer freude vollkommen sey.

VNser lieber Herr Christus vermanet seine jüngern zum Gebet/ Darumb das sie so vil not vnd ellend inn der welt gewarten vnnd außstehen müssen/ da sonst kein hilff noch trost ist/ denn das Got vns erhören/ vnd vns helffen wölle/ Wie denn vnser lieber Herr Christus vns gewiß vertröstet/ der Vatter im himel/ werde vns seine kinder nicht lassen vmb sonst beten. Es lehret aber daneben Christus auch wie wir recht sollen beten/ Nemlich/ in seinem namen/ vnnd nicht inn vnserm namen/ das ist/ wir sollen hoffen/ gleich wie Gott durch Christum vnser Vatter worden ist/ also wölle er auch vmb Christus willen/ vns erhören/ vnd auß allem vnglück helffen. So mercke nun bedes/ erstlich den befehl vnd die verheissung/ das wir sollen betten/ vnd Gott das gebet wölle hören/ vnnd darnach den vnterricht wie wir allein in Christus namen/ das ist/ auff sein verdienst vnd gnad sollen beten/ Denn sonst werden vnser sünde vnns am gebet hindern. Wer aber weyß/ das Got allein vmb seines Sones willen erhören will/ der tröstet sich solcher verheyssung mehr/ denn er seine sünde sich lest schrecken.

Gebet

HErr Got himlischer Vatter/ der du durch deinen Son vns verheissen hast/ was wir in seinem namen bitten/ das wöllest vns geben/ Wir bitten dich/ erhalt vns in deinem wort/ gib deinen heyligen Geyst/ der vnns regiere/ vnd füre nach deinem willen/ Behüte für des Teuffels Reych/ für falscher lehr vnd vnrechtem Gottesdienst/ Bewar auch vnser leyb vnd leben/ für allem vnglück/ Gib deinen segen vnd frid/ auff das wir allenthalb deine gnedige hilff erfahren/ vnd dich hie vnd dort in ewigkeyt/ alß vnsern gnedigen Vater/ durch Christum preisen vnd loben.

Am tag der Himelfart Christi/ Ephe. 4. Psal. 68.

**CHristus ist auffgefahren in die höhe/ vnnd hat das gefengnuß gefangen
genommen/ vnd hat den menschen gaben geben/ Ephe. 4.**

**Christus ist von todten aufferwecket/ vnd sitzt zur rechten Gottes/ vnd
vertritt vns/ Rom. 8.**

DVrch die Himelfart Christi JEsu/ haben wir dise zwo herliche gaben/ Das
erstlich/ der Teuffel/ sünd/ vnd todt/ alß gefangene feynde/ dem Herrn
Christo zum füßen müssen ligen/ Vnd können wider ihn vnd seine Kirch
mehr nicht außrichten/ denn was er/ alß ir Herr ihnen hengelt vnd nachlest/
nicht zum schaden oder nachtheyl der Christen/ sonder das es jnen soll nüt-
zen/ vnd zum besten dienen/ wenn es gleich der feyndt am ergsten meyndt.

Zum andern/ gibt er den menschen gaben/ das ist/ er schenckt vns den heili-
gen Geist/ der lehret vns Got durch das Euangelion recht erkennen vnd an-
ruffen/ vnd tröstet in allerley vnglück/ Darumb sollen wir vns der himelfart
vnsers lieben Herren Christi trösten/ vnd getrost in gewiser hoffnung vmb
solche gabe bitten/ das er den heyiligen Geyst vnns schencken/ vnd dem
Teuffel/ vnd seim reich wehren wölle/ Alß der zur rechten Gottes sitzt/ ein
Herr vber alle Creatur/ im himel vnd auf erden. Wir sollen aber der himelf-
art Christi auch inn disem fall zum trost vnd vnterricht brauchen/ das wir
erstlich vnser hoffnung dahin setzen/ vnd nit zweyffeln sollen/ wo er ist/ da
wollen wir durch sein genad vnd hilff auch hin/ Wie er im letzten Abendmal
selb bitet: Vater ich wil wo ich bin/ das sie auch sind. Zum andern/ das wir
vnser leben darnach richten/ vnd nach dem himlischen vnd ewigen trachten/
vnd das zeitliche vns nit verführen lassen/ wie Paulus sagt: Wandelt in dem
himlischen/ vnd nit in dem jrdischen.

Gebet

O Jesu Christe/ du Son des allmechtigen Gottes/ der du fürt an nicht mehr
auff erden/ arm vnnd ellend/ sonder zur rechten deines Vatters/ vnd ein Herr
vber alles bist/ Wir bitten dich/ du wollest deinen heyiligen Geyst vns sen-
den/ fromme Kirchendiener geben/ ob deinem wort halten/ Dem Sathan vnd
allen Tyrannen wehren/ vnnd dein Reyck auff erden gewaltig erhalten/ biß
alle deine feinde zu deinen füßen ligen/ vnnd wir durch dich vber sünd/
todt/ vnd alles siegen/ Amen.

**Am sechsten Sonntag nach Ostern/ warnung der
künfftigen verfolgung halb/ Johan. 16.**

Christus sprach zu seinen Jüngeren: Solches hab ich zu euch geredt/ das jr euch nit ergert/ Sie werden euch in den Bann thun/ es kombt aber die zeyt/ das/ wer euch tödtet/ wird meinen/ er thue Gott einen dienst dran. Vnd solches werden sie euch darumb thun/ das sie weder meinen Vatter/ noch mich erkennen.

DIß ist ein weyssagung/ wie die Christen vmb des wortes willen/ auff der welt müssen verfolget werden. Weil es aber für der vernunft scheynet/ alß sey Gott denen feind/ die also vnter dem Creutz ligen/ vnd sich leyden müssen/ zeyget der Herr die vrsach an/ wo solche verfolgung vnd haß wider die Christen herkomme/ vnd spricht: Es geschicht nit darumb/ das euch Gott feynd sey/ oder nichts guttes gönne/ Sonder das die welt weder meinen vatter/ noch mich kennet. Diß vrtheyl sollen wir fleysig mercken/ Denn ye vnd ye haben dise/ die Christen am hefftigsten verfolget/ so für der welt für fromm vnd heylig geachtet sind. Zu Jerusalem waren es die Phariseer vnd Schrifftgelerten vnd Hohenpriester/ Heitgs tages ist es Bapst/ die Bischoffe/ Münche vnd Pfaffen/ die sich rhümen/ sie sind allein die rechte Kirch. Aber gewiß ist es/ sie kennen weder Christum noch seinen Vatter/ sonst würden sie sein wort nicht verfolgen. Darumb erger sich niemandt an dem grossen scheyn vnd herrlichen namen/ den die verfolger des worts bey der welt haben. Widerumb beschwere sich auch nyemandt des leydens vnd der verfolgung/ sintemal wir den schatz haben/ vnd den ewigen Vatter vnd seinen Son Christum Jesum recht kennen/ Solches erkenntnuß bringt vns ye den höchsten trost/ das wir an Gottes hilff vnd gnad nit können zweyfflen/ vnd macht vns endlich gar selig.

Gebet

HERR Gott himlischer Vatter/ wir dancken dir das du vns durch deinen heyligen Geyst zu zeugen deines Sones/ vnsern lieben Herren Christi gesetzt hast/ Vnd bitten dich/ weyl die welt solches zeucknuß nicht kan dulden/ vnd vns drüber zusetzet/ du wöllest vns mut vnd trost verleyhen/ das wir am Creutz vns nicht ergern/ sondern bey deinem zeucknuß fest bleyben/ vnd für vnd für bey dem hauffen gefunden werden/ der dich vnd deinen Son kennet/ biß wir endlich gar selig werden/ durch Jhesum Christum deinen Son/ vnd vnsern Herren/ Amen.

Am heyligen Pfingstag

Joel am 2.

ES soll geschehen inn den letzten tagen/ spricht Got: Ich will außgiesen von meinem Geyst/ auff alles fleysch/ vnd soll geschehen/ Wer den namen des Herrn anruffen wirt/ soll selig werden.

AM heyligen Pfingstag hat vnser lieber Herr Christus sehen lassen/ wazu wir seiner aufferstehung vnd Himelfart geniessen sollen/ Wir arme menschen sind durch die sünd so gar verderbet/ das nichts gutes an vnns ist/ So nun wir wollen selig werden/ müssen wir neue hertzen haben/ vnd gar andere menschen werden. Dazu sendet vnser lieber Herr Christus seinen heyligen Geyst/ der mit dem Vatter/ vnd Son ewiger Gott ist/ Das er vnser hertzen endern/ vnd andere menschen auß vns machen soll. Vnd richtet der heylige Geyst solchs auß/ durch das heylige Euangelion/ vnnd die selige Tauff/ Denn er zündet die hertzen durch das wort an/ das sie an Christum glauben/ vnnd vergebung aller sünden durch den glauben empfangen/ vnnd darnach lust vnd lieb haben an Gottes wort vnnd willen/ Vnd dem bösen Geyst nicht hengen/ sonder seinem eingeben widerstreben/ vnd die sünd nicht lassen herrschen/ vnd der welt zorn vnd haß/ auch alle fahr verachten. Solches alles sind des heyligen Geystes werck/ die er in der menschen hertzen anrichtet/ vnnd on des heyligen Geystes würckung/ vns menschen gantz vnd gar vnmüglich sind/ Denn von natur können wir mehr nicht/ denn das wir vns für Gott fürchten/ wir haben lust vnd liebe zu der sünde/ vnd werden im leyden kleinmütig vnd trawrig/ Solche angeborne vnart vnser hertzen endert der heylige Geyst/ vnd erregt sonderlich die hertzen/ das sie in der not vnd anfechtung auß kindlichem vertrauen zu Gott vmb hilff schreyen vnd flehen/ vnd für sünden von hertzen sich hüten. Für solche gnad sollen wir Gott von hertzen dancken/ vnnd teglich in darumb bitten/ das er sie vns mehren/ vnd nicht entziehen wölle.

Gebet

O Herr Jhesu Christe/ du Sun des Allmechtigen Gottes/ Wir bitten dich/ du wöllest durch dein liebes wort deinen heyligen Geyst in vnser hertzen geben/ das der selbe vns regier vnnd füre nach deinem willen/ vnnd in allerley anfechtung vnd vnglück vns tröste/ vnd in deiner warheyt/ wider alle jrrthumb vns leyte/ auff das wir im glauben fest bestehen/ inn der liebe vnnd allen guten wercken zunemen/ vnd durch die gewisse hoffnung deiner gnad/ so du vns mit deinem sterben erworben hast/ ewig selig werden/ der du regierest mit dem Vatter/ vnnd heyligem Geyst in ewigkeyt/ AMEN.

Am andern Pfingstag

**ALso hat Gott die welt geliebet/ das er seinen eingebornen Sun gab/
Auff das alle/ die an jn glauben/ nit verlorn werden/ sonder das ewige
leben haben. Denn Gott hat seinen Sun nicht gesendet/ das er die welt
richte/ sonder das die welt durch in selig werde. Wer glaubt/ wird nit
gerichtet/ wer aber nicht glaubt/ ist schon gerichtet/ Darumb das er
nicht glaubt an den namen des eingebornen Sun Gottes.**

DIß ist gleich wie ein summa des gantzen Euangelij/ oder der predigt/ wel-
che der heylig Geyst in der welt füret/ vnd dadurch die hertzen endert/ Denn
wo das inn den hertzen gewiß ist/ das Gott vns vnser sünden halb/ nit feinde
sey/ sonder er habe vns lieb/ vnnd wölle vns durch seinen Sun selig ma-
chen/ Da fürchten sich vnser hertzen nicht mehr für Gott/ sonder halten
sich zu jm/ gewarten hilff vnd trost von jm/ vnd sind willig/ alles das zu
thun/ was sie wissen das es jm wolgefelt/ vnd er haben will. Sie ruffen jhn
an in anfechtung/ vmb hilff/ Sie erkennen sein wort vnnd gnad/ loben vnnd
preysen jn/ Da dagegen/ wo dise predigt nicht ist/ die hertzen von Got flie-
hen/ für jm sich fürchten/ vnd inn der not verzagen/ So lerne nun dise pre-
digt/ das Gott vns lieb hat/ vnnd seinen Sun vns schencket/ vnd will das wir
an jn glauben/ das ist/ das wir vns sein sollen trösten/ vnnd durch jn selig
werden. An diser kunst ligt es gar/ Es ist aber nit ein menschen kunst/ der
heylige Geyst muß hie meister sein/ sonst ist es vngeleynet. Nu haben wir
aber die verheissung lauter vnnd klar/ das Gott sein heyligen Geyst denen
wolle geben/ so jn darumb bitten. Darumb sollen wir mit dem Gebet anhal-
ten/ vnd vmb den glauben an dise verheissung bitten.

Gebet

HErr Gott himlischer Vatter/ der du auß väterlicher lieb gegen vns arme
sünder/ deinen Sun vns geschencket hast/ das wir an jn glauben/ vnd durch
den glauben sollen selig werden/ Wir bitten dich/ gib deinen heyligen Geyst
in vnser hertzen/ das wir in solchem glauben/ biß ans ende beharren/ vnd
selig werden/ Durch Jesum Christum vnseren lieben Herren. AMEN.

Vom Fest der heyligen Tryfeltigheyt/ Matth 4.

**DA Jesus getauffet war/ steyg er bald herauff auß dem wasser/ Vnd si-
he/ da thet sich der himel auff vber jm/ vnnd Johannes sahe den Geyst
Gottes/ gleych alß eine Taube herab faren/ vnd vber jn kommen/ vnnd**

sihe/ eine stimm vom himel herab sprach: Diß ist mein lieber Sune/ an welchem ich wolgefallen (das ist/ alle freude) habe.

DEN heutigen Sonntag nennet man den tag der heyligen Trifeltigkeyt/ auff dz alle Christen lernen/ was sie von Gott glauben/ vnd wie sie Gott recht erkennen sollen. Denn an disem stück fehlet es allen menschen auf erden. Weder Türcken/ Juden noch Heyden wissen was Gott sey/ Allein die Christen wissen es/ das Got der ewige Vatter/ in ewigkeyt einen Sun gezeuget/ vnnd das der heylige Geyst vom Vatter vnnd dem Sune in ewigkeyt außgehe/ Das also Gott heyst/ vnd ist/ Got Vatter/ Gott Sun/ Gott heyliger Geyst. Diser eynige ewige Got/ aber drey vnterschiedne Personen/ haben sich gegen vns menschen also offenbaret/ das Got der Vatter/ durch sein wort vns/ vnnd alle Creatur erschaffen hat/ vnd für vnnd für erhelt. Got der Sun/ ist auß des Vaters willen mensch worden/ vnnd hat vns mit seinem todt von sünden erlediget/ vnnd mit Gott versünet. Gott der heylig Geyst/ kompt durch die predig des Euangelii in vnsere hertzen/ vnnd zündet den glauben in vns an/ vnd heyliget vns/ das wir durch den glauben vergebung der sünden haben/ vnd der sünde widerstehen. Also sihest du/ wie die gantze Gott-heynt in gnaden gegen vns sich auffthun/ vnd wir alles zeytliches vnd ewiges allein durch die gnade Gottes haben. Darumb sollen wir solchen gnedigen Gott loben vnd lieben/ vnd gern alles thun/ das wir wissen das er haben will. Da vnser lieber Herr Christus getauffet ist worden/ hat sich Gott auff diese weyse offenbaret. Das Johannes den heyligen Geyst sihet/ vber dem Herren Christo in gestalt einer Tauben. Got Vatter aber im Himel redet mit verstendlicher stimme/ vnnd zeuget: Das ist mein sun/ Derhalben sollen wir an solchem glauben fest halten/ Gott Vatter/ Gott Sun/ Gott heyliger Geyst/ sey der eynige allmechtige ewige Gott/ vnser aller schöpffer/ erlöser vnd seligmacher/ vnd sollen solchen Gott in allen nöten anruffen/ vnd seiner gnad vnd hilff vns trösten.

Gebet

ALmechtiger ewiger Gott/ Gott Vatter/ Gott Sun/ Gott heyliger Geyst/ der du dein gnad vns menschen in dem erzeygt/ vnnd dein barmhertzigkeyt reichlich hast sehen lassen/ das erstlich du ewiger Vater/ vns zu menschen erschaffen/ vnd du ewiger Sun Gottes/ für vns mensch worden/ vnd für vnsere sünde am Creutz bezalet/ vnd du ewiger Geyst/ der du vom Vater vnd Sun in ewigkeyt außgehest/ vns durch das heylige Euangelion glaubig gemacht/ vnd geheyliget hast/ Wir bitten dich/ O eyniger/ ewiger vnd allmechtiger

Gott/ Gott Vater\ gott Sun/ gott heyliger geyst erhalte vns in deiner gnad/
biß an das ende/ vnd mache vns ewig selig/ Amen.

An der heyligen Trifaltigkeyt tag ...

**...wie der Herr Nicodemum lehret/ von der seligkeyt/ wie wir inn himel
mögen kommen/ Joh. 3.**

**ES sey denn/ das yemand geborn werde auß dem wasser vnd geyst/ so
kan er nicht in das reych Gottes kommen(Was vom fleysch geboren
wirdt/ das ist fleisch/ vnnd was vom Geyst geboren wordt/ das ist Geyst**

Vnser lieber Herr Christus lehret in disen worten/ wie wir müssen selig
werden. Vernunft gedenckt/ wenn wir ein züchtigen wandel füren/ mit der
hand nicht tödten/ nit selen/ noch anders thun das ergerlich sey so habe man
gnug zum ewigen leben. Aber vnser lieber Herr Christus sagt/ so wir selig
werden sollen/ müssen wir andere menschen/ vnd von newem geborn wer-
den/ es sey nit genug das wir die hende/ augen/ zungen zemen/ das sie nicht
vnrecht thun/ das hertz müsse gar anders werden. Solches geschehe aber/
wenn wir im namen/ vnnd in den todt Christi getauffet werden/ durch sol-
che tauff wölle der heylig Geyst in die hertzen kommen/ den glauben drinn
anzünden/ vnd gar neue menschen auß vns machen. Denn durch den glau-
ben werden wir von Sünden reyn/ vnnd der heylig Geyst hilfft wider die
sünde vns streyten/ vnnd weyset weytter vns zum gehorsam Gottes/ Ist also
diß der eynige weg zur seligkeyt/ an Christum glauben/ Solches können wir
von vns selb nicht/ se ist des heyligen geystes werck/ der will durch das
wort Gottes/ vnd die heyligen Sacrament/ den glauben in vns anzünden
vnnd erhalten.

Gebet

HErr Gott himlischer Vatter/ wir arme sündler bekennen/ das nichts gutes an
vns ist/ vnd wir vnserthalben musten in sünden vnd ewigem todt verderben/
Sintemal was vom fleysch geborn wirdt/ ist fleysch/ vnnd kan dein Reych
nicht sehen/ Wir bitten dich aber/ sey gnedig vnd barmhertzig/ vnd sende
deinen heyligen Geyst/ vmb deines Suns Christi Jesu willen in vnser hert-
zen/ vnd mache neue menschen auß vns/ das wir vergebung der sünden
durch Christum/ wie vns in der Tauff zugesagt/ gewiß glauben/ vnd in der
lieb gegen vnserm NEchsten/ vnd allen andern Christlichen tugenden von
tag zu tag zunemen/ biß wir endlich selig werden. AMEN.

Am ersten Sonntag/ vom reychen Mann/ vnd armen Lazaro/ Luce am 16.

Abraham sprach zum Reychen Mann: Gedencke Sun/ das du dein gutes empfangen hast in deinem leben/ vnd Lazarus dagegen hat böses empfangen. Nun aber wirdt er getröstet/ vnnd du wirst gepeyniget.

DIsen spruch sollen wir fleysig mercken/ Denn weyl die Christen auff erden sich vil müssen leyden/ vnd es dagegen den vnchristen vnd bösen buben/ nach all jrem willen gehet/ Haben die Christen allein disen trost der hie stehet. Nemlich/ das es nach disem leben sich zu beden theylen werde vmbkeren/ Welchen es hie auff erden wol gehet/ vnd alles gnug haben/ vnnd one anfechtung sind/ vnd derhalb alles thun was sie gelüsted/ one alle schewden selben soll es dort in ewigkeyt/ wie dem Reychen Mann/ vbel gehn/ Widerumb aber/ die sich hie auff erden vil müssen leyden/ vnd doch im leyden gedultig sind/ vnnd durch Christum auff denewigen trost hoffen/ die sollen mit dem armen Lazaro ewig selig werden. Derhalb erschrecke niemand für dem Creutz vnd leyden/ weyl dise ewige hoffnung dabey ist. Widerumb vberhebe sich niemand gelts vnd guts/ sonder fürchte Gott/ vnd brauche seines segens/ zu Gottes ehr/ vnnd des negsten nutz/ so soll es nicht not haben.

Gebet

HErr Gott himlischer Vatter/ Wir bitten dich/ du wöllest vnser hertzen durch deinen heyligen Geyst/ also füren vnd regieren/ das wir dein liebes wort/ nit/ wie der reycher Man/ one frucht hören/ vnd mit dem zeytlichen gut nit also vmbgehn/ das wir des ewigen dabey vergessen/ sonder armen leuten gern vnd miltigklich nach vnserm vermögen helffen/ vnd mit hoffart vnd vberfluß vns nit versündigen/ auch wo wir mit dem Creutz vnnd vnglück bedranget werden/ nicht verzagen/ sonder alle hoffnung an deiner ewigen hilffe vnd genad haben/ vnd in gedult alles vberwinden. Amen

Am anderen Sonntag/ nach Trinitatis/ das gleychnuß vom grossen Abendmal/ Luce 14.

GEhe auß auff die landstrassen/ vnd an die zeune/ vnd nötige sie herein zukommen/ auf das mein hause vol werde/ Ich sage euch aber/ das der Männer keyner/ die geladen sind/ mein Abendmal schmecken wirdt.

VNser lieber Herr Christus lehret in disem gleychnuß/ vvom Abendmal zwey ding/ Erstlich/ das Gott so gnedig vnnd barmhertzig ist/ vnd gern yerman durch seinen Son Christum Jesum wolte selig machen/ Denn er lest ihn nicht vmb des/ oder yenes willen/ mensch werden vnd leyden/ Er soll das Lemlein sein/ das der gantzen welt sünde wegnimbt/ vnnd legts auff sich vnd bezalet dafür/ vnd fehlet ferner an nichte/ denn das alle arme sündler die sünde erkennen/ vnd solche gnad vnd wolthat/ des Sone Gottes annehmen/ vnd der selben sich trösten/ das er vnser sünde von vns genommen/ auff sich geladen vnd dafür bezalet hat/ Das ist das erste.

Das ander ist/ das leyder die welt so blind vnd ellend ist/ vnd will solcher gnade nicht/ Etliche halten sich für fromb/ vnnd gedencken sie dürffen der gnade nicht/ Etliche sind mechtig vnd reych/ die verachten das Euangelion gar/ Etliche gehn noch damit vmb/ das sie reych werden/ vnd schlagen sich in mancherley hendel/ die haben so vil weil nicht/ das sie mit dem Euangelion köndten vmbgehen/ Aber da folget ein schwerlich vrteil/ Wer das Euangelion also verachtet/ soll nimmer mehr selig werden. Darumb sollen wir Gottes wort fleysig hören/ vnd es vnsern höchsten trost vnnd besten schatz lassen sein/ so werden wir dadurch seelig werden. Solchs aber thun nur die krüppel vnnd lammen/ so für der welt ellend vnd arm sind/ vnnd jre sünde vnd missethat erkennen.

Gebet.

HErr Got himlischer Vatter/ wir dancken dir/ das du vns zu deiner Malzeit dem ewigen leben/ durch dein liebes Wort hast lassen laden/ Vnd bitten dich/ du wöllest durch deinen heyiligen Geyst vnser hertzen erwecken/ das wir dein wort nicht vergeblich hören/ vns zu solcher Malzeyt recht schicken/ vnd das zeytliche vns nit dran hindern lassen/ AMEN.

Am dritten Sonntag/ nach Trinitatis/ von dem verlorenen schefflein/ welchem der Hirt nachgeheth/ vnd es suchet/ Luc. 19..

ES wirdt freude im Himel sein/ vber ein sündler/ der busse thut/ für neun vnnd neuntzig gerechten/ die der busse nit bedürffen.

DAs ist zu gleych ein trost/ vnd ein lehr für alle arme sündler/ die gern vom zorn Gottes wolten ledig sein/ Denn vnser lieber Herre Christus sagt in disem gleichnuß/ eim sündler sey eben/ wie eim Schefflein/ das in die jrrer ge-

rathen/ vnd sich von seim hirten verlassen hat/ Er aber wölle die sündler nicht in der jrre lassen/ sonder durch sein wort sie suchen/ vnd wider zu recht bringen/ das ist doch ye ein grosser trost. Denn wir gedencken/ wenn wir vnser sünde gewar werden/ Got sey vns feind/ vnd wölle sich vnser nicht mehr annemen/ so er doch wie ein Hyrt/ dem jrrigen Schefflein nachgehen/ vnd es wider suchen/ vnnd inn sein stellin bringen will.

Dagegen aber sollen die Schefflein auff des Hirten stymm gute acht haben/ vnd jnen nit vergebens lassen nachgehn/ sonder sich zu irem Hirten der sie suchet/ wenden/ das ist/ die sündler sollen buß thun/ vnd wenn Christus sie durch sein Wort suchet/ von sünden abfordert/ straffet vnd vermanet/ sollen sie hören/ vnd in der jrre nit fort lauffen/ sonder von der sünde ablassen/ rew vnd leyd drüber haben/ vnd sich des Herrn Christi vnd seiner gnade trösten/ so wil Christus sie mit frewden annemen/ vnd wie ein hirt jr warten/ das sie nicht allein ihr futter haben/ sonder auch inn ewigkeyt/ wider den wolff den Teuffel sollen beschützt sein/ Amen.

Gebet

HErr Got himlischer Vatter/ wir sind leyder wie die Schaffe in der irre/ vnnd haben vns durch den Sathan/ vnnd vnser sündhafftes fleysch vom rechten wege lassen abfüren/ wir bitten dich aber/ sey gnedig/ vnd vergib alle vnser sünde/ vmb deines Sones Christi Jesu willen/ vnd erwecke vnser hertzen durch deinen heyligen Geyst/ das wir an deinem wort fest halten/ vnnd im Schaffstal deyner Christlichen Kirchen/ in rechter Buß vnd warem glauben/ biß ans ende beharren/ vnd selig werden/ Amen.

Am vierdten Sontag/ nach Trinitatis/ ein lehr/ wie wir vntereinander freundlich vnd Christlich leben sollen/ Luce am 6.

Seydt barmhertzig/ wie ewer Vatter barmhertzig ist. Richtet nicht/ so werdet jr nicht gerichtet. Verdammet nicht/ so werder jhr nicht verdambt. Vergebt/ so wirdt euch vergeben. Gebet/ so wirdt euch gegeben/ Ein vol gedrückt/ gerütelt/ vnd vberflüssige maß/ wirdt man in ewer schoß geben/ Denn eben mit dem maß jr messet/ wirdt euch wider gemessen werden.

ES hat vnser lieber Herr Gott/ dreyerley stend auff erden verordnet/ die richten vnnd straffen sollen/ doch ein yeder nach seinem maß/ Vatter vnd

Mutter im hause/ sollen richten vnd straffen jhre Kind vnd gesind/ mit worten vnd schlegen/ vnd ja nicht zusehen noc hgedulden/ das sie vnrecht thun/ solches ist Gottes ernster befeh. Darnach ist ein höhers vnd weytleufftigers Regiment/ Dem hat Gott das schwerdt geben/ vnnd befolhen/ alle offentliche ergernuß damit zu straffen/ vnnd die leut also zur forcht vnd zucht halten/ Solchen befeh hat weltliche Oberkeyt/ vnd ist grosse sünde/ wo sie gnedig sein/ vnd das schwerdt nicht flugs will gehen lassen. Das dritte vnd höchst Regiment/ ist das Kirchenampt/ dem ist auffgelegt durch das wort/ vnd nicht durchs schwerd oder gewalt alle menschen zu richten/ vnnd alle sünde zu straffen. In disen dreien stenden/ muß das gericht vnd die straff gehen/ vnd soll gar nichts vergeben noch geschencket werden/ Denn damit würde man die leut nur erger machen. Wo aber kein solcher befeh noch Regiment ist/ dir ist weder das schwerdt/ noch das wort/ noch Haußregiment befolhen/ Da sagt Christus/ sollen wir vns des richtens vnd verdammens enthalten/ vnd yederman vergeben vnd geben/ vnd verheisset/ wer solches thut/ dem wölle Gott gnedig sein/ jn auch nicht richten noch verdammen/ sonder vergeben vnd geben. So lerne nun yederman dem es nit befolhen ist/ das er andere leut zufriden lasse/ vnd nit richte/ er richte aber sich selb/ da wirdt er gnug zu schaffen finden/ seim nechsten aber sey er freundlich vnd dienstlich/ vnd lasse ja dem zorn den zaum nicht/ denn damit verdienet man Gottes vngnad. Denn mit dem maß wir andern messen/ will Got vns auch messen.

Gebet

HErr Got himlischer Vatter/ der du barmhertzig bist/ vnd vns durch Christum zusaget/ du wöllest nit richten noch verdammen/ sonder gnediglich alle sünde vergeben/ vnnd was wir bedürffen/ reichlich geben/ Wir bitten dich/ mache solches vertrauen auff dein barmhertzigkeyt/ durch deinen heiligen geyst in vnsern hertzen gewiß vnd fest/ vnd lehre vns dergleychen gegen vnserm nechsten auch thun/ das wir niemand richten noch verdammen/ yederman gern vergeben/ vnd geben/ vnnd aber vns selb richten/ vnd in deiner forcht seligklich leben, AMEN.

Am fünfften Sonntag/ wie Petrus auff den befeh Christi/ vil Fisch fahet/ Luce am 5.

PEtrus sprach: MEyster/ wir haben die gantze nach gearbeytet/ vnd nichts gefangen/ Aber auff dein wort will ich das netz auswerffen. Vnd

**da sie das theten/ fiengen sie ein grosse meng fisch/ vnnd das netz zu-
reyß.**

SOLche Histori lehret/ wie wir vns sollen halten/ wenn wir bergern glück
vnd segen zu vnser arbeit vnd beruf. Denn da Petrus vergebens fischet/ hat
er Gottes wort nicht/ vnd trawet bloß seiner kunst/ alß könne es jm nit feh-
len. Aber wenn wir allein auff vnser geschickligkeyt vnd arbeyt das vertra-
wen setzen/ gibt Gott keinen segen dazu. Wer aber Gottes wort höret/ vnd
nimbts mit glauben an/ vnnd ist bey seiner arbeyt fleyszig/ vnnd gibt Gott
nicht vrsach zur straffe/ durch sündhafftes leben/ dem will Got glück vnd
seggen geben/ Darumb lerne yederman sich fleyszig zu Gottes Wort halten/
vnnd füür sünden sich hütten/ Denn die sünde muß vnglück mit sich brin-
gen/ vnd sey darnach in der arbeoit fleyszig/ vnd trawe Got/ der vns zur ar-
beyt beruffen hat/ er werd auch seinen segen/ wie Petro/ geben/ vnd vns
gnedigklich bedencken/ Arbeyten vnd fromb sein/ gehört zusamm/ Faulent-
zen vnd müssig gehn/ oder vnfleyssig sein/ ist verboten. Soll derhalb kein
glück dabey sein/ wie Salomo sagt: Arbeytsame hende machen reich/ ver-
stehe/ das man doch gottselig dabey sey/ vnd durch sünde zum fluch vnd
vnglück nit vrsach gebe.

Gebet

O Jesu Christe/ du Son des lebendigen Gottes/ der du vnns dein liebes wort
geben/ vnd mit allerley leyblichem seggen begnadet hast/ Wir erkennen vnd
bekennen/ das wir zu solchem allem vnwürdig/ vnnd wol ergers verdient
hetten/ Vnnd bitten aber dich/ du wöllest vns/ wie Petro/ vnser sünde ver-
geben/ vnd glück vnnd heyl zu vnserm beruff geben/ auff das wir durch
dich/ zeytlich vnd ewig erhalten/ vnd beschützet/ Dich inn ewigkeyt loben
vnd preysen/ AMEN:

Am sechsten Sonntag nach Trinitatis/ ein lehr/ was Christliche Gerechtigkeit sey/ Matth. 5.

**CHRISTUS sprach: Es sey denn ewr gerechtigkeit besser/ denn der
Schriftgelerten vnd Phariseer/ so werdet jr nicht in das Himelreich
kommen.**

Die Phariseer vnd SCHRIFTgelerten/ hielten sich darumb für fromb vnd ge-
recht/ das sie eusserlicher zucht sich befließen/ vnnd für ergerlichem wan-

del sich hüteten/ Das aber noch böse neygunng vnd lüsten im hertzen waren/ solches achteten sie für kein sünde.

Darumb schleust vnser HERR Christus/ wer nicht mehr denn solche eusserliche zucht habe/ werde in hymel nicht kommen. Denn Gott gebeut in den zehen Gebotten nicht allein/ das wir böse werck vnterlassen/ vnnd gute werck thun sollen/ sonder er wil ein reynes hertz haben/ das der mensche nicht eusserlich allein/ sonder auch innerlich/ vnd nicht stückweyse/ sonder gantz fromb sey.

Wie können wir aber zu solchem hertzen kommen/ das gantz vnd gar rein vnd one sünd sey? Also. Erstlich/ wenn du sihest, ob gleich du dich für dem eusserlichen ergernuß hüttest/ das dennoch dein hertz lust vnd liebe dazu hette/ da hüte dich/ vnd sey nicht sicher/ alß wer solches kein sünd/ sonder beichte es Gott/ vnd bitt vmb vergebung/ das er solche vnreynigkeyt/ vnd böse neygunng deines hertzens nicht wölle straffen/ Darnach tröste dich des Herren Christi/ vnd hoffe durch jn genad vnd barmhertzigkeyt/ Also bist du gerecht vnd gefellest Gott wol/ denn erstlich hütet du dich für sünden/ vnnd dem eusserlichen ergernuß/ vnnd ob gleych böse neygunng im hertzen findt/ so demütigest du dich für Gott/ vnnd bittest vmb gnad/ vnd hoffest darnach/ Got werde solche böse neygunng sampt andern sünden/ vmb Christi willen vergeben/ das heist alß denn die rechte gerechtigkeit/ so für Got gilt/ vnd vns in das reych bringet. In summa/ Buß thun/ das ist/ sich für einen sündler erkennen/ vnd bessern/ vnd vergebung der sünden glauben durch Christum/ solches ist der eynige gewisse weg zum ewigen leben.

Gebet

HERR Gott himlischer Vatter/ wir bekennen das wir leyder arme/ ellende sündler sint/ da gar nichts gutes an ist/ Denn vnser hertz/ fleysch vnd blut/ ist durch die sünde dermassen vergiffet/ das wir der bösen lüste nymmer können on sein. Darumb lieber Vatter/ bitten wir dich/ vergib solchesünde/ vnnd reynige vnser hertzen durch deinen heyligen Geyst/ das wir zu deinem wort lust vnd lieb haben/ vnd vns darnach halten/ vnnd durch Christum in deiner genade ewig bleyben mögen/ AMEN.

Am sibenden sonntag nach Trinitatis/ wie der Herr JEsus mit wenig brodt/ vil menschen speyset/ in der Wüsten/ Mar. 8..

CHristus spricht: Mich jammert des volcks/ denn sie haben nun drey tag bey mir beharret/ vnnd haben nichts zu essen.

Hie hörest vnnd sihest/ das vnser lieber herr Christus auch sich darumb annimbt/ das die/ so sein wort hören vnd annemen/ zu essen haben/ vnd jammert ihn/ das sie sollen mangel leyden/ Es bleybet aber bey dem nicht/ das er sich solches mangels halb kümmeret/ da sonst nicht mehr/ denn siben brodt/ vnd ein wenig fischlein da sind/ gibt er seinen segen dazu/ das viertausent Man/ gnug dran zu essen haben.

Solches Exempel merck/ wenn du wilt/ das Gottes segen bey dir sey/ halte dich zu dem Herrn Christo/ das ist/ höre sein wort/ nimm es mit glauben vnd hertzen an/ So alß denn ein mangel fürfellet/ schreye den Herrn Christum an vmb hilff so soll es dir widerfahren/ Denn er kan niemand lassen/ der jn anruffet/ er will helffen vnnd segnen/ Wer aber des Herren Christi wort nit annimbt/ der wirt nit allein zeytliches vnfaß/ sonder auch des ewigen verdamniß sich besorgen müssen.

Gebet

HERR Gott himlischer Vatter/ der du durch deinen Son in der wüsten viertausent Mann/ Weyb vnnd kind nicht mit gerechnet/ nur mit siben broten vnd wenig fischen/ reichlich gespeysset hast/ Wir bitten dich/ sey mit deinem segen auch gnedig bey vns/ behüte für dem geytz/ vnnd sorgen der narung/ das wir dein Reich vnd dein gerechtigkeit am ersten suchen/ vnnd deine milte Vätterliche güte inn allem/ was wir zu leyb vnd Seel bedürffen/ gnediglich spüren/ durch Jhesum Christum vnsern Herrn/ AMEN.

Am achten Sonntag nach Trinitatis/ warnung der falschen Propheten halb/ Mathei am 7.

CHristus spricht: Sehet euch für/ für den falschen Propheten/ die in Schaffkleydern zu euch kommen/ jnwendig aber sindts reyssende Wölff/ An jren Früchten solt jr sie erkennen.

Es werden nicht alle die zu mir sagen: Herr Herr/ in das Himelreich kommen/ sonder die den willen thun meines Vatters im himel.

VNser Herr Jesus vermanet vnd warnet alle Christen/ das sie sondern fleyß auff reyne Christliche lehre wenden wöllen/ denn der Teuffel werde seine diener haben/ die sich stellen/ alß seyen sie rechtschaffene Prediger/ aber es

werden eytel schedliche/ verführer vnd Seelmörder sein. Darumb soll ein yeder Christ nit auff den schein/ sonder auff die rechte frucht sehen/ die heist den willen des Vaters im himel thun/ Solchs thut ein prediger/ wenn er seine zuhörer allein auff die gnade Gottes/ vnd den tod vnd die aufferstehung vnser Herren Christi weyset/ das ist damit wider die sünd/ vnd den todt/ vnd alles vnglück sich trösten/ Solchs thut ein yeder Christ/ ob er gleich kein prediger ist/ wenn er durch Christum vergebung seiner sünden glaubt/ vnd zu Gott sich aller genaden versihet/ Auff solche frucht folget gewiß das ewige leben.

Wo aber dise frucht nicht ist/ ob gleich daselb Moses Gesetz/ vnd allerley tugend vnd Gottesdienst sind/ so kan man doch zum Reych Gottes nit kommen/ noch dadurch selig werden.

Gebet

HERR Gott hymelischer Vatter/ Wir dancken dir von hertzen/ das du vns hast lassen zum erkentnuß deines lieben worts kommen/ wir bitten dich aber auch/ du wöllest vns dabey gnedig erhalten/ vnd seligklich drinn sterben lassen/ wöllest auch alle fromme prediger/ so dein wort trewlich fürtragen/ für allem ergernuß vnd anderm vnglück/ gnedig behüten/ vnd jnen jr leben fristen. Die andern aber so vntrewlich mit deinem wort vmbgehen/ vnd sich alß fromme scheflin lassen sehen/ sind aber reyssende Wölff/ die wöllest jrem verdienst nach/ straffen/ vnd jnen wehren/ Vnd dein arme Christenheyte gnedig für jnen behüten/ durch Christum Jesum deinen Son/ Amen.

Am neunden Sonntag/ vom vnrechten Haußhalten/ Luc. 16..

CHRISTUS spricht: Ich sage euch/ machet euch freud mit dem vnrechten Mammon/ auff das/ wenn jr nun darbet/ sie euch auffnemen in die ewigen hütten.

VNser Herr Jesus Christus warnet mit disem spruch/ alle reychte leute/ das sie ihr gelt vnd gut nach Gottes willen recht/ vnd wol brauchen sollen/ das ist/ den armen leuten sollen sie helffen so not leyden/ vnd jr narung entweder kranckheyt/ oder anders vnfalls halben/ nicht mehr gewinnen können/ vnd verheysset er wölle solche hilff/ so armen leuten hie auff erden geschicht/ inn yenem leben reychlich bezalen.

Solche verheissung bringet diß vrtheyl klar mit sich/ das alle/ so armen leuten wol köndten helffen/ wöllens aber vmb des guts willen nit thun/ oder thun es kerglich/ oder noch auch den leuten vmb des geytzes willen vnrecht thun/ sie vbersetzen/ oder sonst vberfortheylen/ das sie Gott in yener welt auch wölle lassen mangel leyden/ vnd vmb solcher vntrew willen ewig verdammen. Darumb sollen alle reychte diser lehre gut acht nemen/ vnnd darnach sich halten/ das sie jnen freunde mit dem vnrechten Mammon machen/ das ist/ mit gelt vnd gut/ welchs der Herr darumb vnrecht heyst/ das schie niemandt sein recht vnnd wol brauchet/ sintemal yederman sich lest beduncken/ er sey eygen Herr vber das seine/ so wir doch alle nur Schaffner vnd verwalter drüber sind/ vnd müssen Gott am Jüngsten tag rechenschafft drüber geben/ wie wirs gebraucht haben.

Gebet

HErr Got himlischer Vatter/ der du vnns reychen segen/ vnnd das tegliche brod vberflüssig hast geben/ Wir bitten dich/ behüte für geytz/ vnd erwecke vnser hertzen/ das wir armen leuten gern vnd miltigklich von solchem seggen mittheylen/ auff das wir trewe haußhalter vber deine gütter erfunden werden/ vnnd nicht müssen inn ewigkeyt darben/ wenn wir von solcher haußhaltung abgefordert/ vnd für dein gericht kommen werden/ AMEN.

Am zehenden Sonntag von der zerstörung Jerusalems/ Luce am 19.

CHRistus sprach: Jerusalem/ deine Feynde werden dich schleyffen/ vnnd keinen steyn auff dem andern lassen/ Darumb das du nicht erkennet hast die zeyt/ darinn du heymgesuchet bist.

Die herrliche Stadt JERusalem/ stehet zum ewigen Exempel da/ das wir zwey ding lernen sollen. Das erste/ wenn Gott sein liebes wort der welt offenbaret/ das yederman solches für die höchste gnad/ vnd den besten schatz achten/ es mit frewden annemen/ darauß sich besseren/ vnd frömmer soll werden. Denn diser vrsach halb schicket Got sein wort/ das wir jn dadurch erkennen/ seynen willen darauß lernen vnd thun/ vnd durch den glauben an Christum sollen endlich selig werden.

Das ander/ wer aber solche gnad nicht mit hertzen annemen/ Gelt/ gut/ macht/ ehr/ vnd anders jm mehe/ den das wort will lieben lassen/ Er hörets wol/ aber bessert sich nicht/ vnd bleybt heut wie gester/ hewer wie fernet/

da soll das vrtheyl folgen/ wie vber Jerusalem/ das Gott die verachtung seines worts/ mit zeytlichem vnfall vnd jammer/ vnd letztlich mit dem hellischen feuer straffen wil. Darumb gewehne sich yederman dahin/ das er Gottes wort fleyszig höre vnd wol lerne/ vnd sein leben darnach anrichte/ vnd bessere/ so will Gott zu allem thun/ glück vnd heyl geben/ vnnd dazu ewig selig machen/ Amen.

Gebet

ALLmechtiger ewiger Got/ der du dein wort von deinem Son Christo Jesu/ durch dein heiligen Geyst vns offenbaret/ vnd kundt hast gethon/ Wir bitten dich/ erwecke vnsere hertzen/ das wirs mit ernst annemen/ vnd ja nit in wind schlagen/ oder vnfleyssig hören/ wie dein volck/ die vnglaubigen Juden/ Auff das wir in deiner forcht/ vnd rechtem vertrauen auff deine Barmhertzigkeit leben vnd teglich zunemen/ Vnd endlich durch deinen Son/ Christum Jesum/ ewig selig werden/ AMEN.

Am eylfften sonntag/ vom Phariseer vnd Zölner/ wie sie bede im Tempel betten/ Luc. 18.

DER Zölner stundt von ferne/ wolte auch seine augen nit auffheben gen Himel/ sonder schlug an sein brust/ vnd sprach: Got sey mir sündler gnedig/ Diser gieng hinab gerechtfertiget in sein hauß. Denn wer sich selb erhöhet/ der wirt ernidriget/ Vnd wer sich selb ernidriget/ der wirt erhöht werden.

DIß ist ein schönes vnd nützes exempel/ auß welchem wir lernen/ wie wir zu vergebung der sünden sollen kommen. Diser Zölner bekennets/ er sey ein armer Sünder/ vnd erschrickt für seinen sünden dermassen/ das er so kleinmütig vnd engstig drüber wirdt/ das er nicht vnter die leut/ noch seine augen gen himel darff auffheben/ vnd dennoch bittet er vmb vergebung.

Also sollen wir auch thun/ vnsere sünde sollen wir erkennen/ vnd bekennen/ vnd vns von hertzen lassen leyd sein/ das wir dem Teuffel so lang gefolget/ vnd Gottes wort vnd willen/ so leychtfertiglich verachtet haben/ Da vmb gelts/ dort vmb ehr/ da vmb gutes lebens willen rc. Wenn nun die sünde dir also hertzlich leyd ist/ denn du sihest/ was für ein straff Gott drauff geschlagen hat/ So sihe alß denn den Son Gottes am creutz an/ tröste dich seines sterbens/ damit er für der gantzen welt sünde bezalet hat/ vnd ruffe zu Gott/ vnd bitte vmb gnad/ vnnd zweiffel nicht/ wie du bittest/ Got wölle vmb sei-

nes Sons willen dir gnedig sein/ vnd sünde vergeben/ so wirdts dir gewißlich widerfahren.

Wir sollen aber auch für vnd für/ des willen Gottes vns fleysigen/ vnd für sünden vns hütten/ Denn sonst ist es nur Heucheley/ wenn du in sünden liegen/ vnd nicht teglich dich wollest bessern.

Gebet

HErr Gott himlischer Vatter/ Ich bitte dich/ du wöllest durch deinen heyligen Geyst/ mich also leyten vnd führen/ das ich erstlich meiner sünde nicht vergesse/ noch sicher werde/ sonder in steter busse stehe/ vnd mich von tag zu tag bessere/ vnd darnach allein mich dessen tröste/das du vmb deines Suns Christi Jhesu willen/ mir gnedig sein/ alle sünde vergeben/ vnd selig wilt machen/ AMEN.

Am zwölfften Sonntag/ wie vnser Herr Jesus einen stummen/ vnd tauben gesund machet/ Marci am 7.

VNser Herr Jesus nam den stummen/ vnd taugen menschen/ füret jn besonder vom volck/ vnd leget jm die finger in die ohren/ vnnd spürtzet/ vnnd rüret seine zunge/ vnd sahe auff gen Himel/ seufftzet vnnd sprach: Hephata/ das ist/ thu dich auf/ Vnnd alß blad theten sich seine ohren auff/ vnd das band seiner zunge war ledig/ vnd redet recht.

DIB wunderwerck/ will vnser lieber Herr Christus/ für vnnd für in seiner kirchen üben/ vnd sehen lassen. Denn ob wol wir leyblich nicht stumm noch taub sind/ so sind aber vnser hertzen durch die sünde dermassen vergiftet/ das wir Gottes wort nicht hören/ noch reden wollen/ lieber hören vnnd reden wir von ergerlichen/ leychtfertigen/ vnnützen dingen/ Da hilfft denn der böse feind auch zu/ wie wir sehen/ das das junge volck fluchet/ vnd Gott lestert/ vnnd wenig andacht noch lust zur predigt hat/ Solches sind taube ohren/ vnnd gebundene stumme zungen. Disem iammer nun/ wehret vnser lieber Herr Christus/ durch seinen finger/ das ist/ durch den heyligen Geyst/ damit er die ohren öffnet/ vnnd durch seinen speychel/ das ist/ durch sein wort/ damit er die zunge löset. Denn wer Gottes wort fleysig höret/ der empfehet dadurch den heyligen Geyst/ vnd folget ferner/ das die hertzen Gottes wort annemen/ vnd gern hören/ vnd der munde den glauben bekennen/ vnd Gott vnd sein gnad rhümet vnd preysset. Solches ist vnser lieben

Herren Christi werck vnd kunst/ welche er hie leyblich an disem armen menschen bewisen hat/ An vns aber will ers geistlich beweysen/ so nur wir vns fleyszig zu seim wort halten/ Amen.

Gebet

ALmechtiger ewiger Got/ du gnediger schöpffer aller ding/ Ich dancke dir/ das du mir gesunden leyb geben/ vnnnd meine zungen/ ohren/ vnd andere glidmaß/ genedigklich für dem bösen feind behütet hast/ Vnd bitte dich/ gi-be mir dein gnad/ das ich sonderlich meine ohren vnd zunge/ recht brauche/ Mit meinen ohren dein wort fleyszig hören/ vnd wol mercken/ vnnnd mit meiner zungen/ dein gnad preysen vnd rhümen möge/ auff das niemandt durch mein zunge geergert/ sonder yederman dadurch gebessert werde/ Amen.

Am dreyzehenden Sonntag von der schriftgelerten frag/ was man thun soll/ das man selig werde/ Luce am 10..

Christus wandte sich zu seinen Jüngern/ vnnnd sprach in sonderheyt: Selig sind die augen/ die da sehen das jr sehet/ Denn ich sage euch: Vil König vnnnd Propheten/ wolten sehen das jr sehet/ vnd habens nit gesehen/ vnd hören das jr höret/ vnd habens nicht gehöret.

ES preysset vnser lieber Herre Christus/ mit disen worten die lehr des heyiligen Euangelii/ das es der höchste/ beste/ vnd edleste schatz sey/ sintemal wir allein durch das Euangelion/ zum rechten erkentnuß Gottes/ zu vergebung der sünde/ vnd dem ewigen leben kommen. Das Gesetz/ wie der Schriftgelerter hie drauff dringet/ ist wol auch ein göttliche rechtgeschaffne lehr/ Denn was kan man bessers heyssen/ denn das wir Gott von gantzem hertzen/ vnd vber alles/ vnd den nechsten alß vns selb lieben sollen? Aber es ist nit ein selige lehr/ dadurch wir köndten selig werden. Denn wir können solchem befelh nicht erfüllen/ vnser hertzen sindt durch die sünde dermassen verderbt/ das wir weder Gott/ noch vnsern nechsten können lieben wie wir solten. Ist also der fehle nicht an der lehr/ sonder an uns/ Das Euangelion aber ist die rechte selige lehr/ die selige ohren vnd augen macht/ denn es bringt vns den heyiligen geyst der zündet in den hertzen den glauben an/ das die sünde vns vergeben werden/ vnd wir newe hertzen vberkommen/ vnd Gott vnd unsern nechsten anfahen zu lieben. Ob aber gleich die

lieb so gar vollkommen nicht ist/ wie sie solte sein/ so wirdt doch was noch daran mangelt/ durch den glauben an Christum vergeben.

Gebet

HErr Gott himlischer Vatter/ Wir dancken dir von grund vnsers hertzens/ dz du vns dise selige zeyt hast erleben lassen/ das wir die selige lehr/ dein heyliches Euangelion hören/ deinen willen vnd Väterliches hertz dadurch erkennen/ vnd deinen sun Christum Jseum sehen können/ Wir biitten dein grundtlose barmhertzigkeyt/ du wöllest solches seliges liecht deines worts/ vns gnedig erhalten/ vnnd durch deinen heyiligen Geyst/ vnsere hertzen also leyten vnd füren/ das wirr nimmermehr dauon abweychen/ sonder fest dran halten/ ehe alles verlassen/ vnd endlich dadurch selig werden/ AMEN.

Am vierzehenden Sonntag von den zehen Aussetzigen/ Luce am 17.

Jesus sprach zu dem Samaritten: Sind jr nit zehen reyn worden? Wo sind aber die neune? Has sich sonst keiner funden/ der widerumb keret/ vnd Got die ehre gebe denn diser frembdlinger/ vnd er sprach zu jm: Stehe auff dein glaub hat dir geholffen.

Vnser lieber Herr Christus beweyset sein güte/ vnd mitleydentes hertz hie widerumb/ das er den armen aussetzigen/ bald sie jn vmb hillf anschreyen/ so gnediglich hillft. Aber es wird jm vbel gedanckt/ vnter den zehen ist nur einer/ der ein heyd war/ der wider kombt/ vnd solcher gnedigen grossen hillf jm danckt/ die andern neun bliben aussen/ vnd lassen sich bereden/ Christus habe sie nicht gesund gemacht/ es sey sonst an der zeyt also gewest/ Aber den Herren verdreust solcher vndanck. Derhalb lerne yederman/ Gottes gnad vnd segen erkennen/ vnd darnach auch dafür dancken/ vnd bitten/ das Gott seinen segen von vns nicht nemen/ sonder teglichen mehren wölle. Der spruch: Dein glaub hat dir geholffen/ zeuget/ wenn wir Gott anruffen/ vnd etwas von hm begern wöllen/ das wir allein auff sein gnad vnd barmhertzigkeyt sehen/ vnd der selben vns trösten sollen/ so soll hillf vns widerfaren.

Gebet

HErr Gott himlischer Vatter/ du hast durch deinen sun/ Christum Jesum vns glaubigen allen/ von dem grewlichen Aussatz der sünde/ durch dein wort vnd heyilige Tauff gnediglich geholffen/ vnd beweysest noch tegliche gne-

dige hilff/ in allem was wir bedürffen. Wir bitten dich/ erwecke vnsere hertzen/ durch deinen heyiligen Geyst/ das wir solcher wolthat nimmer mehr vergessen/ sonder in deiner forcht vnd hertzlichem vertrauen auff deine Barmhertzigkeyt für vnnd für leben/ vnd mit frölichem hertzen dir immerdar dancken/ vnnd dich loben/ AMEN.

Am fünffzehenden Sontag/Matthei am 6.

CHRistus spricht: Ir solt nicht sorgen/ vnnd sagen: Was werden wir essen? Was werden wir drincken? Womit werden wir vns kleyden? Nach solchem allem trachten die Heyden/ Denn ewer himlischer Vatter/ weyß das jr das alles bedürffet. Trachte am ersten nach dem Reych Gottes/ vnnd nach seiner gerechtigkeit/ so wirdt euch solches alles zufallen.

DIEß ist ein nötige waarnung das wir Christen/ vnsers beruffs vnd arbeyt trewlich warten/ vnd aller zeitlicher sorg vns entschlagen/ Got aber im himel drumb trawen sollen/ wie er durch seinen segen vns enthalten/ vnd was wir bedürffen/ schaffen werde. Dahin aber sollen wir alle sorg vnnd fleyß wenden/ das wir zu Gottes reich/ das ist/ zu Gottes wort/ vnnd seiner gerechtigkeit/ das ist/ zu vergebung der sünden kommen. Wenn wir das haben/ so hat es nicht not/ Denn wir haben einen Vater im himel/ der vns seine kindlein nicht wirdt lassen not leyden/ er weyß was wir bedürffen/ will es auch nach notturfft vns widerfaren lassen. Solches ist ein nötige lehr/ aber leyder der weniger teyl folget/ Des sorgens können wir nit lassen/ vnnd wöllen mit dem glauben nit hinan/ Nun hengen aber dise zwey grosse vnglück an der sorg/ das wir erstlich nichts damit außrichten. Denn es ist alles allein an Gottes segen gelegen. Zum andern/ ists auch ein grosse sünd/ die vns vom Gottesdienst gar abzeucht/ vnd macht Mammons knechte auß vns. Darumb lerne yerderman für der sorge sich hüten/ Nemme sich aber mit hertzen vnd ernst vmb Gottes wort an/ vnnd sey in seim beruff/ vnd in der arbeyt fleyssig/ vnd lasse Gott sorgen/ wie wir ernehret werden.

Gebet

HERr Gott himlischer Vatter/ Wir dancken dir für alle deine wolthat/ das du leyb vnd leben geben/ vnd bißher vns gnedigkliich erhalten hast/ Vnd bitten dich/ nimme deinen Segen nicht von vns/ sonder behüte für dem geytz/ auff das wir dir allein dienen/ dich lieben/ vnd dir anhangen/ vnd vns nit mit Abgötterey vnd dem schedlichen Mammonßdienst versünden/ sonder alle hoff-

nung/ trost vnnd zuuersicht/ allein auff dein güte vnd gnad setzen/ durch Christum deinen Sun/ vnd vnsern Herren/ AMEN.

Am sechzehenden Sontag/ wie Christus den todten Sun/ einer Wittib auffwecket/ Luc. 7.

DER Herr Jesus trat hinzu/ vnd rüret den Starck an/ vnd die treger stunden/ vnd er sprach: Jüngling ich sage dir/ stehe auff/ vnnd der todte richtet sich auff/ vnnd fieng an zu reden/ vnd er gab jn seiner Mutter.

Diß herrlich wunderwerck ist zum sondern trost allen Christen geschriben/ auff das wir lernen/ durch den Herrn Christum vns wider den tod trösten. Denn sihe/ da sonst alle welt vber einen todten menschen stunde/ schrie/ rüttele/ vnd thete was zu thun möglich ist/ so wer es doch alles vmb sonst. Aber vnser lieber Herr Christus spricht nur eyniges wort: Jüngling ich sage dir/ stehe auff/ Solches wort ist so krefftig das es der verstorbne jüdling höret/ vnnd bald solchem wort nach/ auffstehet vnd wider lebet. Also sihest wie des Herrn Christi wort allein/ die rechte artzney wider den tod ist/ Derhalb so du wilt/ das dir vom tod auch geholffen werde/ vnnd du zum rechten leben kommen mögest/ halte dich zu Christo/ der ist der Herr vber den tod/ der tod ist im nur ein schlaff/ mit eim wort kan er dir helfen/ da sonst alle hilff vmb sonst vnd vergebens ist.

Gebet

HErr Gott himlischer Vatter/ der du deinen Sun hast lassen mensch werden/ das er erstlich mit seinem tod für vnser sünde bezalen/ vnd darnach vns vom ewigen tod helffen soll/ Wir bitten dich erhalte vns in solcher hoffnung/ auff das wir ia nicht dran zweyffeln/ wie vnser lieber Herr Christus der Witwen sun/ durch sein wort hat aufferwecket/ das er der gleichen vns am Jüngsten tag auch aufferwecken/ vnd ewig werde selig machen/ Amen.

Am sibenzehenden Sontag/ wie der Herr Christus inn eins Phariseers hause/ am Sabbath einen Wassersüchtigen gesund machet/Luce am 14.

WER sich selb erhöhet/ soll ernidriget werden/ vnnd wer sich selbs ernidriget/ der soll erhöht werden.

Christus beweyset sich hie wider/ das er sich vnsers ellends vnd jammers annemen/ vnd vns gern wil helffen/ in allerley nöten. Derhalben sollen wir vns zu jm halten/ vnd durch glaubiges gebet solche hilff bey jm suchen. Es ergert aber die Phariseer/ das er solches gutes werck auf einen Sabbath thut/ Darumb verantwortet sich der Herr/ vnd lehret man soll sonderlich auff den Sabbath sich fleysigen/ das man armen leuten helffe. Denn Gottes gebot heyst nicht/ das man auff dem Sabbath gar müssig gehen/ vnd nichts thun soll/ sonder das man jn heyligen/ das ist/ mit heyligen wercken sol zu bringen. Nu sind aber das heylige werck/ Gottes wort hören/ andere in Gottes wort vnterrichten/ zum gebet vnd Gottesdienst/ bey andern Christen sich sammeln/ Almosen geben/ vnnd in andere wege armen dürfftigen leuten dienen/ Mit solchen wercken wirdt der Sabbath nicht gebrochen/ sonder nach Gottes willen geheyliget. Das westen die Phariseer nicht/ die hoffertigen heyligen/ Legtens derhalb dem Herren vbel auß/ aber er sagt/ weil sie hoffertig sindt/ werde sie Got demütigen.

Gebet

HErr Got himlischer Vatter/ Wir bitten dich/ du wöllest durch deinen heyligen Geyst/ vns also regieren vnnd füren/ das wir in deiner forcht vns halten/ vnd nicht hoffertig werden/ sonder mit gantzem hertzen dein wort hören/ vnd annemen/ vnd den Sabbath recht heyligen/ auff das durch dein wort wir auch geheyliget werden/ erstlich also/ das wir auff deinen Sun Jesum Christum/ all vnser vertrauen vnd hoffnung setzen/ das er allein sey vnser gerechtigkeit vnd erlösung/ vnd darnach/ das wir vnser leben nach dienem wort auch bessern/ vnd für allem ergernuß vnns hüten biß wir durch dein gnad in Christo ewig selig werdn/ AMEN.

Am achzehenden Sonntag wie der Schrifftgelerte erstlich Christum fraget/ von dem fürnemesten gebot im Gesetz. Christus aber die Phariseer widerfraget/ wens Sun Christus sey/ Matth. 22.

DU solt Gott lieben von gantzem hertzen/ von gantzer seel/ vnd von gantzem gemüt/ Diß ist das fürnemest/ vnd das gröste Gebot. Das ander aber ist dem gleych/ Du solt deinen nechsten lieben alß dich selbs/ In disen zweyen gebotten/ Hanget das gantze gesetz vnd die Propheten.

Dise zwo fragen schicken sich sehr fein auff einandern/ vnd ist gleych alß in einer summa/ drinn angezeygt/ was ein yeder Christ wissen soll. Ein yeder Christ soll erstlich das Gesetz wissen/ in welchem Gott vns lehret/ was er von vns wölle haben/ das wir thun sollen. Solches stehet auff disen zweyen haubtpuncten/ das wir Gott vnnd vnsern nechsten von hertzen sollen lieben. Diß ist der höchste/ vnd beste Gottesdienst/ den wir durch vnser gantzes leben leysten/ vnnd dawider nichts thun sollen. Aber da findet sich ein grewlicher mangel an vns menschen allen/ das vnser hertzen durch die sünd verderbet sind/ vnnd vns vnmüglich ist/ solche lieb reyn vnd vollkommen leysten/ Darumb müssen wir/ neben dem Gesetz auch das Euangelion haben vnd wissen/ das lehret vns/ wens Sun Christus sey/ Ein mensch ist er/ vnd kombt von Dauids same her/ Vnnd dennoch heyst jn Dauid seinen Herrn/ vnnd saagt: Gott heysse jn zu seiner rechten sitzen/ Solches zwinget/ das/ Christus nicht allein ein mensch/ sonder auch Gott istt/ Da folget nu ferner/ das du lernest/ warumb er am Creutz stirbt/ warumb er von todten wider aufferstehet rc.

Es sagt aber das Euangelion/ es sey geschehen vmb vnser sünde willen/ das die selben versöhnet würden/ vnd vmb vnser gerechtigkeit willen/ das wir in Gottes gnade ewig bliben. Durch solche predigt wirdt der heylig Geyst vns mitgetheylet/ der macht newe hertzen in vns. Also wirdt vns durch den glauben an Christum vergeben/ was wir wider Gottes Gesetz gesündigt haben/ vnnd der heylige Geyst hilfft vns/ das wir doch etwas vom Gesetz thun. Wer solches von Christo nicht weyß/ wie die Phariseer hie/ dem ist das gesetz nur ein last/ vnd fluch/ vnd hilfft zur verzweyfflung vnd tod.

Gebet

HErr Gott himlischer Vatter/ Wir sind ja arme ellende sündler/ Deinen willen wissen wir/ aber wir sind zu schwach/ wir können jn nicht erfüllen/ fleysch vnd blut ist in vns zu starck/ So lest der leydige feind der Teuffel/ vnns auch nicht zu friden/ Darumb bitten wir dich/ du wöllest deinen heyligen Geyst inn vnser hertzen außgiessen/ das wir mit festem glauben/ vns an deinen Sun Christum Jesum halten/ seines todts vnd sterbens vns trösten/ vnnd volle vergebung aller sünden/ durch ihn glauben/ Vnnd also hie auff erden in deinem willen vnnd gehorsam heyligklich leben/ vnd auff dein gnad/ durch Christum Jesum seliglich sterben mögen/ Amen.

Am neunzehenden Sontag/ wie Christus einem Gichtbrüchtigen menschen seine sünde vergibt/ vnd jn gesund machet/ Matth. 9.

CHristus sprach: Auff das jr wisset das des menschen Sun macht habe/ die sünde zu vergeben auff erden/ sprach er zu dem Gichtbrüchtigen: Stehe auff/ heb dein bette auff/ vnd gehe heym/ vnnd er stund auff/ vnd gieng heym.

ERstlichj lernen wir im heutigen Euangelio/ wie kranckheyt durch sünde verursacht werde/ Sonst solte der Herr dem Gichtbrüchtigen nicht ehe vergebung der sünden haben zugesagt/ denn jn geheylet. Derhalb weil doch yerman kranckheyt scheuhet/ vnd gern gesund leyb behalten wolt/ soll sonderlich das junge volck ksich für sünden hüten/ vnd in Gottes forcht wandeln/ Vnd wen Got angriffen/ vnd mit kranckheit beladen hat/ der versöne sich am aller ersten mit Gott/ vnd sehe wie er von sünden ledig wer/ so soll es mit der kranckheyt sich auch bald bessern.

Zum andern lernen wir hie/ wo wir vergebung der sünden sollen suchen/ Nemlich/ anderswo niergend/ denn bey dem Herrn Christo/ Der hat das predigamt/ vnd die heyligen Sacrament/ hinder sich auff erden gelassen/ vnd befolhen in seinem name Buß vnd vergebung der sünden zu predigen/ Derhalb so du vergebung deiner sünden begerest/ suche es in dem wort vnd bey den sacramenten/ vnd was das wort dir durch Christum zusagt/ das nimm mit vnzweyffentlichem glauben an/ so soll es dir also widerfaren.

Gebet

ALLmechtiger Ewiger Gott/ der du durch deinen Sun Christum Jesumm dem Gichtbrüchtigen menschen an leib vnd seel/ hast gnediglich helffen lassen/ Ich bit dein grundlose barmhertzigkeyt/ sey mir auch genedig/ vnnd vergib alle meine sünde/ stercke meinen glauben/ durch dein wort vnd heyligen Geyst/ vnnd leyte mich also/ das ich nit durch sünde zur kranckheyt/ vnd anderm vnglück/ vrsach gebe/ sonder in deiner forcht mich halte/ vnd also vom zeytlichen vnnd ewigem zorn vnd straff erledigt werde/ AMEN.

Am zwentzigsten Sontag/ Das gleychnuß von der Hochzeyt/ da etliche gest nit auff wöllen/ etliche

aber kommen/ vnd haben kein hochzeytlich kleyd an/ die werden wider hinnauß gestossen/ Matth. 22.

DER König gieng hinein die geste zu besehen/ Vnnd sahe alda einen menschen/ der het kein hochzeytliches kleyd an/ vnd sprach zu jm: Freund/ wie bist du herein kommen/ vnd hast kein hochzeytlich kleydt an? Er aber verstummet. Da sprach der König zu seinen knechten/ Bindet jm hende vnnd füsse/ vnd werffet jhn in das finsternuß hinauß/ Da wirdt sein heulen vnnd zeenklappen/ Denn vil sind beruffen/ aber wenig außerwelet.

Die Hochzeit ist nichts anders/ denn die predigt des heyligen Euangelij/ in welcher vns Got durch seinen Sun anbeudet/ vergebung der sünden vnd ewiges leben/ Solcher predigt wolten die Juden nicht/ Denn sie gedachten/ sie hetten an Mose vnd dem Gesetz gnug zur seligkeyt/ vnd bedörfften des Herrn Christi/ vnd seines worts nichts dazu. Etliche/ wie noch heuttigs tages geschicht/ machten ihn mit dem zeytlichen so vil zu schaffen/ das sie nicht weyl hetten/ mit dem Euangelio vmbzugehen/ Alß nun Gott die Juden liesse faren/ vmb ires vnglaubens willen/ vnnd beruffet zu diser Hochzeit die Heyden/ kamen sie mit grossem hauffen. Aber da finden sich etliche die haben kein hochzeytliches kleyd an/ In der heyligen Tauff wirt vns ein reynes schönes kleyd angezogen/ Nemlich vergebung der sünde durch Christum vnd gerechtigkeit. Solches kleyd sollen wir reyn vnd sauber behalten/ im glauben teglich wachsen vnd zunemen/ vnnd für sünden vns hüten/ Ob wir aber fallen/ vnd durch sünde solches kleyd wider besudlen/ sollen wir Buß thun/ das ist/ von den sünden ablassen/ vnnd vmb gnad bitten. Aber der meyste theyl gehet in sünden on alle bußfertigkeyt hin/ Dise haben kein hochzeytlich kleyd/ vnd ob sie wol hie auff erden sich bergen können/ sollen sie doch an yenem tag/ außgestossen/ vnnd vmb jrer sunden willen/ mit der ewigen flammen gestraffet werden. Ist derhalb diß Euangelion ein warnung vnd vermanung/ das wir Gottes wort fleyszig hören/ vnd vns darauß bessern/ oder des ewigen zorns gewarten sollen.

Gebet

HERR Gott himlischer Vatter/ Ich dancke dir für dein grosse barmhertzigkeit/ vnnd gütigkeit/ das du mich zu deinem lieben wort auff die fröliche

hochzeyt/ kommen lassen/ vnd durch deinen Sun/ mir all meine sünde vergeben hast. Weil aber der teglichen anfechtung/ ergernuß vnnd fahr/ so vil ist/ vnd wir für vns selb sehr schwach/ vnd zur sünden hefftig geneyget sind/ Bitt ich dich/ du wollest durch deinen heyligen Geyst/ mich für alle fäll gnedig behüten/ Vnd aber wo ich falle/ vnnd also mein kleyd/ welches mir dein lieber Sun Christus Jesus angezogen hat/ besudle/ gnedig wider auffhelffen/ vnd mich zur rechten buß/ vnd warem glauben/ auff dein barmhertzigkeyt leyten/ vnd in ewigkeyt nicht sincken lassen/ Amen.

Am ein vnd zwentzigisten Sonntag wie der herr Jesus des königischen Sun gesund macht/ Jo. 4.

DER Königische sprach zu Jesu: Herr/ komme hinab ee denn mein kind stirbet. Jesus spricht zu jm: Gehe hin(dein Son lebet/ Der mensch glaubet dem wort/ das Jesus zu ihm saget/ vnd gieng hin.

DAs ist ein sehr feine Histori/ da wir erstlich jnne sehen/ wie vnser lieber HERR Christus so gern vnnd willig hilfft/ wenn wir nur vmb hilff bey jm ansuchen/ vnnd das vertrauen zu jm haben.

Zum andern/ lernen wir an dem Königischen/ was ein rechte glaube sey/ vnd wie er für vnnd für wachse vnd zuneme/ Er hette das vertrauen zu Christo/ er würde seinem krancken Son helffen/ Aber solches vertrauen war noch gering vnd schwach. Denn er gedacht/ wenn der Herr nit gegenwertig wer/ würd er nicht können helffen/ Darumb straffet jhn der Herr/ Wenn jr nit zeychen vnd wunder sehet/ spricht er/ so glaubt jr nicht/ Das ist/ jr wölt den glauben inn den henden haben/ vnnd nichts glauben was jr nit sehet. Aber glauben heyst/ sich an das wort halten/ vnd das vrtheyl nicht stellen nach dem die Augen sehen/ sonder nach dem die ohren hören. Derhalb da der Königische ferner vmb hilf anhelt/ gibt der Herr jm das blosser wort/ das er spricht: Gehe hyn/ dein Son lebet/ Solches wort glaubt der Königisch/ vnd gehet hyn in vollem vertrauen/ wie der Herr gesagt hab/ also sey es/ vnd findet sich auch also in der erfahrung. Dahin soll vnd muß es mit vnns auch kommen/ soll vns geholffen werden. Vergebung der Sünde/ Gottes gnad/ vnd das ewige leben/ sehen wir mit auchgen nicht/ wir hörens aber im wort/ Wer nu das wort mit glauben annimbt/ vnd zweiffelet nit/ dem soll geschehen wie er glaubet/ Vnd ob er gleich noch sünde fület/ sollen doch die sünde durch Christum jm vergeben sein/ Ob er gleych nichts denn den todt sihet vnnd fület/ soll doch das ewige leben gewiß folgen/ Wie der Herr

etlich mal sagt: Dir geschehe wie du glaubest. Weyl aber der glaub nicht ein werck ist/ das wir von vns selb vermögen/ der heilige Geyst muß es geben/ Derhalb soll ein yeder Christ Got ernstlich drumb bitten/ vnd fleyssig sich zu Gottes wort halten.

Gebet

ALLmechtiger ewiger got/ der du durch deinen Son/ vergebung vnser sünde/ gerechtigkeit vnd ewiges leben/ vns hast verheyssen/ Wir bitten dich/ du wollest durch deinen heyligen Geyst/ vnser hertzen also füren vnd erwecken/ das wir solche hilff durch tegliches gebet/ vnd sonderlich inn allen anfechtung bey jm suchen/ vnd durch ein rechten festen glauben/ auff sein zusagung vnd wort/ gewiß finden vnd erlangen/ Vnd endlich durch jn ewig selig werden/ AMEN.

Am zwey vnd zwentzigsten Sonntag/ Das gleychnuß vom knecht der seym Herrn zehen tausent pfund schuldig war/ vnnd hette nicht zubezalen/ Matth. 18.

PEtrus sprach zum Herrn Jesu: Wie oft muß ich denn meinem Bruder vergeben/ der an mir sündiget? Ists gnug siben mal? Jesus spricht zu jm: Ich sage dir nicht siben mal/ sonder sibentzig mal siben mal.

DAs gleichnuß von dem knechte/ der seinem Herrn schuldig war/ vnd nicht kondt bezalen/ lehret vnns wie Gott sich gegen vns wölle halten/ vnd wir vns gegen den leuten halten sollen. Alle menschen auff erden sind Gott schuldig/ vnnd ist nicht möglich/ das sie können bezahlen. Denn in sünden sindt wirr geboren/ vnnd ist vns vnmöglich/ das wir vns selb von sünden helffen/ vnd die verderbte natur köndten endern. Darumb gehet des gesetzes sententz vnd vrtheil vber vns/ das wir den todt verschuldet habenn. Wer nu solchen iammer sihet vnd weyß/ vnd lest jm sein sünde leyd sein/ vnd gedendet der schulde nicht mehr zu machen/ vnd bittet alß denn Gott vmb gedult vnd vergebung/ vnd hoffet durch Christum vergebung/ Dem will Gott alle schuld nachlassen/ vnd schencken frey lauter vmb sonst/ vmb seines Sons Christi Jesu willen.

Da soll aber ferner folgen/ gleych wiie Gott vns gnedig ist/ vnd gern alles vergibt/ wenn wir jhn drumb bitten/ das wir der gleichen mit vnserm nech-

ten auch thun/ gern alles vergeben/ vnd vns nicht rechnen sollen/ Wer es aber nicht thun/ mit den leuten vnfreundlich sein/ vnd nichts will nachlassen/ Dem will Got auch also thun/ vnd nit das wenigste nachlassen. So last nun vns Gottes genad/ sso durch Christum vns widerfaren ist/ erkennen/ vnd jm drumb dancken/ vnd gegen vnserm nechsten auch alle freundlichkeyt vnd dienst beweysen/ vnd allen zorn faren lassen.

Gebet

ALLmechtiger ewiger Got/ wir erkennen/ das wir arme sündler sind/ vnnd tieff in deinem regiester stehen/ Wir dancken dir aber von hertzen/ das du solche schulde von vns genommen/ auff deinen lieben Son/ Christum Jesum geleet/ vnnd jn für vns hast bezalen lassen. Vnnd bitten dich auch/ du wölest in solchem glauben vns gnedig erhalten/ vnd durch deinen heyligen Geyst/ hie auff erden also leyten vnd füren/ das wir deinem willen nach leben/ vnd vnserm nechsten alle lieb/ dienst vnnd hilffe geren beweysen. Wiederumb/ allen zorn/ vngedult vnnd rachgirigkeyt fallen lassen/ auff das wir deinen zoren wider vns nicht erregen/ sonder immerdar einen genedigen Vatter durch Christum Jesum an dir haben. Der mit dir vnd dem heiligen Geyst/ lebet vnd regieret/ von ewigkeyt zu ewigkeyt/ AMEN.

Am drey vnd zwentzigsten Sonntag/ wie die Pharisser Christum versuchen/ ob man dem Keyser sollen zinß geben/ Matth. 2.

CHRISTUS spricht: Gebt dem Keyser/ was des Keysers ist/ vnd Got was Gottes ist.

DIE welt hat die vnart/ dass sie in keinem ding maß helt. Wenn sie anfahet geistlich zu werden/ so wil sie gar geistlich sein/ wie die München vnnd Pfaffen/ sich allem weltlichen gehorsam entzogen haben/ vnter dem schein/ das sie Got möchten recht dienen. Also wo die leut in die welt hendel gerathen/ fragen sie lauter nichts nach Gott/ nach seim wort/ nach dem gewissen/ nach dem ewigen. Also liessen sich die Juden auch beduncken/ Sie köndten nicht zu gleich dem Keyser zu Rom/ vnd Gott dienen/ Aber der Herre strafet solche meynung/ Vnd sagt/ es soll beides beysamm bleiben/ das man dem Keyser gebe/ was des Keysers ist/ vnd Got geben/ was Gottes ist/ Das ist/ Gott will nicht alles von vns haben/ Wenn wir jm mit dem hertzen/ in rechtem glauben/ forcht vnd anruffung dienen/ vnd vnsern nechsten lieben/

da will er mit zu friden sein. Widerumb sollen wir aber dem Keyser auch nicht alles geben/ Der hat vber gelt vnd gut zugebieten/ vnd vber den leyb/ da sollen wir ihm mit dienen/ das will Gott haben/ das wir also in disen zweyen diensten/ vnsern gehorsam gegen Gott/ vnd weltlicher Oberkeyt beweysen sollen/ Wo aber der gehorsam sich stossen/ vnd weltliche Oberkeyt Gott das seine nemen wolt/ da soll man nicht den menschen/ sonder Gott gehorchen/ vnnd drüber leyden/ was zu leyden vns fürfelt.

Gebet

HErr Got himlischer Vatter/ Wir dancken dir/ das du bißher genedigen frid geben/ vnd für krieg vnd frembder Herrschafft vns Vätterlich behütet hast/ Wir bitten dich/ gib dein gnad ferner/ das wir in deiner forcht/ vnnd nach deinem willen leben/ vnnd durch sünde nicht vrsach zu krieg/ vnnd andern der gleychen straffen geben. Regiere vnd füre vnser Oberkeit also/ das sie deinen gehorsam nit hindere/ sonder fürdere/ vnd wir dest mehr segens vnd glücks/ vnter jrem Regiment haben mögen/ AMEN.

Am vier vnd zwentzigsten Sonntag/ wie vnser lieber Herr/ des Obersten Tochter vom todt auffwecket/ vnnd vnter wegens dem krancken Weyblein holfft/ Matthei am 9.

DAs Weyblin sprach bey ihr selb: Möchte ich nur sein kleyd anrüren/ so würde ich gesundt/ Da wendet sich Jesus umb/ vnd sahe sie/ vnd sprach: Sey getöst mein Tochter/ dein glaub hat dir geholffen/ Vnd das Weyb war gesundt/ zur selben stundt.

Alß Jesus in des Obersten hauß kam/ vnd sahe/ die Pfeyffer vnd das getummel des volcks/ sprach er zu jnen: Weyhct/ denn das Medlin ist nicht todt/ sonder es schlefft.

DAS sindt zwo treffenliche Histori/ in der ersten sehen wir/ wie ein so gewaltiges mechtigs ding es vmb den glauben sey/ wo man alles gutes sich zum Herrn Christo versihet/ vnd auff sein hilff hoffet. Denn da disem weyblin zwölff gantze Jar/ kein Artzt noch ärztney kondte helffen/ wirdt sie yetzund in eim augenblick gesund/ da sie des Herren Christi kleyd anrüret. Solche krafft ist nicht im kleid Christi gesteckt/ Denn andere leut haben es auch angerüret/ aber dadurch ist jnen nicht geholffen/ Allein der glaub vnd

das vertrauen/ auff den Herrn Christum hat es thun/ das sie den Herren Christum dafür hielte/ er würde jhr helffen/ wenn sie nur sein kleyd köndte anrühren. Solchem Exempel sollen wir folgen/ vnd Gottes wort mit fleyß mercken/ vnnd mit gantzem hertzen drran hangen/ was es vns durch Christum zusaget/ das es gewiß muß geschehen/ es scheyne gleych so vnmüglich für der vernunfft alß es ymmer könne.

Die ander Histori/ vom verstorbnen Meydlin ist auch tröstlich. Denn Christus gehet nicht anders mit jhm vmb/ denn alß schlieffe es/ Er nimbt bey der hand/ wie man ein schlaffendes mensch auffmündert/ bald stehet das Meydlin auf/ vnd lebet. Derhalb sollen wir den todt ansehen/ nicht wie er gegen vns ist/ Denn wir sind jm zu schwach/ er tödet vns alle/ sonder wie er gegen dem Herren Christo ist/ da ist er nicht ein todt/ sonder ein schlaff/ Vnd ist gewiß/ alle so an Christum glauben/ sterben nicht/ sonder entschlaffen/ Vnd ist dem Herrn Christo nur vmb ein wort zu thun am Jüngsten tag/ so werden sie auß dem schlaff aufwachen zum ewigen leben.

Gebet

ALLmechtiger ewiger Gott/ der du durch deinen Son/ vergebung der sünden/ vnd rettung wider den ewigen todt/ vns hast zugesaget/ Wir bitten dich/ stercke vns durch deinen heyligen Geyst/ das wir inn solchem vertrauen auf dein gnad durch Christum/ teglich zunemen/ vnnd die hoffnung fest vnd gewiß behalten/ das wir nicht sterben/ sonder sanfft entschlaffen/ vnnd durch deinen Son Christum Jesum am Jüngsten tag/ zum ewigen leben wider solen aufferwecket werden/ AMEN.

Am fünff vnd zweintzigsten Sonntag/ vom gewel der verwüstung/ Matth. 24.

WENN ihr sehen werdet den gewel der verwüstung/ das er stehet an der heiligen stett/ Alß denn flihe auff die berge/ wer im Jüdischen Land ist. Bittet aber das ewre flucht nit gescheh im winter/ noch am Sabbath.

DAS ist ein warnung für die Christen/ das sie der straffe/ so uber die vnglaubigen Juden ergehn must/ entgehen solten. Denn diß hat Gott ye vnd ye gethon. Gleich wie er den rohen Gottlosen hauffen/ endlich heimsuchet vnd straffet/ Also errettet er die/ so jn fürchten/ vnd sein wort vor augen haben. Wie Petrus spricht: 1. Pet. 2. Der Herr weyß die gottseligen aus der versu-

chung zuerlösen/ Die vngerechten aber/ behalten zum tag des gerichts zum peynigen.

Gleich aber/ wie bey den Juden/ die verwüstung muste folgen/ da der gewel an der heyiligen Stedte stunde/ das ist/ da an stadt das wort Gottes/ die lügen vnd lestereung/ vnd an stadt des heyiligen Gottesdiensts/ die Abgötterey mit gewalt gienge/ Also gehet es noch heutiges tages/ wo man wider Gottes wort tobet/ es verfolget/ Abgötterey verteydigt/ vnd der gleychen thut/ da hoffe niemmandt bessers/ es muß mit solchen leuten zu boden gehen/ wenn sie gleich die mechtigsten auff erden weren.

#es ist aber tröstlich für die Christen/ das der Herr sie heyst betten/ das jr flucht nicht geschehe im winter/ da das reysen schwer ist/ oder am Sabbath/ da es den Juden verboten war/ Denn damit lehret er/ es wölle Gott das gebet der seinen erhören/ vnd die straff vmb jres gebets willen lindern/ Derhalb muß es bedes beysammen sein/ das wir Gottes wort fleyszig hören/ vnd es mit hertzen annemen/ vnd vns drauß bessern/ vnnd das wir mit dem gebet stetigs anhalten/ das Gott für vnglück behütten/ sünde vergeben/ vnd vmb Christus willen vnser schonen wölle/ Amen.

Gebet

HErr Got himlischer Vatter/ wir dancken dir hertzlich/ das du vns auß dem schedlichen jrrthumb des Bapstumbs/ durch dein wort gefüret/ vnd zum rechten liecht deiner gnaden gebracht hast/ vnd bitten dich/ du wöllest inn solchem liecht vns gnedig erhalten/ für allem jrrthumb vnd ketzerey bewaren/ vnd ia dafür behüten/ das wirr nicht wie die Juden dir vndanckbar werden/ dein wort verachten oder verfolgen/ sonder/ das wirs mit gantzem hertzen annemen/ vnser leben darnach bessern/ vnd alles vertrauen allein auff dein gnad vnnd verdienst deines lieben sons Christi Jesu setzen/ Der mit dir vnd dem heyiligen Geyst/ lebt vnd regieret/ von ewigkeyt zu ewigkeyt/ Amen.

An Sanct Andreas tag/ Wie er zum Herren Christo kommen/ vnnd zum Apostelamt beruffen sey/ Johannis am 1.

DEs anderen tages stundt abermal Johannes/ vnd zween seyner Jünger/ Vnd alß er sahe Jesum wandeln/ sprach er: /Sihe/ das ist Gottes

Lamb&/ Vnnd zween seyner Jünger höreten jn reden/ vnd folgeten Jesu nach. Der eine aber auß den zweyen/ war Andreas Simonis Bruder.

DER Euangelist zeygt klar an/ wie der heyliche Andreas durch die predig Johannis des tauffers verursacht sey/ das er anfencklich zum Herren Christo kommen ist. Derhalb ist an solcher predig am meysten gelegen/ Vnd ist noch die hoffnung gewiß/ wo mans fleyszig den leuten fürhelt/ das sie/ wie Andreas/ auch zum Herren Christo dadurch geleytet werden.

Da vnser lieber Herr Christus auff erden ist vmbgangen/ hat er kein sonders ansehen gehabt/ wie Johannes der Tauffer zu den Juden sagt: Er ist mitten vnter euch getretten/ vnd jr kennet jn nit/ Alß es sich aber auff einen tag begibt/ das der Herr am Jordan gehet/ deutet Johannes auff jn/ vnd spricht: Diß ist Gottes lamb/ Bald Andreas vnd sein gesell solches hören/ folgen sie dem Herren Christo nach/ Denn sie verstehn/ was Johannes mit disem wort meynet/ das er jn Gottes lamb heisset. Der Prophet Esaias hette lang zuuor gesaget/ der Messias würde wie ein lemblein/ das zur schlachtbanck gefüret wirdt/ seinen mundt nicht auffthun. Das aber Johannes jn nicht schlecht ein lamb/ sonder Gottes lamb nennet/ deutten sie dahyn/ das Gott disen Jesum/ seynen Son/ dazu verordnet habe/ das er soll ein opffer sein/ vnd für der gantzen welt sünde mit seinem blut bezalen. Derhalb wollen sie/ bey disem Lemblin bleiben/ Gottes willen von jm lernen vnd hören/ vnd seines opffers sich trösten. Das sollen wir auch thun/ vnd allein vns an disen menschen halten/ der für vns gestorben ist/ Andere heiligen sind für vns nit gestorben/ können vns auch nicht helffen. Darumb sollen wir sie weder anruffen/ noch auff sie vertrauen/ An dem Sone Gottes aber/ der für vnns gestorben ist/ können wir nicht fehlen wie die verheyssung lautter ist.

Gebet.

HERR Gott himelischer Vatter/ der du durch den heylichen Johannem am Jordan/ deinen son Christum Jesum inn der welt hast offenbar gemacht/ Wir bitten dich/ du wöllest auch vnser hertzen durch deinen heylichen geyst rüren/ das wir mit dem heylichen Andreas/ vns solcher predig von deynem Son hertzlich annemen/ jhn für vnsern Seligmacher erkennen/ vnd jm nachfolgen/ vnd ja kein verfolgung vns von ihm lassen abweisen/ biß wir durch jn gar selig werden/ AMEN.

An Sanct Thomas tag/ Johannis am 20.

CHristus spricht zu Thoma: Dieweyl du mich gesehen hast Thoma/ sso glaubest du/ Selig sind/ die nicht sehen/ vnnd doch glauben. Dise zeychen sind geschriben/ das jr glaubt/ Jesus sey Christ/ der Son Gottes/ vnnd das jr durch den glauben/ das leben habet in seinem namen.

DAs Exempel mit Thoma/ ist geschriben zum sonderen trost/ den schwachglaubigen Christen/ Denn weyl wir wissen/ das der glaub allein vns selig machet/ vnd aber befinden wie wir im glauben so gar schwach sind/ vnd bald auch in geringer anfechtung vnnd not/ alle hoffnung fallen lassen/ daher fürchten wir vns/ vnnd besorgen/ Gott wölle vnser nicht. Aber da nimb des Apostels Thome exempel für dich/ vnd sihe erstlich wie so inn eim grossen vn glauben er stecket/ Er glaubt von dem Herrn Christo mer nit/ denn von eim andern menschen/ Vnd da die weyber/ Petrus die zween iünger von Emahus/ vnd hernach die zehen Apostel vnd andere jünger sagen/ Christus sey von todten aufferstande/ müssen sie alle jhm liegen/ er wil allein recht haben/ Christus sey nit erstanden. Darnach sihe auch wie Christus mit so eim vn glaubigen schuler vmbgehet/ Nicht ein böses wort gibt er jm/ sonder eben durch diß mittel hilfft er jm vom vn glauben zum glauben/ welches Thomas selb fürstellet/ vnd lest sich nit allein/ wie die andern/ sehen/ sonder auch greiffen. Darumb lerne es/ Es will vnser Herr Got auch die schwachglaubigen dulden/ Eben wie ein reycher Man nit allein starckes gesundes gkind/ sonder auch kleyne gebrechliche kind/ in seim hause hat/ die on hilff vnd wart nicht können erzogen werden. Doch soll es folgen/ das wir nicht ymmer schwach bleyben/ sonder durchs wort/ von tag zu tag im glauben zunemen/ Du glaubest aber vhest oder schwach/ so ist diß war/ das die selig sindt die glauben/ das Jhesus der Christ/ das ist/ vnser Seligmacher sey/ vnnd durch solchen glauben (nicht durch verdienst oder eygne werck wie die Papisten lehren) sollen wir das ewige leben haben/ Wie der Euangelist Johannes selb dise Histori beschleust.

Gebet

HErr Got himlischer Vatter/ der du durch deynen Son vns armen sündern rath vnd hilf hast schaffen wöllen/ Sey mir gnedig/ vnnd hilffe/ das ich des vn glaubens mich erwehren/ vnd mit gantzem vertrauen auff dein wort begeben möge/ Vnd O du Son Gottes/ der du den vn glaubigen Thomas in solcher sünde nit stecken lassen\ sonder jm gnediglich geholffen hast/ Gibe dein heyligen Geyst auch in mein hertz/ das ich an deiner gnad nymmer

mehr zweiffle/ sonder durch vesten glauben auff deine barmhertzigkeit ewig selig werde/ Amen.

An der vnschuldigen kindlein tag/ Matthei am 2.

HErodes schicket auß/ vnnd ließ alle Kinder zu Bethlehem tödten/ die da zweyjerig vnd drunter waren.

DAs ist ein sonder grosser jammer/ vnd vnerhörete Tyranny gewest/ das so ein grosser hauffe junger kindlin sind erwürget worden. Aber es hat der leydige Sathan bald sich müssen lassen sehen, wie er gegen dem kindlin Jesu/ vnd seim reych gesinnet sey/ das er mit würgen/ oder sonst in andere wege/ es gedenck würst zumachen/ vnd zu tilgen. Aber da ist der trost fest vnd gewiß/ weder Teuffel noch Tyrannen sollen es enden/ Ob sie gleich etliche Christen hin reyssen/ damit geschicht jnen nichts arges/ Denn sie werden durch den todt von disem argen zeytlichen leben/ gefürdert zum ewigen. Christus aber/ vnd sein REych wirdt nur ye lenger ye grösser/ wie yener lehrer spricht: Es sey der Christen blut in der kirch/ wie ein mist auf dem acker/ der macht das feld fett vnd fruchtbar. Denn Herodes verursacht durch sein Tiiranny(das das kindlin Jesus auch in Egypten/ vnter den Heyden bekand wirt.

Zum dritten/ gibt es die erfahrung/ dz die Tyrannen/ durch solches fürnemen jr zwyttliches vnnd ewiges verderben fürdern/ Herodes hat müssen mit der haut bezalen/ das bey lebendigem leib würm in jm gewachsen/ vnd er dermassen gestuncken hat/ das kein mensche vmb jn hat können bleyben/ vnd ist nach ihm sein gantzes geschlecht zu boden gangen/ vnnd schendtlich verdorrbn vnd vmbkommen. Das heist wie Christus zu Paulo sagt/ mit dem fuß in ein stachel schlagen/ vnd jm selb alles vnglück zurichten/ Das sol den Tyrannen/ so die vnschuldigen Christen verfolgen/ endlicher lohn sein.

Gebet.

HErr Got himlischer Vatter/ der du deinen Son Christum Jhesum/ durch dein wort vns offenbaret hast/ du sihest/ wie noch heutiges tages der Teuffel seine Herodes hat/ vnd wider das wort reytzet vnd treibet/ mit allerley verfolgung. Wir bitten dich/ du wollest den schedlichen Tyrannen wehren/ alles vnglück/ das sie vber deine Christliche Kirch gedencken/ auff jren kopf schütten/ vnd vns frid vnd ruhe genedigklich schaffen/ auff das dein wort ye

lenger ye weytter außbreytet/ vnd wir deinen gnedigen schutz vnd hilff von tag zu tag/ ye lenger ye mehr erkennen vnnnd preysen mögen/ AMEN.

An Sanct Paulus bekerung/ 1. Timoth. 1.

DAs ist gewißlich war/ vnnnd ein tewres werdes wort/ das Christus Jesus kommen ist inn die welt/ die sündler selig zu machen/ vnter welchen ich der fürnemest byn/ Aber darumb ist mir barmhertzigkeit widerfaren/ auff das an mir fürnemlich/ Jesus Christus erzeygte alle gedult/ zum Exempel denen/ die an jhn glauben solten zum ewigen leben.

WIE Paulus/ der ein hefftiger verfolger der Christen war/ bekeret sey worden/ da er auff dem wege gen Damasco war/ zeyget die Histori fein an/ in den geschichten der Apostel am 9. und 25. Cap. Wozu aber solche histori diene/ vnd was wir drauß sollen lernen/ hören wir hie von Paulo selb/ Nemlich/ das wir erstlich fest sollen glauben/ Gott habe nit lust an des sünders todt/ wölle auch nit/ wie 2. Pet. 3. stehet/ das yemandt verlorn werde/ sonder das yederman sich zur buß kere/ vnd selig werde. Darumb lest vnser lieber Herr Christus Paulum nit also in der verfolgung fort faren/ er fordert jn dauon ab/ vnd Paulus folget/ Vnd noch für vnd für gehet vnser lieber Herr Christus vnns sündern mit seinem wort nach/ ruffet vns/ das wir von dem jrrweg ablassen/ vnd vns bessern sollen/ Denn dahin ist alle predig gericht/ das man im namen Jesu Buß vnd vergebung der sünden soll predigen.

Zum andern sollen wir auch dem exempel Pauli folgen/ vnd der himlischen offenbarung oder erscheynung nit vnghlaubig sein/ Bald Christus im gesicht jm anzeygt/ er thue vnrecht/ ist es jm leid/ vnnnd spricht mit zittern/ Herr/ was wilt du das ich thun soll? Also sollen wir auch thun/ vns nicht vmb sonst lassen predigen/ sonder erstlich von sünden ablassen/ vnd vns bessern/ vnd darnach durch den Herr Christum Gottes gnad vnd barmhertzigkeit gewiß hoffen/ so soll das ewige leben folgen.

Gebet

HErr Got himlischer Vatter/ der du den heyligen Paulum so gnedig berufest/ von sünden abgewendet/ vnd auß eim verfolger einen erweleten rüstzeuge gemacht hast/ Ich bitt dich/ gibe mir dein gnad/ das ic hdein wort vnd warnung auch mit ernst anneme/ vber meine sünde hertzliche rew habe/ dauon ablasse/ vnd mich allein deiner gnad vnd barmhertzigkeit durch Christum tröste/ vnd durch jn ewig selig werde/ Amen.

An Sanct Matthias tag. Matthei am 9.

Kombt her zu mir/ alle die jr mühselig vnd beladen seydt/ Ich will euch erquicken. Nemet auff euch mein Joch/ vnd lernet von mir/ Denn ich bin sanfftmütig/ vnd von hertzen demütig/ so werdet jr ruhe finden für ewre seele. Denn mein ioch ist sanfft/ vnd mein last ist leycht.

ES lehret vnser lieber Herr Christus im heutigen Euangelio erstlich/ wie das Euangelion von den welt weysen verachtet vnd verfolget werde/ Denn weil sie es nicht wöllen annemen/ vnd mehr auff jr vernunfft/ verdienst vnd macht/ denn auff Gottes gnat bawen/ lest sie Gott in solcher blindheytt jimmer hingehen/ Dagegen aber werden die armen/ ellenden gewissen/ so jre sünden erkennen/ vnd Gottes zorn fülen vnd fürchten/ solcher predigt fro/ vnd nemen sie mit hertzen an/ Sie müssen aber auch redlich drumb herhalten/ vnnd sich vomm Teuffel vnnd der welt plagen lassen. Darumb tröstet sie vnser lieber Herr Christus/ vnnd verheysset/ ob sie wol sich müssen leyden/ so wölle er doch sie erquicken/ vnnd jnen tragen helffen/ Sie sollen nur keck vnnd getrost sein/ vnd an seim Exempel lernen/ erstlich sanfftmütig/ das ist/ gedultig sein/ vnnd durchs Creutz sich nit erzürnen noch vngedultig lassen machen/ vnnd darnach auch demütig sein/ das ist/ Sie sollen es erkennen/ das wir arme sündler sind/ vnd durch sünd oft selb vrsach geben/ das Got mit seinem rütlein muß kommen/ Sollen derhalben sich schmiegen/ nicht embor begeren/ sonder sich lassen drucken/ biß Got genedige hilff schaffet/ vnnd wider embor hilfft. Also spricht der Herr/ wird euch mein joch sanfft/ vnnd mein last leycht werden/ Denn er will mit seim Geyst/ vnnd durch sein wort bey vns sein/ vnnd durch die gewisse hoffnung des ewigen lebens alles vnglück leicht vnd treglich machen.

Gebet

HErr Got himlischer vater Wir dancken dir für deine vnaußsprechliche gnade/ dz du vns arme sündler bedacht/ vnd deinen Sun in vnser fleisch geschickt/ vnd vmb vnser willen hast lassen mensch werden. Vnd bitten dich du wöllest durch deinen heyligen geist vnser hertzen also erleuchten/ das wir vns seiner menschwerdung/ leydens vns sterbens trösten/ jhn für vnsern herrn vnd ewigen König erkennen/ vnd annemen/ vnnd durch jn mit dir vnnd deinem heyligen Geyst/ ewig leben/ vnd selig werden/ Amen/ Amen.

Am tag der Reynigung/ da das kindlin Jesus/ nach den sechs wochen/ wirdt in den Tempel getragen/ Luce am 2.

DER alte Simeon sprach: Herr nun lessest du deinen Diener im fride faren/ wie du gesagt hast/ Denn meine augen haben deinen heyland gesehen/ welchen du breyttet hast für allen völkern. Ein liecht zu erleuchten die Heyden/ vnd zum preyß deinem volck Israel.

DIB ist ein krutze/ aber seer treffentliche predigt von dem Herren Christo/ was sein ambt sey/ vnnd warzu wir sein geniessen sollen. Der alte Simmeon heyst in einen Heyland Gottes/ das ist/ ein hilf/ welche Gott selb vns menschen geordnet hat/ das vns wider die sünde/ den tod/ vnd den Sathan soll geholffen werden. Darumb sollen wir von Got im hymel anders nit gedencken/ noch glauben/ denn das er gnedig vnd barmhertzig sey/ vnd vns/ ob wir gleych arme sündler sind/ hertzlich lieb hab/ sintemal er vns verlornen/ verdambten menschen selb hilff vnnd rettung wider die sünd vnd den todt schaffet. Auff das aber nicht yemandt gedencke/ solche hilff sey allein den Juden vermeyndt/ sagt Simeon/ diser heyland Gottes sey bereytet/ das ist/ geordnet vnd vest gesetzt allen völkern/ den heyden gleych so wol als den Juden/ Die Heyden soll er erleuchten/ das ist/ Gottes wort vnd erkendtnuß vnter sie bringen/ das sie auch selig werden/ vnnd den Juden soll er ein preyß sein/ das sie zu ehren kommen/ vnd die sünde vnd der tod sie nit schenden möge noch vberweltigen. Derhalb soll ferner dise frucht bey vns folgen/ welche wir an dem alten Simeon sehen. Er fürchtet sich für dem tod nicht/ sonder sagt/ er wölle mit frölichem hertzen dahyn faren/ wenn Gott jn abfordere. Denn warumb wolten oder solten wir vns für dem tod fürchten/ sintemal wir Gottes Heylandt vnnd hilff haben/ die vns in ewigkeyt nicht kan fehlen?

Gebet

HERr Got hymlicher Vater/ der du dein en Sun vns zum Heylandt bereyttet hast/ das er der Heyden liecht/ vnnd der Juden preyß sol sein/ wir bitten dich/ errleuchte vnsere hertzen/ das wir dein gnad vnd Vätterlichen willen gegen vns in jm erkennen/ vnd hilff vnd schutz/ wider die sünd& verdamnuß vnd den Sathan an jm haben/ vnd durch jn ewig selig werden/ AMEN.

Am tag der verkündigung Maria/ Luca am 1.

DEr Engel sprach: Fürchte dich nicht Maria. Sihe/ du wirst im leyb schwanger werden/ vnd einen Sun geben/ Des namen soltu Jesus heysen/ der wird groß/ vnnd ein Sun des höchsten genennet werden. Vnd Gott der Herr/ wirdt jm den stul seines Vatters Daudid geben/ vnnd er wirdt ein König sein/ vber das hause Jacob ewiglich/ vnd seines Königrychs wirdt kein ende sein.

DIE fürnemeste lehr des heutigen Festes/ ist dise/ das wir mit höchstem fleyß bedencken sollen/ was grosse vnmeßliche gnad Gott vns bewisen hat/ das er seinen eingebornen Sun in vnser fleysch kommen/ vnnd einen menschen hat lassen werden wie wir/ das nun wir für an rhümen können/ Ob gleych der Sathan vnser fleysch/ durch die sünde grewlich geschendet vnd geschwechet hat/ das doch schandt/ schwachheyt/ vnd alles mit einander/ durch den sun Gottes sey hinweg genommen/ sintemal Gott selb in vnserm fleysch lebet. Aber bey dem rhum soll es nit allein bleyben/ wie wol wir Gott teglich für solche gnad dancken sollen/ Den nutz sollen wir auch bedencken/ Denn solches ist ein gewises zeugnuß/ das Got vns menschen vmb der sünden willen nicht feind sey/ noch vns wölle verdammen lassen. Denn wie der Engel hie sagt: Wirt Christus darumb mensch/ das er sitze auff dem stul seines Vaters Daudid/ das ist/ das er ein König sey/ vnd bey vns menschen sein reyech anrichte/ Das nicht/ wie andere welt reyech ein zeytlang bleybe/ sonder das ewig sey/ So nun wir menschen inn solches ewiges Reyech des Sunes Gottes kommen sollen/ so folget das zuuor durch disen König/ vnser sünde müssen versönet/ vnnd der heylige Geyst vns geschenkt/ vnd wir andere vnd gar Newgeborne menschen werden. Denn wo die üsnde auff vns solte bleyben/ würden wir nicht können ewig leben/ Dise gnad vnd wolthat/ so durch den Sun Gottes vns widerfaren ist/ das er ein ewiges Reyech anrichtet/ vnd durch sein wort vnnd die selige Tauff/ vns dazu beruffen hat/ sollen wir wol lernen/ vnd Gott mit hertzen dafür dancken/ vnnd vns für sünden hüten/ auff das wir nicht wider auß disem ewigen Reyech/ in den todt fallen/ vnd ist kein zweyffel/ der heylige Geyst wirdt vns gnedig dazu verhelffen/ wenn nur wir mit ernst darumb bitten.

Gebet.

HErr Gott himlischer Vatter/ Wir dancken dir für deine vnaußsprechliche genade/ das du vnns arme sündler bedacht/ vnnd deinen Sun in vnser fleysch

geschicket/ vnnd vmb vnsern willen hast lassen mensch werden/ Vnnd bitten dich/ du wöllest durch deinen heyligen Geyst/ vnsern hertzen also erleuchten/ das wir vns seiner menschwerdung/ leydens vnnd sterbens trösten/ jn für vnserm Herrn vnd ewigen König erkennen/ vnd annemen/ vnnd durch jn mit dir vnd deinem heyligen Geyst/ ewig leben vnd selig werden/ Amen.

Am tag Philippi vnnd Jacobi/ Johan. 14.

CHRISTUS spricht: Ich bin der weg/ die warheyte/ vnd das leben. Niemand kombt zum Vatter denn durch mich. Wenn jr mich kennet/ so kennet jr auch meinen Vatter/ vnd von nun an kennet jr jn/ vnnd habt jn gesehen/ Denn wer mich sihet/ der sihet den Vatter.

DIEß ist ein hohe predigt/ vnd lehret wie wir dazu mögen kommen/ das wir Gott eygentlich erkennen/ Solchs ist die höchste kunst/ Denn wer Gott recht erkennet/ der hat das ewige leben/ Johan. 7. Vnd ist gewiß das solche kunst niemand kan/ denn nur allein die rechten Christen. Türcken vnd Juden wissen/ das Gott himmel vnd erden erschaffen hat/ dabey lassen sie sich duncken/ haben sie Gott gewiß gefasset/ vnd kennen jn eygentlich/ so doch beide Türcken vnd Juden/ den Herrn Christum nicht allein nit kennen/ sonder auch lestern/ vnd laugnen. Nun sagt aber Christus hie: Ich bin der weg/ auff dem jr müst gehen/ wenn jr zu Gott wölt kommen. Die welt hat wol jr sonderere weg/ dadurch sie getrawet zu Gott zu kommen/ aber es sind jrre weg/ vnd füren inn den ewigen todt/ Wer aber den Herren Christum zum weg hat/ der hat den waaren weg zum rechten erkentniß Gottes/ vnnd dem ewigen leben.

Wie gehet aber solches zu? Also. Sihe am ersten/ wer Christus sey/ So findest/ das er Gottes Sun sey/ von Gott dem Vater in ewigkeyte gezeuget/ wie im andern Psalm stehen. Darnach sihe weytter was er thue? So findest, das er sterlich predigt/ vnnd dich Gottes willen lehret/ wie Gott durch jn/ allen menschen von sünd vnd todt wölle helfen. Zum andern findest/ das er sich hin gibt/ an das creutz in den todt/ vnd opffert sein leyb vnd leben für der gantzen welt sünde. Stehet darnach am dritten tag wider auf von dem todt/ fehret gen himel/ vnnd gibt den heyligen Geyst allein/ so das Euangelion hören vnd annemen.

Weil nun solches der Sun Gottes thut/ vnd thuts auß des Vatters befehl vnd willen/ Sage mir/ was wilt du von Gott halten? oder was solt du vom jm glauben? Ists nicht war/ du kanst jn anders nicht/ denn für gnedig vnnd

barmhertzig erkennen/ der es mit vns menschen auff das freundlichest meynet/ sintemal er nit allein vns erschaffen hat/ sonder auch/ nachdem wir durch die sünde in den todt gefallen/ wider sünd vnd todt/ durch seinen eingebornen Sun vns hilffet vnd rettet? Das heyst Gott recht kennen/ vnd solche erkenntniß bringt das ewige leben mit sich/ Man kombt aber zu solchem erkenntniß allein durch Christum. Wer den kennet/ der kennet den Vatter/ wer jn sihet/ der sihet den Vatter.

Gebet

HErr Gott himlischer Vatter/ Wir dancken dir/ das du deinen gnedigen willen und liebhabendes hertze/ vns in deinem Sun Christo Jesu so klerlich angezeyget hast/ Vnd bitten dich/ du wöllest vns in solchem erkenntnuß0 von tag zu tag lassen wachsen/ auff das wir in allerley anfechtung vns damit trösten/ vnd durch solche hoffnung alles vberwinden/ vnd endlich selig werden. Amen.

An Sanct Johannes tag/ was Johannes für ein ambt haben werde/ Luce 1.

VNd du kindlin wirst ein Prophet des höchsten heysen/ Du wirst für dem Herrn hergehn/ das du seinen weg bereytest/ vnd erkenntniß des heyles gebest seinem volcke/ welches ist in vergebung jrer sünden/ durch die hertzliche barmhertzigkeyt vnsers Gottes/ Durch welchen vns gesucht hat/ der auffgang auß der höhe.

Dise wort lehren/ wie der heylige Johannes ein sondere predigt füren sol/ dergleichen man vnter dem gesetz vor nie gehöret hat. Vnd nennet der heylige Zacharias/ solche predigt ein erkenntniß des heyles/ das ist/ ein predigt dadurch wir selig werden. Solchs soll also zugehn/ das der Barmherzige Gott/ seinen Sun von Himel herundter schicket/ vnd durch jn vergebung der sünden/ vnd ewiges leben vns anbeutet/ das alle die den Sun Gottes annehmen/ vnd sich seines Todes trösten/ das er damit für vnsere sünde bezalet/ vnd vns mit Gott versönet habe/ sollen selig vnd kinder Gottes sein. Dise predigt bringet der heylig Johannes in die welt/ ist derhalb/ wie der Engel sagt/ Seiner geburt von hertzen sich zu frewen/ das Got einen solchen gnadenprediger uns gibt/ der nicht/ wie Mose allein treybt/ vnd dringet was wir thun vnd lassen sollen/ sonder weil wir mit Mose nicht hernach können/

lehret Johannes/ wie wir dennoch sollen selig werden. Nemlich/ durch den glauben an Christum/ welchen er heist den auffgang auß der höhe.

Gebet

HErr Gott himlischer Vatter/ Wir dancken dir von hertzen/ für deine grosse gnad/ das du es bey der gesetzpredigt nicht hast lassen bleyben/ sonder den heyligen Johannes geschicket/ das er auff Christum mit seinem finger weyssen/ vnnd vergebung der sünde/ heyligkeyt vnd gerechtigkeit durch jn vns verheyssen solt/ wir bitten dich aber auch/ du wöllest durch deinen heyligen Geyst vnser hertzen erleuchten/ das wir solche gnadenpredig des heyligen Johannis mit rechtem glauben annemen/ vnnd dir one forcht in heyligkeit vnd gerechtigkeit dienen vnser lebenslang/ Amen.

Am tag Petri vnd Pauli/ Matthei am 16.

PEtrus sprach zum Herrn Jesu/ Du bis Christus des lebendigen Gottes Sun/ Jesus antwortet vnd sprach zu jm: Selig bist du Simon Jonas Sun/ Denn fleisch vnd blut hat dir das nit offenbaret/ sonder mein Vatter im hymel/ Vnnd ich sage dir/ du bis Petrus/ vnd auff disen Felß will ich mein Kirch bawen/ vnnd die pforten der Hellen sollen sie nicht vberweltigen.

DAs ist ein feyne lehr/ von der Christlichen Kirchen/ was sie sey/ wo bey man sie soll kennen/ vnnd wie es jr auf erden werde gehn. Die Christlich Kirch heyst das heufflein/ das mit Petro bekennet/ diser Jesus/ der Junckfrawen Marien Sun/ sey der Christ/ vnd des lebendigen Gottes Sun/ das ist/ Got hab jn gesalbet/ vnnd dazu gesendet/ das er für aller welt sünde bezahlen/ den todt würden/ vnnd/ alle so an jhn glauben/ soll selig machen. Wer diß also glaubt von dem Herrn Christo/ vnd helt es fürwar/ vnd vnzweyffentlich/ vnd tröstet sich derhalb der gnade Gottes/ der ist ein glid der rechten Christlichen kirchen/ vnd ist mit Petro selig/ vnnd hat den heyligen Geyst/ Denn fleysch vnd blut kan solches für sich selb nicht glauben/ der Vater im himel muß durch seinen heyligen geyst solches liecht im hertzen anzünden.

Weil aber der Herr sagt/ er wölle sein kirch auff solches bekendtnuß bawen/ folget das die Kirch kein gewisses gemerck noch zeychen hab/ denn dises bekendtnuß. Wo das gehet/ da ist die Christliche kirch/ ob sie gleich nichts scheynet das sies sey/ Widerumb/ wo diß bekendtnuß nit recht gehet/ da ist kein Christliche kirch/ ob sie gleich den scheyn vnd Namen hat. Es schlies-

sen sich aber inn diß bekendtnuß mit ein/ die heyilige Tauff/ vnd das Nachtmal des Herrn/ Denn der Herr Christus wirdt in beden bekennet vnd gepreyset/ das er für vnsere sünde bezalet/ vnd vns mit Gott versönet habe.

Zum dritten/ sagt der Herr/ die kirch werde vmb diß bekendtnuß willen/ der hellen pforten/ das ist/ den Sathan mit all seinem Reych vnnd vermögen/ zu feynde haben/ Weyl aber der Sathan ein Fürst vnd Gott der welt ist/ folget/ das er die welt wider diß bekendtnuß erregen/ vnnd es zu dempffen werde fürnemen/ Solchs kan on grosse fahr vnd not der armen Christen nicht abgehen/ Vnd dennoch tröstet der Herr/ es soll seine Kirch bleyben/ Der Teuffel aber mit all seiner macht/ müsse ablassen vnd zu schanden werden. An solchen trost sollen wir vns vhest halten/ vnd Got vmb schutz auch bitten.

Gebet

O ALmechtiger/ ewiger Got/ wir dancken dir/ das du vns zum erkentnuß deines lieben Suns hast lassen kommen/ vnd bitten diich/ weyl doch der Sathan auff allen seyten wider vns fichtet/ vnnd von solchem erkendtnuß vns begeret zu dringen/ du wöllest durch deinen heyiligen Geyst vns regieren vnd füren/ daß wir biß an vnser ende in solchem erkendtnuß vhest bleyben/ vnd selig werden/ durch Christum Jesum deinen Sun/ vnnd vnsern Herrn/ Amen.

Am tag Marie Magdalene/ welches Fest wir am 7. Sonntag nach Trinitatis halten/ Lu. 7.

DAs Weyb tratt hinden zu des Herren Jesu füssen/ vnnd weynet/ Vnnd fieng an seine füsse zu netzen mit threnen/ vnd mit den haren jres haupts zu trücknen/ vnd küsset seine füß/ vnnd salbet sie mit köstlichem wasser. Vnd er sprach zu jr/ Dir sind deine sünd vergeben/ Dein glaub hat dir geholffen/ Gehe hin mit friden.

DER Euangelist sagt/ diß weyblein sey ein sünderin gewest/ Weil nun der herr am ende ir disen trefflichen trost gibt/ vnd sagt/ Deine sünd sind dir vergeben/ Ist diß die fürnembste vnnd beste lehre/ das wir an jr sehen vnd lernen/ wie sie zu uergebung der sünden sey kommen. Nu sehen wir aber/ das sie mer nit thut/ denn das sie zu dem Herrn Christo kombt/ für jm sich demütiget/ vnd biterlich weynet/ mit dem vertrauen/ (wie denn der Herr hie klar anzeigt/ weyl er sagt/ Dein glaub hat dir geholffen) er werdee jr gnedig sein/ vnnd hilff beweisen. Diß ist der weg/ welchen wir auch gehn müssen/ wenn wir vergebung der sünden begeren. Im Bapstumb hat man gelehrt/

man müsse beichten/ vnd für die sünde mit sonderlichen wercken gnugthun/ der heyiligen ürbit vnd verdienst suchen/ vnd kauffen/ rc. Aber es ist eytel lügen vnd verführung. Das sol anfenglich sein/ das deine sünd dir hertzlich leyd sind/ vnnd du gantzlich im willen habest/ in sünden lenger nicht zuuerharren/ sonder dich mit Gottes hilff zu besseren. Solches sihest an disem weyblin hie/ Denn das hefftige weynen vnd seufftzen/ kombt allein daher/ das sie gern von sünden ledig wer. Darnach finde dich zu dem Herrn Christo Jhesu mit festem vertrauen/ er werde sich deiner not annemen/ vnd dir helffen/ ewie er darumb Jesus vnd ein Heyland heyst/ das er vns in sünd vnnd todt nit will lassen stecken/ das heyst aber den Herrn Christum suchen vnd finden/ wenn du sein wort mit glauben annimbst/ vnd wie er dir in der tauff/ im Abendmal/ vnd sonst zusagt/ durch seinen tod vergebung der sünden hoffest. Es soll aber auch dise frucht folgen, das du in Gottes forcht dich haltest/ vnnd für sündenn bewarest/ denn sonst wo du in sünden wolest fort faren/ würde es kein rechter ernst mit der rewe sein. Wo du aber auß schwacheyt in sünde fellest/ solt du durch die b#uß widerkeren/ vnnd von sünden ablassen.

Gebet

O Jesu du Sun des lebendigen Gottes/ der du vmb der sündler willen auff erden kommen/ vnd am creutz für sie bist gestorben/ Wir bitten dich/ gib deinen heyiligen Geyst inn vnser hertzen/ das er rechte rew vnser sünden inn vns/ vnnd vestes vertrauen auff dein verdienst vnd gnad anrichte/ auff das wir vns wider die sünd vnd böses gewissen/ auffhalten/ vnnd mit der lieben Magdalena/ durch den glauben/ im fride hingehen/ dich loben/ preysen/ vnd lieben in ewigkeyt/ Amen.

Am tag der heymsuchung Marie/ Luc. am 1.

MARIA sprach: Mein seel erhebt den Herrn/ vnd mein Geyst frewet sich in Gott meinem Heylandt. Denn er hat seine ellende magd angesehen/ Sihe von nun an/ werden mich selig preysen alle kinds kindt.

Denn er hat grosse ding an mir gethan/ der mechtig ist/ vnnd des name heylig ist. Vnnd seine barmhertzigkeyt wehret ymmer für vnd für/ bei denen die jn fürchten. Er übet gewalt mit seinem arm/ vnd zustrewet die hoffertig sind/ in jres hertzen sinn.

Er stosset die gewaltigen von dem stul/ vnd erhebet die ellenden. Die hungerigen füllet er mit gütern/ vnd die reychen lest er ler. Er denckt der Barm-

hertzigkeit/ vnnnd hilfft seinem diener Israhel auff. Wie er geredt hat vnsern Vättern/ Abraham vnnnd seinem samen ewiglich.

Zu diser schönen Predigt/ von Gott vnnnd seiner gnad/ vnnnd wie wir vns dazu schicken sollen/ wird die junckfraw Maria durch jr Muhme Elisabeth verursacht/ weil sies so hoch lobet vnnnd preyset/ vnnnd nennets/ die gebenedeyte/ oder erümbtiste vnterr den Weybern/ Ja/ spricht die Jungfraw Maria/ es ist ye war/ Gott hat mir ein besonder grosse gnad gethon/ der ich mich von hertzen frewen/ vnnnd Gott drumb loben vnd dancken muß/ Denn ich ye ein armes ellendes vnsehliches Meydlin bin/ Aber liebe Elisabeth/ ob wol mir allein dise grosse genade widerfaren ist/ So will doch Gott nit mir allein/ soonder allen menschen barmhertzig vnnnd gnedig sein/ allein man förchte jn/ vnd fleyssige sich seines worts vnd willens. Wer aber Gott nicht will förchten/ vnd sich/ wie der menschen vnart ist/ seiner weyßheit/ seines gewalts/ oder rreychthumbs trösten vnnnd vberheben will/ da will Got one alle gnad straffen/ das sie zu narren werden/ verderben/ vnd darben müssen/ Darumb so lerne yederman Gott förchten/ das ist/ Gottes wort hören/ vnd dem selben folgen/ so soll er nicht not haben/ ob wir gleych arm/ ellend/ veracht/ vnnnd hartselig sind/ Gott weyß vns wol emporzuheben/ vnd reych zumachen/ Vnnnd soll endlich auch dise gnad folgen/ das Got solche Gottfürchtige hertzen/ zu der verheyssung Abrahe kommen lassen/ vnd durch seinen Son Christum Jesum ewig will selig machen. Also lehret die Junckfraw Maria/ das wir Got förchten/ vnd für hoffart alß für dem gewel/ welchen Gott nit leyden kan/ auff das fleyssigest vns hüten sollen/ so will Gott mit zeytlichem vnnnd ewigem segen bey vns sein.

Gebet

HErr Got himlischer Vatter/ Wir dancken dir für alle deine wolthat/ leiblich vnnnd geystlich/ die du so reychlich vns hast widerfaren lassen/ Vnd bitten dich/ behüte für hoffart/ vnd sicherheyte/ das wir nicht in vndanck vnd sünd gerathen/ vnnnd dein huld verlieren/ wie die liebe Junckfraw Maria drowet/ dz weder weißheyte/ gewalt noch gelddie helffen sol/ die dich nicht förchten/ Gib aber vnsein solches hertz/ das für vnnnd für in deiner forcht bleybe/ vnnnd an deinem wort hange/ auf das dein segen bey vns bleybe/ vnd wir durch dein gnad ewig selig werden/ AMEN.

An Sanct Jacobs tage/ Marciam 10.

DER Herr Jesus riefte seinen jüngern zu sich/ vnd sprach: Ir wisset/ das die weltlichen Fürsten herrschen/ vnd die Oberherrn haben gewalt/ so soll es nit sein vnter euch/ Sonder so yemandt vnter euch will gewaltig sein/ der sey ewer Diener/ vnd wer da will der fürnemest sein/ der sey ewer knecht. Gleych wie des menschen Son ist nit kommen/ das er jm dienen lasse/ sonder das er diene/ vnd gebe sein leben zu einer erlösung für vile.

Dise lehr gehet fürnemlich auff die kirchendiener/ da die selben für diser anfechtung sich hütten/ vnd nach gewalt vnd zeitlicher pracht nit sollen streben/ Solchs gebüret denen/ so inn weltlichen embtern sindt/ Denn die müssen gewalt vnd macht haben/ das sie dem vnrecht vnd ergernussen wehren/ vnd jre vnterthanen befriden. Aber wem das predigamt befolhen ist/ der gedenck/ es müsse gedienet sein/ vnd nit allein gedienet/ sonder auch drüber gelitten/ Denn die welt gibt keinen andern lon. Dem wort/ vnd denen so es bekennen vnd füren/ ist sie fiend/ vnd kans noch wils nit dulden. Das sollen alle Prediger vnd Kirchendiener sich erwegen/ vnd auff dise fahr wol bedacht vnd gerüstet sein. Wer aber/ wie der Bapst/ Cardinäl vnd Bischoffe/ Pfaffen vnd München/ vnd in summa/ das gantze Bapsthumb durch auß/ das predig oder kirchenamt zu seiner herrligkeit/ gewalt vnd reichthumb mißbrauchet/ der istt Christus Jünger nicht/ Denn hie stehets: So soll es nicht sein vnter euch/ das ist/ Jr solt knecht vnd nicht Herrn sein/ vnd wenn jr auff das trewlichest gedienet habt/ solt jr allen vndanck von der argen welt gewarten. Ob nun solches wehe thut/ so sehet hieher auff mich/ wie nicht allein ich diene/ sonder auch drüber leyde/ vnd leib vnd leben vber solchem diennst lasse/ das euch geholffen vnd gerathen werde. Solches Exempel bedencket/ ob gleich jr andern leuten dienet/ das ich euch vnd aller welt auch gedienet/ vnd mit meinem todt euch von sünde vnd todt erlöset habe. O ein hertzliche/ schöne warnung vnd vermanung/ Gott gebe/ das weirs alle/ sonderlich aber die kirchendiener zu hertzen nemen/ vnd für hoffart/ geytz/ neyd/ vnd anderm vns hüten.

Gebet

HErr Got himlischer Vatter/ Es thut vns das creutze sehr wehe/ vnd wolten sein gern vberhoben sein. Aber du hast erstlich deins eingebornen Sons selb nicht verschonet/ der hat durchs Creutz vnd leiden zu seiner herrligkeyt müssen kommen/ vnd wilt/ das wir Christen alle solchem Hertzogen nachgehen/ vnd ihm gleych sollen werden/ darumb bitten wir dein grundlose

barmhertzigkeyt/ verleyhe durch dein heyiligen Geyst/ das wir im leyden nicht kleynmütig/ noch vngedultig werden/ sonder durch die hoffnung der künfftigen herrligkeyt/ alles vnglück mit sstarckem glauben vberwinden/ AMEN.

An Sanct Bartholomeus tag/ Luce am 22.

CHRISTUS sprach zu seinen jüngern: Ich will euch das Reich bescheyden/ wie mir mein Vatter beschidden hat/ das jr essen vnd trincken solt/ vber meinem tisch in meinem Reych/ vnd sitzen auff stülen/ vnnnd richten die zwölff geschlecht Israel.

DIEß Euangelion ist fast ein meinung mit dem nechsten an Sant Jacobs tag/ Denn es erhube sich am letzten Abendmal ein zanck vnter den Jüngern/ da sie höreten/ wie der Herr würde von ihnen weg gehen/ welcher alß denn solte für den grösten gehalten werden/ auff den die anderen all ein auffsehen hetten/ vnd nach seim befelh sich hielten/ Aber der herr gibt jn disen beschid/ Herrschen gehöre weltlichen Königen vnnnd Herren zu/ jr aber/ spricht er/ nit also/ sonder welcher vnter euch wil der fürnemest sein/ soll sein wie ein diener. Nach solchem wort gedencke doch/ ob auch der Bapst sich halte/ der ein herr vber alle Kirchen sein/ vnd allein die macht haben will sünde zuuergeben? Denn der schlüssel masset er sich allein an/ alß könne die niemand haben noch brauchen/ er habe sie denn von jm/ So doch der Herr alle seine Apostel gleich machet/ vnd will keinen für den andern ziehen/ all zumal sollen sie dienen/ vnd keiner herrschen/ noch der fürnemest sein. Wer nun solches beflhs mit fleiß außwartet/ der soll sein belonung dafür empfangen/ nit hie auff erden/ sondern in dem ewigen leben. Denn spricht der Herr: Ich beschide euch das reych wie mirs mein Vatter beschidden hat/ das ist/ Ir solt herrn sein vnd regiern/ aber nitt auff erden/ ewer herrschafft soll in eim bessern leben sein/ Denn also hat mein Vatter das reych mir auch bescheyden/ das ich hie auff erden dienen vnd leyden/ vnd durch vil trübsal hab zur herrligkeyt sollen eingehen. Da sey nun mit zu friden/ dsas jr wie meine nechste/ liebste freund essen vnd trincken solt vber meinem tisch/ das ist/ es sol euch gehn wie mir/ Denn jr füret eben das ampt das ich füre/ Auff erden hie solt jr dienen/ vnd euch leyden/ Nach diesem leben aber solt jr ewige freud vnd herrligkeyt haben.

Gebet.

Herr Got himlischer Vatter/ du hast dein kirch mit trewen Dienern besetzt/ das sie dein wort füren/ vnd yederman durch jren dienst dahin sollen bringen/ das sie dich erkennen/ in deiner forcht wandlen/ vnd durch Christum selig werden/ Wir bitten dich/ du wollest mit deinem heiligen Geyst alle solche Kirchendiener regieren/ das sie jres diensts trewlich warten/ Vnd durch geytz/ hoffart/ oder anders/ vom Sathan nicht bethoret/ noch in jhrem dienst laß vnnd faul werden/ auff das dein reych gemehret/ vnnd des Sathans zerstöret werde/ Amen.

An Sanct Mattheus tag/ Matthei am 9.

DER Herr Jhesus sprach: Die starcken bedürffen des Artztes nicht/ sonder die krancken. Gehet aber hin/ vnd lernet was da sey/ Ich hab wolgefallen an barmhertzigkeit/ vnd nit am opffer/ Ich bin kommen die sündler zur Busse zu ruffen/ vnd nicht die gerechten.

ZU diser predigt verursachen den Herrn Christum die Phariseer/ denn sie deuteten es jm vbel das er mit den Zolnern gemeinschaft hette. Aber er will darumb vngestraftet sein/ vnd recht haben/ Denn/ spricht er/ Ich bin ein Artzt wider die sünde. Gleych nun wie ein leybes Artzet zu krancken leuten gehn/ vnd vmb krancke leut seines ampts halb sol sein. Also ist es mein ampt vmb die sündler zu sein/ das ich sie zur busse ruffe/ vnd sie von sünden ledig mache. Dise predigt mercke mit höchstem fleyß/ Denn vnser größte anfechtung/ sorg vnd kummernuß ist/ das wir der sünden halb/ vns für Gott forchten. So du nun ein sündler bist/ was wiltu thun? Wilt du ver zweiffeln? O nein/ Denn höre hie/ man hat ein artzt wider die sünde/ Wer ist der? Es ist der Son Gottes vnser lieber Herr Christus. Was brauchet er für ein artzney/ Dise/ das er zur busse ruffet/ Das ist/ er vermanet wir sollen Got fürchten/ in sünden nit sicher fort faren/ Gottes zorn vnd vrteyl bedencken/ vnd von sünden ablassen/ Vnnd darnach vns des trösten/ das er/ der Sone Gottes für vns am Creutz sich selb auffopffert/ vnnd für vnser sünde mit seim leben bezalet. Wer diß' bedes thut/ dem ist von sünden geholffen. Du must aber nit allein solche kranckheit erkennen/ sonder auch dem artzt folgen/ vnd nit thun/ wie die vnleidlichen/ vngefügigen krancken/ was jn der artz gibt/ wöllen sie nicht. Essen aber vnd trincken was jnen am schedlichsten ist/ Dafür hüte dich/ folge deinem trewen artzet/ Ob es dir wehe thut/ das du von der vnzucht/ dem geytz/ dem zorn/ vnd andern sünden der du gewonet hast/ solt ablassen/ da ligt nit an/ Gedenck aber/ das gewißlich der ewige tod würde folgen/ wo du in sünden woltest fort faren/ solche fahr

laß dich bewegen/ das du disem artzt folgest/ vnnd dem ewigen todt enttrinnest.

Gebet.

HErr Got himlischer Vatter/ du hast vnns durch dein liebes wort/ zu deynem REych beruffen/ da vergebung der sünden/ vnd alle genad vnd barmhertzigkeyt jnne ist/ Ich bitte dich/ du wöllest durch deinen heyligen Geyst/ vnser hertzen erwecken/ vnnd erleuchten/ das wir/ wie Mattheus der Zolner/ solchen beruff annemen/ von sünden ablassen/ vnd vns bessern/ vnnd aller gnad durch deinen Son Christum Jesum/ vns zu dir versehen/ vnd also endlich selig werden/AMEN.

An Sanct Michaels tag/ In dem 91. Psalm.

ER hat seinen Engeln befolhen vber dir/ das sie dich behütten auff allen deinen wegen/ das sie dich auff den henden tragen/ vnd du deinen fuß nit an einen steyn stossest. Auf Löwen vnd Ottern wirst du gehen/ vnd treten auff die jungen Löwen und Drachen.

DAs der Sathan vnnd sein gantzes reich vns menschen feind sey/ vnd alle augenblick vnns nachstelle/ ob er dem leyb oder der Seelen möge schaden thun/ solches erfahren wir teglich an vns selb/ vnd andern leuten. Denn das so vil jammers vnuersehenlich sich findet/ mit kranckheyt/ mit vngewitter/ mit hagel/ mit wasser/ mit fewer/ vnd andern/ vnd die menschen vntereinander sich so betrüben/ beschedigen/ vnd allerley vnglück stifften/ Solches alles geschicht auß des leydigen Sathans anstifften vnd treyben/ Es ist aber darumb alles dest beschwerlicher/ das der feind vns zu starck ist/ vnd wir jm nicht/ wie den leuten/ können widerstand thun/ er fragt weder nach büchssen noch schwert/ wir sindt gegen jm bloß/ er aber ist vnsichtbar/ vnd wir können jm keinen schaden mit vnser sterck oder macht zufügen. Auf das aber wir vns nit zubeklagen hetten/ als hette Gott vnser vergessen/ Sind die lieben Engel von Got dazu geordnet/ das sie vns bewachen vnd bewayren/ vnnd dem feyndt widerstandt thun/ vnd wehren sollen. Wie Daudid hie sagt/ das sie den beflh haben vns zubehüten auff allen vnsern wegen/ das ist/ allenthalb da wir in vnserm beruf gehn/ vnd auff den henden zutragen/ dz ja kein leid vns widerfare. Solchs sollen alle Christen wissen/ vnd nit allein solches beystands vnd hilff sich trösten/ vnd teglich drumb bitten/ sonder auch all jr leben darnach füren vnd anrichten/ das sie ja dises schutzes nit beraubt werden. Denn im 34. Psal. stehet das des Herrn Engel sich vmb

die her legere/ die Got fürchten/ Darumb wo rohe vngotfürchtige menschen sind/ die in sünden ligen/ vnd nach Gotes wort nicht fragen/ bey den selben wollen die lieben Engel nit sein. Darumb sey yederman fromm vnd fürchte Got/ so wil Got behüten vnd segnen.

Gebet

HERR Gott himlischer Vatter/ Wir dancken dir für deine Väterliche barmhertzigkeit/ das du deine liebe Engel dazu verordnet hast/ das sie auff vns sehen/ vnd wider des leydigen Sathans fürnemen vns schützen sollen/ Vnd bitten dich/ regier vnd füre vnsere hertzen vnd sinn/ durch deinen heiligen Geyst dermassen/ das wir in deiner forcht vns halten/ vnd wider deinen willen nicht thun/ vnd also in allerley zufallenden nöten/ die zuersicht mögen behalten/ das deine liebe Engel werden vmb vns/ vnd alles was wir haben/ einen starcken vesten zaun machen/ das weder der Sathan/ noch die arge welt einbrechen/ vnd schaden möge thun/ auff das gleich wie durch deinen lieben Sun Christum Jhesum/ vns vnsere sünde vergeben/ vnd das ewige leben versprochen ist/ also durch den schutz deiner lieben Engel/ leyb/ leben/ vnd alles was wir auff erden haben/ möge erhalten vnd befridet werden. Amen.

Am tag Simonis vnd Jude/ Johan. am 15.

DAs gebietete ich euch/ das jr euch vnter einander liebet/ So euch die welt hasset/ so wisset das sie mich vor euch gehasset hat/ Weret jr von der welt/ so hette die welt das jr lieb. Die weil jhr aber nicht von der welt seydt/ sonder ich hab euch von der welt erwehlet/ Darumb hasset euch die welt.

Diß ist ein nötige vermanung vnd trost für die Christen/ das erstlich sie vnter einander/ alle lieb vnd freuntligkeit beweysen/ vnd darnach am Creutz sich nicht ergern sollen. Denn vnser vernunfft kan anders nicht vrtheylen/ wenn es vns vbel gehet/ denn das Gott mit vns zürne/ vnd wölle vnser nicht. Aber da sagts vnser lieber Herr Christus seinen Jüngern mit hellen worten zuor/ die welt werde sie hassen/ Darumb gedencke nur niemand/ wenn er recht predigt/ das die welt jn hochhalten/ loben/ ehren/ vnd feyren werde/ hassen wird sie jn/ vnd wirdt auff den haß/ allerley vnglück folgen. Was solt du aber alß denn gedencken? Wilt du es dafür halten/ die lehr sey vnrecht/ sonst solte die welt sie annemen? Nein. Wilt du aber glauben/ Got habe dein vergessen/ das er nicht besser vber dir helt/ vnd dich so

plagen lest? Nein. Sonder das widerspil solt du glauben/ vnd das Creutz anders nit annemen noch deuten/ Denn ein gewisses zeychen vnnd zeugniß/ das Gott dich von der welt außerwehlet hab/ vnnd du nicht ein welt kind/ sonder Gottes kind seyest. Derhalb soll niemandt für dem Creutz dich entsetzen/ frewen sollen wir vns/ als eines gewissen zeugnuß/ das vnser lehr recht/ vnnd wir Gotes kinder sind/ vnd vnsern lohn in yenem leben gewiß empfangen sollen/ AMEN.

Gebet

HERR Gott hymlicher Vater/ der du dich durch deinen Sun Christum Jesum hast offenbaret/ Wir bitten dich/ gibe deinen heyligen Geyst inn vnser hertzen/ das er die recht Christliche liebe inn vns anzünde/ vnnd vor allem dem behütte vnnd beware/ das der liebe entgegen ist/ Vnnd daneben vns auch tröste vnnd stercke inn aller widerwertigkeit/ so deines worts halb vns begegnet/ das wir vns an dein gnad vnd wort vest halten/ vnd der welt vnd des Teuffels zorn verachten mögen/ Amen.

Ende der Euangelien von fürnembsten Festen.

Dem Christlichen Leser.

Dise kurtze Außlegung/ ist also dem jungen volck zu nutz verfasst/ auff das sie ihre übung jm wort Gottes dest baß köndten haben. Derhalb mögen Vatter vnd Mutter/ jre kindlin daz ugewehnen/ das sie alle Sontag/ den fürnembsten spruch/ so allzeyt auß dem Euangelio vor her gesetzt/ außwendig lernen/ vnd den selben die folgende woche durch/ nach dem Gratiar/ fein außwendig sagen/ bißweylen auch die kurtze außlegung vnd das gebet dazu lesen. Also kan es ein fleysiger Haußvatter mit diser wochenlicher übung dahin bringen/ das die kinder vnd das gesind/ mehr tröstlicher/ schönen sprüche auß dem Newen Testament lernen/ Denn alloe Bepstische Mönchen/ Pfaffen vnnd Nonnen können. O ein selige übung/ vnd Gott wolgefelliger dienst ist es/ Wo man auff dise weyse/ das junge volck in zeyt zu Gottes wort gewehnet/ vnnd in solcher übung für vnd für behelt/ Da wirdt on zweyffel der segen gehn/ der im 128. Psalm stehet. Deine kindlin werden sein/ wie die öle zweyglin vmb deinen Tisch her/ das ist/ Gott wirdt dir solche kindlin bescheren vnd geben/ da du nicht allein dein lust an sehen/ sonder auch gewisse hoffnung haben wirst/ das sie wol gerathen/ vnd du alles gutes an jnen erleben wirst/ Da sonst das ander gesind/ so von Eltern inn Gottes wort nicht erzogen/ noch vnerrichtet wirdt/ frech/ wild/ vnd vnge-

rathen bleyt/ vnd die eltern allen jammer an jnen sehen müssen. Dafür wölle Got alle fromme Christen gnedig behüten/ Amen.

Veit Dietrich

Wie die Eltern jhre kindlin zu disen fehrlichen zeyten/ vmb erhaltung des wort Gotes/ wider die feinde des heyligen Euangelij sollen lernen betten.

HErr Got himlischer Vater/ wir dancken dir/ dz du vns das selige liecht deines wortes so gnediglich angezündet/ vnd bißher hast lassen leuchten/ vnd bitten dich/ Du wöllest ja zu diser zeyt ob solchem liecht gnediglich halten/ vnd den Sathan vnd der argen welt nit gestatten/ das sie es außleschen. Laß dich vnser erbarmen lieber Vater/ vber welche solcher jammer sonderlich würde außgehen. Wir sind noch jung vnd vnerzogen/ vnd bedürffen für vnd für/ das wir in deiner forcht/ vnd in deinem wort von vnsern eltern vnerrichtet werden/ vnnd dich von tag zu tage/ ye lenger ye baß erkennen lernen/ So gehn aber die feinde deines worts da mit vmb/ das sie vns in abgötterey vnd finsternuß füren/ vnd das wort vns gar entziehen wöllen/ Solchem jammer lieber Vater/ wehre du vmb deines namens willen. Du sprichts/ du wöllest dein lob zu zurichten auß dem munde der vnmündigen vnd seugling/ Vmb solche gnad bitten wir dich yetz/ lieber vater/ gibe deiner Kirchen fride/ vnnd wehre allen feinden deines worts/ die jetzund vns bedrangen/ auff das wir vnd vnser brüderlin vnd schwesterlin/ so teglich hernach wachsen/ solches gnediges liecht auch haben/ vnnd dich mit vnserm gebet frü vnd abens loben/ anruffen/ vnnd bekennen/ Der du vnser einiger Gott vnd ewiger trost bist mit deinem Son vnserm Herrn Christo Jesu/ vnd dem heiligen Geist/ Amen.

Quellen:

Sämtliche Texte sind der [Glaubensstimme](#), Stand: Oktober 2021, und den dazugehörigen Seiten entnommen. Diese Seiten sind:

[Alte Lieder](#)

[Briefe der Reformationszeit](#)

[Gebete](#)

[Zeugen Christi](#)

Bei vielen, aber nicht bei allen Texten sind auch die Quellen angegeben.

Die Bücher der Glaubensstimme werden kostenlos herausgegeben und dürfen kostenlos weitergegeben werden.

Spendenaufruf - Jung St. Peter zu Straßburg

Ich hatte vor einiger Zeit das Vergnügen, in Straßburg die Kirche Jung St. Peter besichtigen zu können - das ist die Kirche, in der Wolfgang Capito die Reformation einführte und lange predigte. Sein Nachfolger war Paulus Fagius, der dann mit Martin Bucer nach England ging und dort starb.

Es war für mich ein besonderes Erlebnis, weil ich mich mit der Reformation in Straßburg schon lange verbunden fühle. Die Kirche ist immer noch evangelisch, und der Mitarbeiter, der die Kirche betreute, gab mir eine Reihe interessanter Informationen über die Geschichte der Kirche.

In den letzten Tagen habe ich für die Glaubensstimme das Buch „**Die Jung St. Peter-Kirche in Straßburg**“ von Jean-Philippe Lambs, einem Prediger an Jung St.-Peter von 1835 bis 1854, überarbeitet und aufgenommen.

Der Erhalt von Jung St. Peter ist teuer, die Gemeinde ist auf jede Spende angewiesen. Daher möchte ich auch hier zu Spenden aufrufen. Es gibt die Möglichkeit, per Paypal für diese Kirche und ihre Erhaltung zu spenden:

Die Homepage von Jung St.-Peter ist <https://www.saintpierrelejeune.org/>

Auf dieser Seite findet Ihr auch den Spendenlink von Jung St. Peter.

Ihr wisst, dass die Glaubensstimme - und auch die Bücher der Glaubensstimme - von Anfang an kostenlos waren. Das werden Sie auch bleiben. Manche fragen mich, ob ich Spenden annehme - das ist nicht der Fall. Aber jeder, der für Jung St.-Peter spendet, macht mir eine persönliche Freude, auch wenn ich es nicht erfahre.

Euch allen wünsche ich Gottes reichen Segen.

Andreas Janssen
Im Kreuzgewann 4
69181 Leimen

Natürlich suche ich immer noch Leute, die Zeit und Lust haben, mitzuarbeiten - wer also Interesse hat, melde sich bitte. Meine Email-Adresse ist: webmaster@glaubensstimme.de. Insbesondere suche ich Leute, die Texte abschreiben möchten, bestehende Texte korrigieren oder sprachlich überarbeiten möchten oder die Programmierkenntnisse haben und das Design der Glaubensstimme verschönern können.

Inhaltsverzeichnis

Vorwort	1
Vorrede	3
Am ersten Sontag des Aduents/ wie Christus zu Jerusalem auff eim Esel einreytet/ Euang. Matth. 21.	6
Gebet	6
Am andern Sontag des Aduents/ was für zeychen vor dem Jüngsten tag kommen/ vnd wie die Christen dazu sich schicken sollen/ Luce am 22.	6
Gebet	7
Am dritten Sontag des Aduents/ Wie Johannes seine Jüngern zu Christo schicket/ MATth. 11.	7
Gebet	8
Am vierdten Sontag des Aduents/ wie die Juden von Jerusalem zu Johanne schicken/ vnd ihm das tauffen verbieten wöllen/ Johannis am 1.	8
Gebet.	9
Am heyligen Christage/ von der geburt Christi/ Luce am 2.	9
Gebet.	10
An Sanct Steffans tag/ in den geschichten/ wie er vmb des Herrn Christi willen/ von Juden ist gesteyniget worden/ Acto. 7.	10
Gebet	11
Gebet	12
Am Sontag nach Weyhenachten/ wie Simeon im Tempel Marien vnnd das Kindlin Jesus segnet/ vnd von Christo weyßsaget/ Luce am 2.	11

Am newen Jarstag/ wie das Kindlin beschnitten/ vnd Jesus ist genennet worden/ Luc. 2.	12
Gebet	13
Am Sontag zwischen dem Newen jar vnd Obersten/ wie Christus am Jordan von Johannes ist getauffet worden/ Matth. 3.	13
Gebet.	14
Am Oberstag/ Wie die weisen auß dem morgenland gehn Hierusalem kommen/ vnnd nach dem newgebornen kindlin fragen/ Luc. 2.	14
Gebet.	16
Am ersten Sontag/ nach Obersten/ wie das Kindlin Jhesus zu Jerusalem bleybt/ vnd Maria jn im Tempel findet/ Luc. 2	17
Gebet.	17
Am andern Sontag/ wie vnser Herr Jesus mit seiner Muter/ vnd seinen Jüngern auff einer Hochzeyt/ zu Cana in Galilea gewesen ist	18
Gebet Für die/ so im Ehestand sind.	18
Am dritten Sontag/ wie Christus einen aussetzigen reyn/ Vnd zu Capernaum des Hauptmans Knecht gesundt machet/ Matthei am 8.	19
Gebet.	19
Am vierden Sontag/ wie der Herr Christus seine Jünger errettet/ in eim grossen vngewitter auff dem Meer/ Matth. 8.	20
Gebet	20
Am fünften Sontag/ vom Feynd/ der vnkraut in den guten acker seet/ weyl die leut schlieffen/ Matthei am 13.	20

Gebet.	21
Das Gleychnuß von den arbeytern im Weinberg/ die vngleich arbeyten/ vnnd doch gleichen lohn empfangen/ Matth. 20.	21
Gebet.	22
Am Sontag Sexagesima/ vom Samen der eins theyls an weg/ ein theyls auff das felsicht/ vnd eins teyls vnter die dorn fellet/ Luce am 8.	22
Gebet.	23
Am Fasznacht Sontag/ wie Christus von seim leyden weyssaget/ vnd einen Blinden sehen macht/ Luce am 18.	23
Gebet.	24
Am ersten Sonntag in der Fasten/ wie Christus in der Wüsten vom Teuffel versucht wirt. Mat. 4.	24
Gebet.	25
Am anderen Sontag inn der Fasten/ vom dem Heydnischen Frewlin/ des Dochter besessen war/ Matthei am 15.	25
Gebet.	26
Am dritten Sontag/ wie JEsus einen Teuffel außtreibet/ der stumm war. Luce am 11.	26
Gebet.	26
Am Sontag zu Mitfasten wie der Herr Christus fünfftausent Man/...	27
Gebet.	27
Am Sontag nach Mitfasten/ Johannis am 8.	27
Gebet.	28
Am Palm Sontag/ vom leyden vnsers Herren Christi/ Esa. 53.	28

Gebet.	29
Von dem Abendmal des Herren 1. Cor. 11.	29
Gebet.	31
Am Ostertag Rom. iijj.	31
Gebet.	31
Am andern Ostertag/Luce am 24.	32
Gebet.	32
Am ersten Sontag nach Ostern/ wie Christus seinen Jüngern nach seiner aufferstehung/ das predigamt befilhet/ Johan. 20.	33
Gebet.	33
Am andern Sontag nach Ostern/ wie vnser Herr Christus tröstet/ er wölle vnser rechter Hirt sein/ vnd vns wider den Sathan vnd todt retten/ Johannis 10.	34
Gebet.	34
Am dritten Sontag nach Ostern/ wie Christus warnet vnd tröstet/ der künfftigen verfolgung halb/ Johannis am 16.	35
Gebet.	35
Am vierdten Sontag/ wie Christus den heiligen geyst verheist/ vnd lehret was er in der welt soll außrichten/ Johan. 16.	36
Gebet.	36
Am fünfften Sontag nach Ostern/ verheyssung vnd vermanung zum gebet/ Johan. 16.	37
Gebet	37
Am tag der Himelfart Christi/ Ephe. 4. Psal. 68.	37
Gebet	38
Am sechsten Sontag nach Ostern/ warnung der	38

künfftigen verfolgung halb/ Johan. 16.	
Gebet	39
Am heyligen Pfingstag	39
Gebet	40
Am andern Pfingstag	41
Gebet	41
Vom Fest der heyligen Tryfeltigheyt/ Matth 4.	41
Gebet	42
An der heyligen Trifaltigkeyt tag ...	43
Gebet	43
Am ersten Sontag/ vom reychen Mann/ vnd armen Lazaro/ Luce am 16.	44
Gebet	44
Am anderen Sontag/ nach Trinitatis/ das gleychnuß vom grossen Abendmal/ Luce 14.	44
Gebet.	45
Am dritten Sontag/ nach Trinitatis/ von dem verlornen schefflein/ welchem der Hirt nachgeheth/ vnd es suchet/ Luc. 19..	45
Gebet	46
Am vierdten Sontag/ nach Trinitatis/ ein lehr/ wie wir vntereinander freundlich vnd Christlich leben sollen/ Luce am 6.	46
Gebet	47
Am fünfften Sontag/ wie Petrus auff den befelch Christi/ vil Fisch fahet/ Luce am 5.	47
Gebet	48
Am sechsten Sontag nach Trinitatis/ ein lehr/ was Christliche Gerechtigkeyt sey/ Matth. 5.	48

Gebet	49
Am sibenden sontag nach Trinitatis/ wie der Herr JEsus mit wenig brodt/ vil menschen speyset/ in der Wüsten/ Mar. 8..	49
Gebet	50
Am achten Sontag nach Trinitatis/ warnung der falschen Propheten halb/ Mathei am 7.	50
Gebet	51
Am neunden Sontag/ vom vnrechten Haußhalten/ Luc. 16..	51
Gebet	52
Am zehenden Sontag von der zerstörung Jerusalem/ Luce am 19.	52
Gebet	53
Am eylfften sontag/ vom Phariseer vnd Zölner/ wie sie bede im Tempel betten/ Luc. 18.	53
Gebet	54
Am zwölfften Sontag/ wie vnser Herr Jesus einen stummen/ vnd tauben gesund machet/ Marci am 7.	54
Gebet	55
Am dreyzehenden Sontag von der schriftgelerten frag/ was man thun soll/ das man selig werde/ Luce am 10..	55
Gebet	56
Am vierzehenden Sontag von den zehen Aussetzigen/ Luce am 17.	56
Gebet	56
Am fünffzehenden Sontag/Mathei am 6.	57
Gebet	57

Am sechzehenden Sontag/ wie Christus den todten Sun/ einer Wittib auffwecket/ Luc. 7.	58
Gebet	58
Am sibenzehenden Sontag/ wie der Herr Christus inn eins Phariseers hause/ am Sabbath einen Wassersüchtigen gesund machet/Luce am 14.	58
Gebet	59
Am achzehenden Sontag wie der Schrifftgelerte erstlich Christum fraget/ von dem fürnemesten gebot im Gesetz. Christus aber die Phariseer widerfraget/ wens Sun Christus sey/ Matth. 22.	59
Gebet	60
Am neunzehenden Sontag/ wie Christus einem Gichtbrüchtigen menschen seine sünde vergibt/ vnd jn gesund machet/ Matth. 9.	61
Gebet	61
Am zwentzigsten Sontag/ Das gleychnuß von der Hochzeyt/ da etliiche gest nit auff wöllen/ etliche aber kommen/ vnd haben kein hochzeytlich kleyd an/ die werden wider hinnauß gestossen/ Matth. 22.	61
Gebet	62
Am ein vnd zwentzigsten Sontag wie der herr Jesus des königischen Sun gesund macht/ Jo. 4.	63
Gebet	64
Am zwey vnd zwentzigsten Sontag/ Das gleychnuß vom knecht der seym Herrn zehen tausent pfund schuldig war/ vnnd hette nicht zubezalen/ Matth. 18.	64
Gebet	65
Am drey vnd zwentzigsten Sontag/ wie die Phariseer Christum versuchen/ ob man dem Keyser soll den	65

zinß geben/ Matth. 2.	
Gebet	66
Am vier vnd zwentzigsten Sontag/ wie vnser lieber Herr/ des Obersten Tochter vom todt auffwecket/ vnnd vnter wegens dem krancken Weyblein holfft/ Matthei am 9.	66
Gebet	67
Am fünff vnd zweintzigsten Sontag/ vom grewel der verwüstung/ Matth. 24.	67
Gebet	68
An Sanct Andreas tag/ Wie er zum Herren Christo kommen/ vnnd zum Apostelamt beruffen sey/ Johannis am 1.	68
Gebet.	69
An Sanct Thomas tag/ Johannis am 20.	69
Gebet	70
An der vnschuldigen kindlein tag/ Matthei am 2.	71
Gebet.	71
An Sanct Paulus bekerung/ 1. Timoth. 1.	72
Gebet	72
An Sanct Matthias tag. Matthei am 9.	73
Gebet	73
Am tag der Reynigung/ da das kindlin Jesus/ nach den sechs wochen/ wirdt in den Tempel getragen/ Luce am 2.	74
Gebet	74
Am tag der verkündigung Maria/ Luca am 1.	75
Gebet.	75
Am tag Philippi vnnd Jacobi/ Johan. 14.	76

Gebet	77
An Sanct Johannes tag/ was Johannes für ein ambt haben werde/ Luce 1.	77
Gebet	78
Am tag Petri vnd Pauli/ Matthei am 16.	78
Gebet	79
Am tag Marie Magdalene/ welches Fest wir am 7. Sontag nach Trinitatis halten/ Lu. 7.	79
Gebet	80
Am tag der heymsuchung Marie/ Luc. am 1.	80
Gebet	81
An Sanct Jacobs tage/ Marciam 10.	81
Gebet	82
An Sanct Bartholomeus tag/ Luce am 22.	83
Gebet.	83
An Sanct Mattheus tag/ Matthei am 9.	84
Gebet.	85
An Sanct Michaels tag/ In dem 91. Psalm.	85
Gebet	86
Am tag Simonis vnd Jude/ Johan. am 15.	86
Gebet	87
Dem Christlichen Leser.	87
Wie die Eltern jhre kindlin zu disen fehrlichen zeyten/ vmb erhaltung des wort Gotes/ wider die feinde des heyligen Euangelij sollen lernen betten.	88
Quellen:	89
Spendenaufruf - Jung St. Peter zu Straßburg	90